


國學基  
本叢書  
兩漢博聞



國學基本叢書

兩漢博聞

楊侃編

商務印書館發行

## 刻兩漢博聞序

自狂秦書儒之禍。而三代之文不覽者多矣。漢興如隋何魯兩生輩。或者亦焚坑子遺之子。未可謂之弘雅也。厥後陳農求遺書於天下。而未火者出焉。蓋異於孔壁之所藏。有所概限者矣。由是人漸以傳習文始向盛。如司馬遷之史記。亦煩心於勤敏。播迹於勞瘁。以成之。而兩漢書則又有所因述。採輯頗易。其間註什訓詁。不獲盡遍。近古載籍。莫過於兩漢書也。而訛謬弗考。形似弗辨。則何以下淫於羣編耶。韓子所謂記事者。必提其要。纂言者。必鉤其元。宋儒之意。以爲讀書者。讀其實而已。其浮泛游移之辭。奚足篤尙。此兩漢博聞之不可以或少也。予幼學瑣尾。促狹習奔時之業。遵俗師之課。而壁光瑩焰。注精於漢書。博聞一書。未之快目。晚歲方遇錄本。驚嘆曰。初讀漢書之年。而以此備參考。決疑貳。何其詔我以徵哉。今衰頹之甚。欲再循其次。如少齡氣銳之時。不能一強逮矣。乃思立達者。天下之公。開鑿者。先民之哲。急用鍍諸梓。以爲讀漢書者之啓鑰。庶乎不坐我弊。挾持其聰明。恢拓其智慮。俾學者俱爲弘儒。則有作必效國華。有言必爲世道。且有以迴絕乎不根之陋語。移責乎非古之織家。而今一時任俗。率狼戾離披。見此書者。是猶覩南威而匿鬼貌。視尙織而毀牛衣矣。何則。有天降之人。斯有天發之言。有天發之言。斯有天成之文。莫非模諸古而濟之以才。出諸心而緯之以思。講諸類而達之以神。其月更而歲不同者。自爾焯然蔚然。揆天章而炳地理。非由妄以綴之。虛以屬之也。此又不可以容譏喙。肆哂頰焉。噫。鄭賢記世叔討論。

兩漢博聞序

之長。左史稱子產博雅之學。其不異於此書乎。  
嘉靖戊午元日。黃魯曾撰。

# 兩漢博聞目錄

## 卷第一 前漢

北闕

鳳闕漸臺井幹

麒麟閣

靈旗

鍾虞

通權火

承露盤

尸解

陳倉寶雞

北第

東第

甲舍

柱下方書

計相

莫府

部曲

部校

票姚校尉

金人

慶兵

部刺史

郡守尉

李法

甲乙帳

綺紈

穀騎

滿籬

丞相更春乃封

上尊酒

慮囚

褒衣博帶

櫛具劍

具獄

躡履

借前箸

儋石之祿

雋永

赤松子

黃石書

金匱之計

五宗

紬書

臧獲

土刑

間使

鑿空

邛竹杖

黃金上幣

以斤名金

牢盆

宣室

大鈞

泉布

秦牛之賦

閭左

九府圖法

黃頭郎

破觚爲圓

椎埋

喉咽

符節臺

結髮

戈船

旁午

梓宮

輜輶車

廟勝

鞞豕

蒲輪

桑息

左遷

木強

掖門

瓦合之卒

醞藉

推轂

肺附

除吏

關說

揚摧

武庫兵

建鼓寺

不訾之軀

次骨

睚眦

柄臣

堂皇

伏質

尚方斬馬劍

軺傳條對

九九

魁柄

文石陸赤堊

法坐

珠璣

印章數五

篇

殿

臥廬

奏廁

三璽

行內

靈壽杖

青蒲

移病

營惑

印鞞

重足一迹

擊劍

筆札

校獵

六玉蚪

扈從四枝

垂堂

行祖

白屋

羽林孤兒

猶豫

予甯三年

除任子令

名田

璇題

并閭平慮

駮駮

明堂

卜射武戲

待詔漏刻

卷第二前漢

黃屋左纛

關用傳

巖廊

矯僞

詔板

腐刑

銅竹符

質疑

緣飾儒術

媒蘖

亭長

甄鈞

戲下

稱制

叢臺

邸舍

謗木

芝房

龍淵宮淬劍

程量

疾置

伐闕

椒房

山郎

稟街

橫草之功

鸞旗

空拳

臨遣

籍甚

長榆塞

警蹕

枝梧

祭酒

廉隅

轅門

兩漢傳聞 目錄

斷養

相駁

秋豪

犬牙

驂乘

進善旌

長星彗孛

豎儒

出其右

湯沐邑

編戶

章程帶厲  
規摹

鐵契

百二鐵飯

計偕

角抵

池禦

飲飛

一封輶傳

元服

昆蟲

璽符節

按堵

鉤距

金印赤鞅

守宮

泰階六符

賈區

投石拔距

尸祿

漿酒霍肉著頭盧兒

衣敝履空

緜力

遲明

閩中

亡賴

逮捕

三族

羽檄

權醕

阡陌

幸酒

傅婢

財取

闔郡

黃鵠下太液

弄田

飾廚傳

城旦舂鬼薪白粲

酎金

方內

陸海

不根持論

漏澤

棄繻

狼戾

鼓鑄

五鼎

絳幘傳鱗

抗疏



徇地

六飛

調兵食

武帳

蹶張

孩提

苻馬棘僮

訾筭得官

卷第三前漢

更有三品

張飲

乘傳

詭辯

約從從橫

縣官

兩漢博聞

目錄

傳舍

隋直

十年不調

舞文

一襲

物故

百越

姬妾

暴室

馱驢

舍人

權會

景從

渙汗

搯學

虎落

倚瑟

巧詆

原廟

三秦

壬人

辟彊

中二千古

擁彗

宿兵

一子不事

頭會箕斂

郵亭

羽衣

還踵

腐儒

尺籍伍符

械器

爲壽

汶上明堂

白公

佐酒

復道

柱國

合從

同產子

左道

兩漢博聞 目錄

相訐

馬口錢

倉廩

絕幕

跡弛

便殿

不肖

亢禮

甬道

酒闌

斬以徇

耕橐

期門羽林

水衡都尉

徹侯

鞀鼓

緡錢

長楊五柞

栢梁臺

典屬國

子大夫

惡少年

三川

陛下

賜告

宗臣

青瑣

閑駒

越騎

丞相

流庸

計帳

橋度吏

火耕水耨

水衡錢

算商車

緩頰

銜枚

三齊

繡衣直指

法有祖

濯歌

少府

戊巳校尉

五兵

六

傳馬

占租

侵漁

泛駕之馬

捷仔

漕渠

間出

老弱傅籍

花園

長揖

較然

奉常

執金吾

金璽蓋綬

輸之司空

司隸

朝日夕月

褒蹶金

計然

心計

關葺

圓牆

仰藥

卷第四前漢

治行

阪上走丸

端門

銜檝

軌躅

橋正

兩漢博聞

目錄

行在

先甲

小步馬

掌故

齊民

青社

少從

招權

獄市

申子學

從理入口

詐僞萌生

偶人

小生

睢上

舳舻

嬾畜

狼顧

均輸平準

宵人

進執

采金鄱水

事刃

任俠

簿責

翁主

左驗

畔換

渥注馬

汗血馬

晚節

服役

三木

劍論

積竹杖

封人頸

冠玉

四皓

王主

城門候

君侯

子絲

亞將

奪適

求雨

威棧

旄旗

屬車

枉矢

殊庭

從橫短長術

數奇

鼎胤

鼻鏡

鷓夷

五諸侯

行馳道

射鵰

祁連山

旬歲

鑿坏

諡

反騷廣驪  
畔牢

天狗

首級

三尺法

居無何

十二樓

縉紳

傾蓋

復除

丈人

遽蔭

鬪鞠

泉山

宮騎

文鵠

品藻

常伯

禪王

箴石

烏號

箭服

綿叢

統斷幹

拔城

鉦鼓

闔尹

冢象祁連

承明廬

周陸

榜人

咫尺之書

法從

大黃

褒然

不世之功

伏祠

九賓

文甲

穀嗛

急就篇

竹皮冠

蹲鴟

交戟

馮軾

凌室

膠

引強

遮虜障

厥角鬚首

犇命

皮幣

鷓冠

劍璣

金選之品

兩漢博聞目錄

八體

能

感慨

置醴

間路

間者

指縱

殿兵

穹廬

門牡飛

封君

苑馬

雉經

秒忽

名數

六體

擊筑

五陵

枕中書

葬驪山

弋梯

棧道

鈍如椎

成蹊

九流

卽山鑄錢

商顏

牢讓

置亭

首鼠兩端

秦篆

三雍

二府

印刊

騶騎

太夫人

鳩酒

酒家保

爰臂

初用夏正高里

磨錢質取鉛

黔首

咀藥

離飢寒

睢陽曲

卷第五前漢

請聞	鳴鏑	持滿	駿驥冠
餐霞	倒景	涓人蒼頭軍	上游
拾芥	天極	折膠	賈豎
長休告	大府	方中	爰書
縣士炭	景星	舞知乾沒	間適
綠車	珠襦	席勝	琅當
橫行書	尉薦	童騎	便面
金布令	犀利	千人司馬	畫象
度曲	甲觀畫堂	祿祭	郡將
股弁	縣度	蟻飲	馬復令
田輪臺渠犁	儀形	子午道	跬步
毛摯	東溼	曲臺記	大小戴
驪駒	鬼廷栢	真宅	鉶箒
負海	隼	方制	日夜食

雒陽

日南郡

葭葦之故

紫貝

蜀微

持更

試守一切

詳延

五時

陽朔年

枌榆社

米鹽

車戶騎三將

辟易

騎置

酒泉郡

耐刑

前星

珊瑚

請吏一奇

附離

昆明池

郾時

木寓龍馬

微行

公社

銀黃三組

檻車

麗譙

斷匈奴左右臂

古瓜州

罽

河源

家徒四壁

流離

監奴

居延

密時

三服官

陵夷

官稷

郎中令

絕亢

薜芥

分陝

靈州

畧地

會稽禹穴九疑

犢鼻

變告

甲令

五屬國

吳陽上下時

司馬門

客土

樽檳

中郎將

沐猴

攝弓

甌脫

威士

校司馬

卷第六前漢

龍樓

戲戟

樵蘇

布鼓

雞卜

禁錢

儲侍除舍

臧緝

日者

贈行

隊帥

天郊

跂行喙息

受降城

枸醬

清狂

食采

柱後惠文

挺身逃

浩穰

撞舐

都護督察

倒縣

炳管蕭

論室

款塞

豬其宮室

舉白

著令

三輔號為卿

榜掠

傅會

清閒之燕

以日易月

單于

碑碣

柘漿

兩宮

什器

盱衡

自繆

支庶

迹射士

抱弩負蘭

衣褐

扼虎命中

檉柳胡桐白草

突門

騷

贅培

祖有功

除保父母同產令



給事官司馬中

首歲

膠葛

立樂府

雅拜

褒成君

酬

特將

譙讓

梟騎

楚歌

粟紅腐

排擠

廷見

假吏

四輔

下走

獲人

百賈

昆雞

尺二牘

內朝外朝

渾殺

月蝓日域

兜離

顧山錢

上東門

橐佗

議格

官吏

警說

望舒

琴徽

案脈

靈龜

高訾

傳漏

邊穀

廉問

二斬

體貌大臣

跡前事

刑名

魁岸

循江上

小學

結轍

三宮

厭衆意

釋躄

力政

梁肉

車丞相

詔

北落蒙全

官師

無狀子

戚里

微諫

兩漢博聞 目錄  
卷第七前漢

阿房	韋帶	弧弓	魯縞
劇上	齧鄰	幺麼	北叟
丹青之信	渾元	椒除	秦中
東箱	大奴	南北軍 <small>七校</small>	飲泣
提封	短褐	顛門	社木
菜色	伏歷	壺奧	牛衣
蹂躪	文毋害	豪吏	梟首
昭秦將	甚亡謂也	七大夫	省中
海丞果丞	幹獵車	疇其爵邑	年號
大要	射聲	大長秋	長信少府
塊然	廉上	倅馬	薦草
刺舟	班輸	鷓雀	胥靡
部署	屬吏	博望苑	禊祝
少府私府	厄三七之閒	著土	不得月支要領

先容

七首

寥廓之士

糲食

杜陵男子

押至

侵牟

質木

虎牢

句吳于越

勃碣

三楚

累罍

卽拜

三始

蕭然

子母錢

腹非

姦鑄赤仄

莢錢

八銖錢

五分錢

四銖錢

五銖錢

契刀錯刀

連弩

便衣

一半冰

百金稅

問遺

舍匿

發車封

友婿

搏景

刷恥

埒富

稱之不容口

法宮

充賦

狐曰

隨牒

已然諾

餐錢奉邑

卷第八後漢

大駕法駕小駕

文始五行武德之舞

三老五更

橫吹

小侯學

清宮

三鱣

三互

鯨魚杵蒲牢

周廬千列

勾陳

尺一詔

兩漢博聞

目錄

肉刑

輦車驪駕

風角

道家蓬萊山

中書

名馬式

馬服君

汗簡

帝者諦也

治所

黃綬

間步

束脩之饋

司馬法

三閭

鼓行

人品

角立傑出

國憂

禁民二業

琴增二絃

去符傳

清詔

去就之概

前星

征營

當陽侯

北寺獄

通儒俗儒

伎數

奏記

搜牢

叟兵

百六有會

郿塢南北鄔

鮮車怒馬

服練紅

八月賜羊酒

三關

天心

傳國璽

紫微宮

飛書

伊優抗讎

彈棊

格五

六博

意錢

蹴鞠

步驟

掾屬

甲乙科射策

三獨坐

景風

間氣

三統

百戶牛酒

駭雞犀

設屏

重繭

樞機

匿犀

囊弓臥鼓

晏開

左官

生犀

卷第九後漢

六璽紫泥

文降

投間

油戟

奕世

時髦

晨門

白越

兩漢博聞目錄

太后臨朝

僧牛

章鉞

鐵券

韋帶

六幽

通中枕

重問

枇謬

紫艾綬

龜鼎

保阿傅士

環珖

跋扈

關寬

角力

懸師

中藏

殊死

廊廟之計

方領

榮信

閎閱

兼兩

竹帛

五營

峭覈

東園梓器

柱天

慰藉

銀艾

元元

史書

從官

鹿車

回穴

嬰城

骨鯁

鍛鍊

仙人山圖

露布

采女

富於春秋

姑息

梗概

髻亂

巨萬

翰張

府帑

稽故

註誤

浮屠

伊蒲塞桑門仁嗣

神道

刀筆

輕車

伍伯

充庭車

口賦

旄頭騎

長檄

葆車

燧燧

同門學

甄表門閭

苛政

羽檄

三河

殿最

鉗鈇

輿地圖

制詔

赤草

幕南

野穀旅生

亭候

牙門

衿帶

問關

投纆

庶孽

大較

輜重

屠唐鄉

中堅

雲車

武關山爲地門

樓車

面縛

占書

盤盂銘

章奏

嚴棘

珠書祕器

賜胙

江沔

酒罈

縣廷

梁益

喉舌之官

卷第十後漢

金馬碧雞

鈎黨

枕榔麪

葱嶺

原羊

伏臘

宰士飛福

機衡

秭歸

縞素

天祿滿烏

推步

廬落院落

風問

火蠟

河灌

徽墨

雪山

三臺

祖臘

告謚

追北

輜駟

師子封牛

紹介

霄

熊經踰顧

鵠髮

虎魄枕

貂獸

都亭

龍沙

渾儀

墳籬

復土

赤地

鹿門

鴻都門學士

六韜

沆瀣

餌胡麻乘白鹿

明府

猩猩

蛙蛛

長秋宮

堊壁

螟蟻

冒彫

邸第甲第

盤鍌

果下馬

賣官

蒙衝船

穀飲

青牛道士

堉垆

金沙光珠

六丁

玉搔頭

牛黃

五嶺

壽藏

金蠶

五溪

投劾

精廬

水排

捲握

鳧藻

方舟

雨師風伯

龍門

巫覡之言

銀臺

曾城

尺牘

獄犴填滿

容車

交河

翡翠

丙穴

三泉

折角巾

邊幅

蔡侯紙

突騎

三輔

門下掾

錚錚

爛羊頭

綠林

黃巾

赤眉

錢塘

華陽國志

蟬蛻

日祀間祀

騎奴

矢石

金行之氣

鈐決之符

胎息氣

鮫魚

黃鉞

方底囊隱害

銀瑤

黔首繫趾

五時衣

黨錮

風爲號令

明衣

杠

五經博士一家之學

白虎觀石渠

嘉祭

專門



卷第十一 後漢

封禪

使匈奴中郎將

博士十四家

樓櫓

醢酒

含元包一

請讞

佛陀

毘毘

蘇合香

秦海

虹蜺

選懦之恩

管穴

使君

擁節

家法

三家詩

羯胡

秘經

君子不死之國

膏神養和

奇幻

魂歸岱 天孫

文犀

投蜺

聚落

宿麥

太史公

都護

石經

西域南山

幅巾

踟躕

德星

季母

流沙

貂鼯

蔓葬

配耐

玉門關

命夫

巴蜀

修鬢宇

騰囊

匈奴龍祠

馬當句

綈裘

不三宿桑下

青門

海大秦國

輓祀

幅裂

投暮

小杜律

大行

青部

拘儒

置之度外

解構

抵掌

糗糲

坏冶

刻玉版

銘功鼎

勒景襄之鍾

欽頤

髻髻

恭館

遂古

茹薇

診脈

賈胡

鼓下戮人

攘袂

錄尚書事

放手

贖刑

投傳

度遼將軍五原

部將

天人致誅

封事 副封

昆侖塞

郎官上應列宿

懷檄

尤無狀者

斗食小吏

方目紗

鈞鑽

汴渠

大酺禁羣飲

三老

白馬羌

三韓

太白

初作壽陵

徙函谷關

褻斜

軍假吏山阻用材官

幘

豪傑英俊

司隸

穀皮綃頭

內學

謁太山請命

思遲直士

三屬

莖甲

卷第十二後漢

物色錯愕

試守

正印文

昭陽殿

檢押

兼金

壽家

調穀

版蕩

大駟

綺疎

亡命

隱几

浩壘

典負

貫行

麤糲

壺頭山

泰紫

狙詐

邪揄

抵罪

嗇夫

九市

題目

飛梁

刊章

直指

駱驛不絕

二祖四宗

太白經天

眩瞖

蒼布

避第

叔末

強項

南北庭

平署

山西

琴操

洞戶

郵置

臘賜

優復

釜鬻

款段馬

髻髮

椒風

帷幄

權

懷懷

前載

比門

門士

園邑

偃伯靈臺

隸名

五湖

麟藉

平民

兩漢博聞 目錄

伏閉

燈道

椶稜

靈篇

荀細

切積

廢典

犀舟勁楫

鎧馬

表左

列將

宰府

右職

皂囊

魁頭露紵

闕達

回容

風星

乙夜雞鳴歌

賀冬至

杜宇

九宮

陽月

三家言天

八行

象鑣

五星

懷宮

雲罕

皮軒

豹尾

一時之功

尼首

右姓

白水爲河

天潢

小斲

區種

行春

桑榆

三署郎

端門

貪叨

苞苴

黃腸

鄭公鄉

公羊墨守

顯氣

棹卒

露橈

巫蠱

籬校

偃子

# 兩漢博聞卷第一

宋 楊 侃 編

北闕高帝紀

七年上至長安。蕭何治未央宮。立東闕、北闕、前殿、武庫、太倉。

師古曰：未央宮雖南嚮，而尚書奏事謁見之徒皆詣北闕。公車司馬亦在此焉。是則以北闕爲正門。而又有東門、東闕，至於西南兩面，無門闕矣。蓋蕭何初立未央宮，以厭勝之術，理宜然乎。

鳳闕漸臺 井幹 郊祀志 五下

柏梁災，粵人勇之，迺言曰：粵俗有火災，復起屋必以大用勝服之。於是作建章宮，其東則鳳闕，高二十餘丈。其西則商中，數十里。北治大池，漸臺高二十餘丈，名曰泰液。南立神明臺，井幹樓高五十丈，蓋道相屬焉。

師古曰：勇之，粵人名也。鳳闕，三輔故事云：其闕闔上有銅鳳凰，卽金雀也。如淳曰：商中，商庭也。師古曰：商，金也。於序在秋，故謂西方之庭爲商庭。言廣數十里，漸臺漸浸也。臺在池中爲水所浸，故曰漸臺。一音子廉反。揚雄田獵賦云：漸臺泰液。漢宮閣疏云：神明臺高五十丈，上有九室，恆置九天道士百人，然則神明井幹俱高五十丈也。井幹者，井上木欄也。其形或四角，或八角。張衡西京賦云：井幹

疊而百層。即謂此樓也。幹或作翰。其義並同。

麒麟閣。蘇武傳二十四。

甘露三年。單于始入朝。上思股肱之美。迺圖畫其人於麒麟閣。

張晏曰。武帝獲麒麟時。作此閣。圖畫其象於閣。遂以為名。師古曰。漢宮閣疏云。蕭何造。

靈旗。揚雄傳五十七上。

雄奏甘泉賦曰。樹靈旗。

李奇曰。欲伐南越。告祈太一。畫旗樹太一壇上。名靈旗。以指所伐之國也。

鐘虞。郊祀志五下。

甘露元年。建章長樂。鐘虞銅人皆生毛。長一寸許。時以為美祥。

師古曰。虞。神獸名也。縣鐘之木。刻飾為之。名曰虞也。附一鐘鼓之飾為此獸。

通權火。郊祀志五上。

上宿郊見通權火。

張晏曰。權火。燒火也。狀若并潔皁矣。其法類稱。故謂之權火。欲令光明遠照。通於祀所也。漢祀五時

於雍五十里。一燒火。如淳曰。權。舉也。師古曰。凡祭祀通舉火者。或以天子不親至祠所而望拜。或以

衆祠各處。欲其一時薦饗。宜知早晏。故以火為之節度也。他皆類此。

承露盤郊祀志五上

武帝作柏梁銅柱承露僊人掌之屬。

蘇林曰。仙人以手掌擎盤承甘露。師古曰。三輔故事云。建章宮承露盤高二十丈。大七圍。以銅爲之。上有仙人掌承露。和玉屑飲之。蓋張衡西京賦所云。立修葺之。仙掌承雲表之。清露屑瓊蕊以朝餐。必性命之可度也。

尸解郊祀志五上。後漢王直傳七十二下。

燕人爲方仙道形解銷化。

服虔曰。尸解也。張晏曰。人老而解去。故骨如變化也。今山中有龍骨。世人謂之龍解骨。化去應劭曰。列仙傳曰。崔文子學仙於王子喬。王子喬化爲白蜺。文子驚引戈擊之。俯而見之。王子喬之尸也。須臾則爲大鳥飛而去。師古曰。服虔二說是也。又後漢書注云。尸解者。言將登仙。假託爲尸以解化也。陳倉寶雞郊祀志五上。揚雄傳五十七上。

秦文公獲若石云。于陳倉北阪城祠之。其神或歲不至。或歲數來也。常以夜光輝若流星。從東方來。集于祠城。若雄雉。其聲殷殷云。野雞夜鳴。以一牢祠之。名陳寶祠。

蘇林曰。質如石。似肝。師古曰。陳倉之北阪上城中也。云語辭也。殷殷聲也。云傳聲之亂也。野雞亦雉也。言陳寶若來而有聲。則野雞皆鳴以應。上言雄雉。下言野雞。史駁文也。臣瓚曰。陳倉縣有寶夫人。

祠。或一歲二歲與葉君合葉君神來時。天爲之殷殷雷聲。雉爲之雊。

揚雄校獵賦云。罕車飛揚。武騎聿皇。蹈飛豹。追天寶。應駢聲。擊流光。埜盡山窮。囊括其雌雄。

師古曰。罕車。畢罕之車也。聿皇。疾貌。應劭曰。天寶。陳寶也。晉灼曰。天寶。雞頭而人身。如淳曰。陳寶神。來下時。駢然有聲。又有光精也。應劭曰。下時。窮極山川天地之間。然後得其雌雄也。師古曰。雄在陳倉。雌在南陽也。故云野盡山窮也。駢。音普萌反。

北第夏侯嬰傳十一

惠帝賜夏侯嬰北第。

師古曰。北第者。近北闕之第。嬰最第一也。故張衡賦云。北闕甲第。當道直啓。

東第司馬相如傳二十七下

司馬相如喻蜀文曰。邊郡之士。急國家之難。而樂盡人臣之道也。故有剖符之封。析圭而爵。位爲通侯。

居列東第。

師古曰。東第。甲宅也。居帝城之東。故曰東第也。

甲舍胡建傳三十七

射甲舍門。

師古曰。甲舍。卽甲第也。



柱下方書張蒼傳十三

張蒼秦時爲御史主柱下方書

如淳曰方板也謂事在板上者也秦置柱下史蒼爲御史主其事或曰主四方文書也師古曰居殿柱之下若今侍立御史也

計相張蒼傳

張蒼封北平侯遷爲計相一月更以列侯爲主計四歲是時蕭何爲相國而蒼乃自秦時爲柱下御史明習天下圖書計籍又善用算律歷故令蒼以列侯居相府主郡國之計者

文穎曰以能計故號曰計相師古曰專主計籍故號計相如淳曰時所卒立非久施也師古曰去計相之名更號主計

莫府李廣傳二十四

李廣莫府省文書

晉灼曰將軍職在征行無常處所在爲治故言莫府也莫大也或曰衛青征匈奴絕大莫大克獲帝就拜大將軍於莫中府故曰莫府莫府之名始於此也師古曰二說皆非也莫府者以軍幕爲義古字通單用耳軍旅無常居止故以帳幕言之廉頗李牧市租皆入幕府此則非因衛青始有其號又莫訓大於義乖矣省少也音所領反

部曲。李廣傳。

李廣行無部曲行首。

師古曰。續漢書百官志云。將軍領軍。皆有部曲。大將軍營五部。部校尉一人。部下有曲。曲有軍候一人。今廣尙於簡易。故行道之中。而不立部曲也。

部校。衛青傳二十五。

詔御史曰。護軍都尉公孫敖。三從大將軍擊匈奴。常護軍。傳校獲王。

師古曰。傳讀曰附。言敖總護諸軍。每附部校。以致克捷。而獲王也。校者。營壘之稱。故謂軍之一部爲一校。或曰。幡旗之名。非也。每軍一校。則別爲幡耳。不名校也。

票姚校尉。霍去病傳二十五。

去病爲票姚校尉。

服虔曰。音飄搖。師古曰。票。音頻。妙反。姚。音羊。召反。票姚。勁疾之貌也。苟悅漢紀。作票鶴字。去病後爲票騎將軍。尙取票姚之字耳。今讀者音飄搖。則不當其義也。

金人。去病傳。

票騎將軍收休屠祭天金人。

如淳曰。祭以金人爲主也。張晏曰。佛徒祠金人也。師古曰。今之佛像是也。休音許蚪。反屠音儲。

慶兵去病傳

粟騎將軍。歷五王國。轉戰六日。過焉支山。千有餘里。合短兵。慶臯蘭下。

應劭曰。隴西白石縣塞外河名也。蘇林曰。匈奴中山關名也。李奇曰。慶音鹿。津名也。晉灼曰。世俗謂盡死殺人為慶糟。文穎曰。慶音意。曹反。師古曰。慶字本從金。鹿聲。轉寫訛耳。慶謂苦擊而多殺也。臯蘭山名也。言苦戰於臯蘭山下而多殺虜也。晉說文音皆得之。今俗猶謂打擊之甚者曰慶。鹿牝鹿也。音於求反。

部刺史百官公卿表上七

監御史。秦官。掌監郡。漢省丞相遺史分刺州。不常置。武帝元封五年。初置部刺史。掌奉詔條察州秩六

百石員十三人。居部九歲。舉為守相。刺史以六條察事。薛宣傳五十三。

郡守尉。曹參傳九。百官表七上。後漢桓帝永壽元年。

秦一郡置守尉監三人。

百官表曰。郡尉掌佐守典武職甲卒。秩比二千石。景帝二年。更名郡尉曰都尉。建武七年。省。唯邊郡往。往置都尉及屬國都尉。永壽元年。以太山琅邪二郡寇賊不息。置都尉。

李法。胡建傳三十七。

黃帝李法。

不當爲御史大夫。至丞相以冬月賜爵關內侯。明年春。上使使者召欲封當。當病篤。不應召。室家或謂當不可強起。受侯印爲子孫。耶。當曰。起受侯印。還臥而死。死有餘罪。今不起者。所以爲子孫也。

如淳曰。漢儀注。御史大夫爲丞相更春。乃封。故先賜關內侯也。李奇曰。以冬月非封侯時。且先賜爵關內侯也。師古曰。李說是也。

上尊酒。平當傳。

賜當上尊酒。

如淳曰。律。稻米一斗得酒一斗。爲上尊。稷米一斗得酒一斗。爲中尊。粟米一斗得酒一斗。爲下尊。師古曰。稷卽粟也。中尊者宜爲黍米。不當言稷。且作酒自有澆醇之異。爲上中下耳。不必繫之米。

慮囚。雋不疑傳四十一。

雋不疑爲京兆尹。每行縣錄囚徒還。其母輒問。有所平反。活幾何人。

師古曰。省錄之。知其情狀。有冤滯與不也。今云慮囚。本錄聲之去者耳。音力具反。而近俗不曉其意。訛其文。遂爲思慮之慮。失其源矣。行。音下更反。如淳曰。反音幡。幡奏使從輕也。師古曰。幾音居起反。

褻衣博帶。雋不疑傳四十一。

雋不疑褻衣博帶。

師古曰。褻大裾也。言著褻大之衣。廣博之帶也。而說者乃以爲朝服垂褻之衣。非也。

櫛具劍。備不疑傳。

雋不疑冠進賢冠。帶櫛具劍。

應劭曰。櫛具。木標首之劍。櫛落壯大也。晉灼曰。古長劍首以玉作并鹿盧形。上刻木作山形。如似蓮花初生未敷時。今大劍木首其狀似此。師古曰。晉說是也。櫛音磊。標音匹遙反。

具獄。于定國傳四十一。

師古曰。具獄者。獄案已成其文備具也。

躡履。備不疑傳。後漢崔訓傳四十二。

暴勝之躡履迎雋不疑。

文穎曰。躡音纏。師古曰。履不著跟曰躡。躡謂納履未正。曳之而行言其遽也。躡音山爾反。崔駰候竇憲履屐迎門。

屐屐謂納履曳之而行。言忽遽也。屐與躡同。

借前箸。張良傳七。

張良曰。臣請借前箸以籌之。

張晏曰。求借所食之箸。用指畫也。或曰。前世著明之事。已籌度。今時之不若也。師古曰。或說非也。箸直庶反。

儋石之祿。刪通傳十五。

守儋石之祿者闕卿相之位。

應劭曰：齊人名小罌爲儋，受一斛。晉灼曰：石，斗石也。師古曰：儋，音都濫反。或曰：儋者，一人之所負擔也。

雋永。

刪通論戰國時說士權變，亦自序其說。凡八十一首，號曰雋永。

師古曰：雋，音字竟反。雋，肥肉也。永，長也。言所論甘美而義深長也。

赤松子。張良傳。

張良曰：願棄人間事，欲從赤松子游耳。

師古曰：赤松子，仙人號也。神農時爲雨師，服水土，教神農，能入火不燒。至崑山上，常止西王母石室。隨風雨上下。炎帝少女追之，亦得仙俱去。

黃石書。張良傳。

張良嘗步遊下邳，圯上有一老父，衣褐，至良所，直墮其履圯下。顧謂良曰：孺子下取履。良取履圯下，跪進父曰：孺子可教。遂與期，夜半往。有頃，父亦來，出一編書曰：讀是爲王者師。後十年興，十三年見我濟北穀城下。黃石卽我也。其書乃太公兵法。

服虔曰。圯音頤。楚人謂橋曰圯。應劭曰。汜水之上也。文穎曰。沂水上橋也。師古曰。下邳之水。非汜水也。又非沂水。服說是矣。

金匱之計。孝成趙皇后傳六十七下。

耿育上疏。愚臣既不能深援安危。定金匱之計。

師古曰。援引也。金匱言長久之法。可藏於金匱石室者也。援音爰。

五宗。司馬遷傳三十。

遷作五宗世家。

師古曰。景帝子。凡十三人爲王。而母五人所生。遷謂同母者爲一宗。故云五宗也。

紬書。司馬遷傳。

遷爲太史令。紬史記石室金匱之書。

如淳曰。紬徹舊書故事。而次述之。師古曰。此說非也。紬謂綴集之。音冑。饋與匱同。

臧獲。司馬遷傳。

應劭曰。揚雄方言云。海岱之間。罵奴曰臧。罵婢曰獲。燕之北郊。民而墾婢謂之臧。女而婦奴謂之獲。

晉灼曰。臧獲。敗敵所被虜獲爲奴隸者。師古曰。應說是也。

士刑。司馬遷傳。

堯舜飯土簋。歡土刑。

師古曰：簋所以盛飯也。刑所以盛羹也。土謂燒土爲之。卽瓦器也。

間使。張騫傳三十一

天子聞張騫之言，欲從蜀求大夏道，迺令因蜀犍爲發間使，四道並出，出驪，出柞，出徙邛，出犍，徙音斯。師古曰：間使者求間隙而行。又注：柞通傳，間使謂使人伺間隙而單行。

鑿空。張騫傳

張騫既至烏孫，致賜喻指，卽分遣副使，使大宛、康居、月氏、大夏、烏孫發道，譯送騫與烏孫使數十人，馬數十匹報謝。因令窺漢，知其廣大，騫還拜爲大行歲餘，騫卒，後歲餘其所遣副使通大夏之屬者，皆頗與其人俱來。於是西北國始通於漢矣。然騫鑿空諸後使往者，皆稱博望侯，以爲質於外國。

蘇林曰：鑿，開也。空，通也。騫始開通西域道也。師古曰：空，孔也。猶言始鑿其孔穴也。故此下言當空道，而西域傳謂孔道也。

邛竹杖。張騫傳

張騫曰：臣在大夏時見邛竹杖，蜀布。

臣瓚曰：邛山名，生此竹，高節可作杖。服虔曰：布，細布也。師古曰：邛竹杖，人皆識之，無假多釋。而蘇林乃言節間合而體離，誤後學矣。



黃金上幣。食貨志四下。

秦兼天下，幣爲二等。黃金以鎰爲名，上幣銅錢，質如周錢。文曰半兩，重如其文，而珠玉龜貝銀錫之屬，爲器飾寶藏，不爲幣。然各隨時輕重無常。

孟康曰：二十兩爲鎰。師古曰：改周一斤之制，更以鎰爲金之名數也。高祖初，賜張良金百鎰，此尙秦制也。上幣者，二等之中，黃金爲上，而錢爲下也。臣瓚曰：言錢之形質如周錢，唯文異耳。

以斤名金。食貨志。惠帝紀。

漢興，以爲秦錢重難用，更令民鑄莢錢。黃金一斤。

師古曰：復周之制，更以斤名金。

惠帝紀。晉灼曰：凡言黃金，真金也，不言黃，謂錢也。食貨志：黃金一斤直萬錢。師古曰：諸賜言黃者，皆與之金，不言黃者，一金與萬錢也。

牢盆。

孔僅東郭咸陽言：願募民自給費，因官器作鬻，鹽官與牢盆。

蘇林曰：牢，價直也。今世人言願手牢，如淳曰：牢，廩食也。古者名廩爲牢盆，鬻鹽盆也。師古曰：牢，蘇說是也。鬻，古煮字。

宣室。賈誼傳十八。刑法志三。

文帝思賈誼徵之至入見上方受釐坐宣室。

蘇林曰宣室未央前正室也。應劭曰釐祭餘肉也。漢儀注祭天地五時。皇帝不自行祠。還致福。釐音禱。師古曰禱福也。借釐字爲之耳。言受神之福。

刑法志云宣帝時季秋後廷尉請讞時上常幸宣室齋居而決事。

如淳曰宣室布政教之室也。重用刑故齋戒以決事。晉灼曰未央宮中有宣室殿。師古曰蓋其殿在前殿之側也。齋則居之。

大鈞賈誼傳

大鈞播物塊圪無垠。

如淳曰陶者作器於鈞上。此以造化爲大鈞也。應劭曰其氣塊圪非有限齊也。師古曰今造瓦者謂所轉鈞言造化爲人亦猶陶之造瓦爾。塊音烏朗反。圪音於黠反。

泉布食貨志

貨寶於金。利於刀。流於泉。布於布。束於帛。

如淳曰名錢爲刀者以其利於民也。流行如泉也。布者布於民間。李奇曰束聚也。

秦半之賦食貨志四上

秦始皇內興功作。外攘夷狄。收秦半之賦。

師古曰：秦半三分取其二。

閭左食貨志。

發閭左之戍。

應劭曰：秦時以謫發之名謫戍。先發吏有過及贅壻賈人，後以常有市籍者發。又後以大父母父母嘗有市籍者，戍者曹輩盡復入閭，取其左發之，未及取右而秦亡。師古曰：閭，里門也。言居在里門之左者，一切發之。此閭左之釋，應最得之。諸家之義，煩穢舛錯，故無所取也。孟康曰：秦時復除者居閭之左，後發役不供，復役之也。或云直先發取其左也。

九府圖法食貨志四下。

太公爲周立九府圖法。

李奇曰：圓卽錢也。圓一寸而重九兩。師古曰：此說非也。周官：太府、玉府、內府、外府、泉府、天府、職內、職金、職幣，皆掌財幣之官。故云九府。圓謂均而通也。

黃頭郎，鄧通傳六十三。

鄧通以濯船爲黃頭郎。

師古曰：濯船，能持櫂行船也。土勝水，其色黃，故刺船之郎皆著黃帽。因號曰黃頭郎也。濯，讀曰權。音直孝反。

破觚爲圓。酷吏傳序六十。

漢興。破觚而爲圓。斲珞而爲楮。

孟康曰。觚。方也。師古曰。去嚴刑而從簡易。抑巧僞而務敦厚也。珞與彫同。

椎埋。王溫舒傳六十。

王溫舒少時椎埋爲姦。

師古曰。椎。殺人而埋之。椎。直追反。

喉咽。嚴延年傳六十。

延年曰。河南天下喉咽。

師古曰。喉咽。言其所在襟要。如人體之有喉咽。

符節臺。延年傳。

左馮翊缺。上欲徵嚴延年。符已發。爲其名酷。復止。

應劭曰。符。竹使符也。藏在符節臺。欲有所拜。召治書御史符節。令發符下太尉也。

結髮。梁丘賀傳五十八。

梁丘賀薦施讎。結髮事師數十年。

師古曰。言從結髮爲童。卽從師學也。

戈船。武帝紀。元鼎五年。

歸義。越侯嚴爲戈船將軍。

張晏曰。嚴。故越人。降爲歸義侯。越人於水中負人船。又有蛟龍之害。故置戈於船下。因以爲名。臣瓚曰。伍子胥書。有戈船。以載干戈。因謂之戈船也。

旁午。霍光傳三十八。

昌邑王受璽已來。二十七日。使者旁午。持節詔諸官署。徵發凡一千一百二十七事。

如淳曰。旁午。分布也。師古曰。一從一橫爲旁午。猶言交橫也。

梓宮。霍光傳。後漢顯宗紀二。

服虔曰。棺也。師古曰。以梓木爲之。親身之棺也。葬霍光爲天子制。故亦稱梓宮。後漢書注云。梓宮。以梓木爲棺。風俗通曰。宮者。存時所居。緣生事死。因以爲名。

輜輳車。霍光傳。

載霍光尸柩以輜輳車。

文穎曰。輜輳車。如今喪轎車也。孟康曰。如衣車。有牕牖。閉之則溫。開之則涼。故名之輜輳車也。臣瓚曰。秦始皇道崩。祕其事。載以輜輳車。百官奏事如故。此不得是轎車類也。師古曰。輜輳本安車也。可臥。後因載喪。飾以柳絮。故遂爲喪車耳。輜者密閉。輳者旁開牕牖。各別一葉。後人旣專以載喪。

又去其一而總爲藩飾，合工名呼之。

廟勝，趙充國傳三十九。

誠非素定廟勝之策。

師古曰：廟勝，謂謀於廟堂而勝敵也。

鞞塚，趙充國傳。

軍士寒，手足鞞塚。

文穎曰：鞞，坼裂也；塚，寒創也。師古曰：鞞，音軍；塚，音竹足反。

蒲輪，申公傳五十八。

王臧、趙綰請立明堂，以朝諸侯，不能就其事，乃言師申公。於是上使使束帛加璧安車，以蒲裹輪，駕駟

迎申公，申公至八十餘。

桑息，孝成班婕妤傳六十七下。

班婕妤賦云：每寤寐而桑息兮。

師古曰：桑息，言懼而喘息也。桑，古累字。

左遷，周昌傳十二。

高祖召御史大夫周昌曰：吾欲煩公公彊爲我相。趙昌極知其左遷。

師古曰是時尊右而卑左故謂貶秩位爲左遷。  
木強周昌傳。

贊曰周昌木強人也。

師古曰言其強質如木石強音其兩反。

掖門成帝紀建始三年。

服虔曰掖門者正門之旁小門也。師古曰掖門在兩傍言如人臂掖也。

瓦合之卒酈食其傳。

酈食其謂高祖曰足下起瓦合之卒。

師古曰謂如破瓦之相合雖曰聚合而不齊同。

醞藉薛廣德傳四十一。後漢第五。敘傳三十七。

薛廣德爲人溫雅有醞藉。

師古曰醞言如醞釀也藉有所薦藉也。

第五倫少醞藉不修成儀。

注云醞藉猶寬博也。

推轂田蚡傳二十三。

寶嬰、田蚡俱好儒術。推轂趙綰爲御史大夫，王臧爲郎中令。

師古曰：推轂謂升薦之。若轉車轂之爲也。

肺附田蚡傳。劉向傳六。

蚡以肺附爲相。

師古曰：舊解云：肺附如肝肺之相附著也。一說：肺斫木札也。喻其輕薄附著大材也。又劉向傳：臣幸得託肺附。注云：肝肺相附著猶言心膂也。一說：自言於帝室猶肺札附於大材木也。

除吏田蚡傳。

田蚡爲丞相，入奏事，語移日，所言皆聽。薦人或起家至二千石，權移主上。上乃曰：君除吏盡未，吾亦欲除吏。

師古曰：凡言除者，除去故官，就新官。

關說佞幸傳

公卿皆因關說

師古曰：關說者，言由之而納說，亦如行者之有關津也。

揚摧敘傳七十下

敘傳曰：揚摧古今。



師古曰揚舉也。摧引也。揚摧者舉而引之。陳其趣也。  
武庫兵母將隆傳四十七。

古者諸侯方伯得顯征伐。迺賜斧鉞漢家邊吏職在距寇亦賜武庫兵皆任其事然後蒙之春秋之誼家不藏甲所以抑臣威損私力也。

建鼓。寺何並傳四十七。後漢和帝紀永元六年。

何並爲長陵令道不拾遺初邛成太后外家王氏貴而侍中王林卿通輕俠傾京師後坐法免賓客愈盛歸長陵上冢因留飲連日並遣之林卿素驕慙於賓客既去令騎奴還至寺門拔刀剝其建鼓。

師古曰諸官曹之所通呼爲寺建鼓一名植鼓建立也謂植木而旁懸鼓焉縣有此鼓者所以召集號令爲開閉之時。

注云風俗通曰寺嗣也。理事之吏嗣續於其中。  
不訾之軀蓋寬饒傳四十七。

用不訾之軀臨不測之險。

師古曰訾與貲同不訾者言無貲量可以比之貴重之極也。別注云訾量也。  
次骨。

杜周少言重遲而內深次骨。

李奇曰其用法深刻至骨。

睚眦杜欽傳三十

報睚眦怨。

師古曰睚音厓舉眼也。眦即眦字。謂目匡也。言舉目相忤者即報之也。一說睚音五懈反。眦音仕懈。

反睚眦。瞋目貌也。兩義並同。

柄臣朱雲傳三十七

師古曰柄臣執權之臣也。

堂皇胡建傳三十七

師古曰室無四壁曰皇。

伏質王訢傳三十六

王訢為被陽令。繡衣御史暴勝之使持斧逐捕盜賊。以軍興從事誅二千石以下。勝之過被陽。欲斬訢。

訢已解衣伏質。

師古曰質。鎡也。欲斬人皆伏於鎡上。

尙方斬馬劍朱雲傳

師古曰尙方少府之屬官也。作供御器物。故有斬馬劍。劍利可斬馬也。

軺傳。條對。梅福傳三十七。黃霸傳五十九。

梅福求假軺傳。詣行在所。條對急故。

師古曰。軺傳。小車之傳也。傳音張戀反。條對。一一條錄而對之。又注黃霸傳曰。凡言條者。一一而疏舉之。若木條然也。

九九。梅福傳。王哀傳三十四。

梅福書曰。齊桓之時。有以九九見者。桓公不逆。欲以致大也。

師古曰。九九。計數之書。若今算經九章五曹之輩。又應劭注王哀傳曰。桓公不納。其人曰。九九小術。而君不納之。況大於九九者乎。於是桓公設庭燎之禮而見之。居無幾。隰朋自遠而至。桓公遂以霸。魁柄。梅福傳。

梅福書云。漢興以來。社稷三危。呂、霍、上官。皆母后之家也。親親之道。全之爲右。當與之賢師良傅。教以忠孝之道。今迺尊寵其位。授以魁柄。

師古曰。務全安之。以爲上。魁柄。以斗爲喻也。斗身爲魁。

文石陛。赤墀。梅福傳。

梅福曰。願一登文石之陛。涉赤墀之塗。

應劭曰。以丹淹泥塗殿上。

法坐梅福傳

戶牖之法坐。

師古曰。戶牖之間。謂之辰。言負辰也。法坐。正坐也。猶言法宮法駕也。坐音才臥反。

珠璣東方朔傳三十五

東方朔云。宮人垂珠璣。

師古曰。璣。珠之不圓者。

印章數五武帝紀太初元年

色上黃。數用五。

張晏曰。漢據土德。土數五。故用五。謂印文也。若丞相曰丞相之印章。諸卿及守相印文。不足五字者。以足之。

篇武帝紀元光元年

詔賢良咸以書對。著之於篇。

師古曰。篇。謂竹簡也。

殿霍光傳三十八

鴟教鳴殿前樹上。

師古曰。鴉。惡聲之鳥也。古者宮室高大。則通呼爲殿。非止天子宮中。

臥廬。金日磾傳三十八。

金日磾小疾臥廬。

師古曰。殿中所止曰廬。

奏廁。日磾傳。

日磾奏廁心動。

師古曰。奏。向也。日磾方向廁而心動。

三璽。霍光傳。

霍光傳。昌邑王受皇帝信璽。行璽。大行前。

孟康曰。漢初有三璽。天子之璽。自佩。行璽。信璽。在符節臺。大行前。昭帝楸前也。韋昭曰。大行。不反之辭也。

行內。孔光傳五十一。

王莽白太后。帝幼少宜置師傅。徙孔光爲帝太傅。位四輔。給事中。領宿衛。供養行內。

師古曰。行內。行在所之內中。猶言禁中也。

靈壽杖。孔光傳。

賜太師孔光靈壽杖。

孟康曰：扶老杖也。服虔曰：靈壽，木名。師古曰：木似竹，有枝節，長不過八九尺，圍三四寸，自然有合杖，制不須削治也。

青蒲，史丹傳五十二。

史丹以親密臣得侍視疾，候上間獨寢時，丹直入臥內，頓首伏青蒲上，諫欲廢太子事。

服虔曰：青緣蒲席也。應劭曰：以青規地曰青蒲，自非皇后不得至此。孟康曰：以蒲青為席，用蔽地也。

師古曰：應說是也。

移病，朱博傳五十三。

朱博遷琅邪太守，齊部舒緩養名，博新視事，右曹掾史皆移病臥。

師古曰：言齊人之俗，其性遲緩，多自高大，以養名聲。右曹，上曹也。移病，謂移書言病也。

熒惑，淮南厲王傳十四。

淮南王廢法度，行邪辟，有詐僞心，以亂天下，熒惑百姓，背叛宗廟。

師古曰：熒，謂回繞也。

印鞞，陳遵傳六十二。

羞汗印鞞。

師古曰。此鞞謂印之紐也。

重足一迹。石顯傳六十三。

公卿以下。畏石顯。重足一迹。

師古曰。言不敢自寬縱。

擊劍。司馬相如傳二十七上。

師古曰。相如學擊劍。擊劍者。以劍遙擊而中之。非斬刺也。

筆札。司馬相如傳。

相如請爲天子遊獵之賦。上令尙書給筆札。

師古曰。札。木簡之薄小者也。

校獵。司馬相如傳。成帝紀元延二年。從胡客弋校獵。又注。

相如傳云。冬。天子校獵。

李奇曰。以五校兵出獵也。師古曰。李說非也。校獵者。以木相貫穿。總爲闌校。遮止禽獸而獵取之。說者或以爲周官校人掌田獵之馬。因云校獵。亦失其義。養馬稱校人者。謂以爲闌校以養馬耳。故呼爲闌也。事具周禮。非以獵馬故稱校人。

六玉虯。司馬相如傳。

相如賦曰。乘鏤象六玉蚪。

張揖曰。鏤象象路也。以象牙疏鏤其車輅。六玉蚪。謂駕六馬。以玉飾其鑣勒。有似玉蚪。龍子有角曰蚪。

扈從。四校司馬相如傳。

相如傳。扈從橫行。出乎四校之中。

文穎曰。凡五校。今言四者。一校中隨天子乘輿也。師古曰。此說又非也。四校者。闌校之四面也。言其跋扈從恣。而行出於校之四外也。

垂堂。司馬相如傳。

鄙彥曰。家桑千金。坐不垂堂。

張揖曰。畏欄瓦墮中人也。師古曰。垂堂者。近堂邊外。自恐墜墮耳。非畏欄瓦也。言富人之子則自愛深也。

行祖。臨江王榮傳二十三。

榮行。祖於江陵北門。

師古曰。祖者送行之祭。因饗飲也。黃帝之子顛祖。好遠遊而死於道。故後人以爲行神也。

白屋。吾丘壽王傳三十四。



三公有司。或由窮巷。起白屋。裂地而封。

師古曰。白屋。以白茅覆屋也。

羽林。

孤兒。宣帝紀神爵元年。

應劭曰。天有羽林。大將軍之星。林諭若林木之盛。羽。羽翼。鶖擊之意。故以名武官。如淳曰。百官表。取從軍死事者之子養羽林。官教以五兵。號曰羽林孤兒。少壯。令從軍。

猶豫。

高后紀八年。

師古曰。猶。獸名也。爾雅曰。猶如麇。善登木。此獸性多疑慮。常居山中。忽聞有聲。卽恐有人。且來害之。每豫上樹。久之無人。然後敢下。須臾又上。如此非一。故不決者。稱猶豫焉。一曰。隴西俗謂犬子爲猶。犬隨人行。每豫在前。待人不得。又來迎候。故云猶豫。譬音几。

子甯三年。

哀帝紀。

詔博士弟子。父母死。子甯三年。

師古曰。甯。謂處家持喪服。

除任子令。

哀帝紀。

應劭曰。任子令者。漢儀注。吏二千石以上。視事滿三年。得任同產若子一人爲郎。不以德選。故除之。師古曰。任者保也。

詔曰。諸侯王列侯公主吏二千石及豪富民。多畜奴婢田宅亡限。與民爭利。其議限列。有司條奏。王列侯得名田國中。列侯在長安。及公主名田縣道。關內侯吏民名田。皆無得過三十頃。

如淳曰。名田國中者。自其所食國中也。既收其租稅。又自得。有私田三十頃。名田縣道者。令甲諸侯在國。名田他縣。罰金二兩。今列侯有不之國者。雖遙食其國租稅。復自得田於他縣道。公主亦如之。不得過三十頃。

璇題揚雄傳五十七上

甘泉賦云。珍臺閒館。璇題玉英。

應劭曰。題。頭也。椽椽之頭。皆以玉飾。

井閭平慮揚雄傳

甘泉賦云。攢井閭與芟苦兮。

如淳曰。井閭。其葉隨時。政平則平。政不平則傾也。師古曰。如氏所說。自是平慮耳。此井閭。謂椽樹也。芟苦。草名也。芟。步末反。苦音括。

駮揚雄傳

甘泉賦云。崇丘陵之駮駮兮。

蘇林曰。駮音巨。我師古曰。駮。駮。高大狀也。

明堂。平帝紀元始四年。

安漢公奏立明堂辟雍。

應劭曰。明堂所以正四時。出教化。明堂上圓下方。八牕四達。布政之宮。在國之陽。上八牕法八風。四達法四時。九室法九州。十二重法十二月。三十六戶法三十六旬。七十二牖法七十二候。孝經曰。宗祀文王於明堂。以配上帝。上帝謂五時帝。太昊之屬。黃帝曰合宮。有虞曰總章。殷曰陽館。周曰明堂。辟雍者。象璧圓。雍之以水。象教化流行。

卞射武戲。哀帝紀贊。

哀帝雅性不好聲色。時覽卞射武戲。

蘇林曰。手搏爲卞。角力爲武戲也。晉灼曰。甘延壽試卞。爲期門。

待詔。漏刻。哀帝紀。李尋傳。天文志又注。

哀帝時。待詔夏賀良等建言。改元易號。增益漏刻。以百二十爲度。

應劭曰。謂以材技徵召。未有正官。故曰待詔。師古曰。舊漏晝夜共百刻。今增其二十。此本齊人甘忠可所造。今賀良等重言。遂施行之。後良等終以此伏誅。

# 兩漢博聞卷第二

黃屋左纛。

紀信乘王車。黃屋左纛。

李斐曰。天子車以黃繒爲蓋。纛。毛羽幢也。在乘輿車衡左方上注之。蔡邕曰。以犛牛尾爲之。如斗。或在駢頭。或在衡。師古曰。纛音毒。又徒到反。

關用傳。文帝紀十二年。

張晏曰。傳。信也。若今過所也。如淳曰。兩行書繒帛。分持其一。出入關。合之乃得過。謂之傳也。師古曰。古者或用檠。或用繒帛。檠者。刻木爲合符也。傳音張戀反。檠音啓。

巖廊。董仲舒傳二十六。

虞舜之時。游於巖廊之上。垂拱無爲。而天下太平。

晉灼曰。堂邊廡。巖廊。謂巖峻之廊也。

矯僞。賈誼傳十八。

誼上文帝疏曰。矯僞者。出幾十萬石粟。賦六百餘萬錢。乘傳而行郡國。

師古曰。詐爲文書。以出倉粟。近十萬石。又詐爲詔令。妄作賦斂甚多。又詐乘傳而行郡國。

詔板竇武傳

曹節召尙書官屬。脅以白刃。使作詔板。拜王甫爲黃門令。持節收尹勳。山冰。冰疑不受詔。甫格殺之。遂害勳。

腐刑景帝紀四年

如淳曰。腐。宮刑也。丈夫割勢。不能復生子。如腐木不生質。

銅竹符文帝紀二年

初與郡守爲銅虎符。竹使符。

應劭曰。銅虎符第一至第五。國家當發兵。遣使者至郡合符。符合乃聽受之。竹使符皆以竹箭五枚。長五寸。鐫刻篆書。第一至第五。張晏曰。符以代古之圭璋。從簡易也。師古曰。與郡守爲符者。謂各分其半。右留京師。左以與之。使音所吏反。

質疑陳遵傳六十二

張竦免官。歸長安。好事者從之。質疑問事。論道經書。師古曰。質。正也。

緣飾儒術公孫弘傳二十八

公孫弘每朝會議。開陳其端。使人主自擇。不肯面折庭爭。於是上察其行。慎厚。辯論有餘。習文法吏事。緣飾以儒術。

師古曰。緣飾者。譬之於衣加純緣者。

媒蘖。李陵傳二十四。

李陵敗。羣臣皆罪陵。上問司馬遷。盛言陵有國士之風。今舉事一不幸。全軀保妻子之臣。隨而媒蘖其短。孟康曰。媒。酒教。蘖。麴也。謂釀成其罪也。師古曰。齊人名麴餅曰媒。又司馬遷傳注。媒如媒娉之媒。蘖如麴蘖之蘖。

亭長。高帝紀。

師古曰。秦法十里一亭。亭長者。主亭之吏也。亭謂停留行旅宿食之館。

甄鈞。董仲舒傳二十六。鄒陽傳二十一。

仲舒云。猶泥之在鈞。唯甄者之所爲。金之在鎔。唯冶者之所鑄。

師古曰。甄。作瓦之人也。鈞。造瓦之法。其中旋轉者。

鄒陽曰。聖王制世御俗。獨化於陶鈞之上。

張晏曰。陶家名模。下圓轉者爲鈞。蓋取其周回調鈞耳。言聖王制御天下。亦猶陶人轉鈞。

戲下。灌夫傳二十二。

灌夫曰。願取吳王若將軍頭以報父仇。於是募軍中壯士。願從數十人。及出壁門。莫敢前。獨兩人及從奴十餘騎。馳入吳軍。至戲下。以此名聞天下。

師古曰：戲，大將之旗也。讀與麾同。又音許宜反。又項籍傳注曰：漢書通以戲爲旌麾及指麾字。稱制，高后紀。

高后臨朝稱制。

師古曰：天子之言，一曰制書，二曰詔書。制書者，謂爲制度之命也。

叢臺，高后紀。

趙王宮叢臺災。

師古曰：連聚非一故名叢臺。六國時趙王故臺也。

邸舍，文帝紀。

代王至邸。

師古曰：郡國朝宿之舍。在京師者，率名邸。邸，至也。言所歸至也。

謗木，文帝紀。

詔誹謗之木。

服虔曰：堯作之。橋梁邊板柱頭也。應劭曰：橋梁邊板，所以書政治之愆失也。至秦去之，今乃復施也。

芝房，武帝紀。

元封二年詔曰：甘泉宮內中產芝，九莖連葉，上帝博臨，不異下房，賜朕宏休。

如淳曰。瑞應圖。王者敬事耆老。不失舊故。則芝草生。師古曰。內中。謂後庭之室也。故云不異下房。言天廣臨。不以下房爲幽側。而隔異之。賜以此芝。是大美也。故作芝房之歌。

龍淵宮。淬劍。武帝紀。

元光三年。河水決濮陽。汜郡十六。發卒十萬。救決河。起龍淵宮。

服虔曰。宮在長安西。作銅飛龍。故以冠名也。孟康曰。在西平界。其水可用淬刀劍。特堅利。古龍淵之劍。取於此水。

程量。東方朔傳三十五。

武帝旣招英俊。程其器能。用之如不及。

師古曰。程。謂量計之也。

疾置。劉屈氂傳三十六。

江充發兵入丞相府。是時上避暑甘泉宮。丞相長史乘疾置以聞。

師古曰。置。謂所置驛也。

伐閱。車千秋傳五十六。

車千秋無他材。能術學。久無伐閱功勞。

師古曰。伐。積功也。閱。經歷也。



椒房千秋傳

師古曰椒房殿名皇后所居以椒和泥塗壁取其溫而芳也。

山郎楊惲傳三十六

楊惲爲中郎將故事令郎出錢市財用給文書迺得出名曰山郎。

張晏曰山財用之所出故名取焉。

橐街陳湯傳四十

甘延壽陳湯上疏曰斬郅支首及名王以下宜縣頭橐街蠻夷邸間。

師古曰橐街街名蠻夷邸在此街也邸若今鴻臚客館也。

橫草之功終軍傳三十四

軍自請曰軍無橫草之功得列宿衛。

師古曰言行草中使草偃臥故云橫草也。

鸞旗賈捐之傳三十四

鸞旗在前屬車在後。

師古曰鸞旗編以羽毛列繫幢旁載於車上大駕出則陳於道而先行屬車相連屬而陳於後也。

空拳李陵傳二十四

李陵轉鬪千里，矢盡道窮，士張空拳。

文穎曰：拳，弓弩拳也。師古曰：拳字與秦同。晉丘權反。又司馬遷傳：張空拳。注：李奇曰：拳，弩弓也。師古曰：讀者乃以拳擊之拳。大謬。拳則屈指，不當言張。陵時矢盡，故張弩之空弓，非是手拳也。

臨遣。元帝紀初元元年。

詔曰：朕憂蒸庶之失業，臨遣光祿大夫哀等十二人，循行天下。

應劭曰：自臨而約勅，乃遣之。

籍甚。陸賈傳十三。

陸賈爲陳平畫計，與太尉絳侯深相結。呂氏謀益壞，陳平乃以奴婢百人、車馬五十乘、錢五百萬遺賈，爲食飲費。賈以此游漢廷公卿間，名聲籍甚。

孟康曰：言狼籍甚盛。

長榆塞。伍被傳十五。

伍被諫淮南王曰：今漢廣長榆，開朔方匈奴折傷，雖未及古太平時，然猶爲治。

如淳曰：廣，謂斥大之也。長榆，塞名。王恢所謂樹榆以爲塞者也。師古曰：長榆在朔方。卽衛青傳所云榆谿舊塞是也。或謂之榆中。

警蹙。梁孝王傳十七。

梁孝王得賜天子旌旗。從千乘萬騎。出稱警。入言趨。

師古曰。警者戒肅也。趨止行人也。言出入者互文耳。出亦有趨。漢儀注。皇帝輦動。左右侍帷幄者稱警。出殿則傳蹕。止人清道也。

枝梧。項籍傳一。

項羽晨朝上將軍宋義。卽其帳中斬義頭。出令軍中曰。宋義與齊謀反楚。楚王陰令籍誅之。諸將讐報莫敢枝梧。

祭酒。伍被傳。  
如淳曰。梧音悟。枝梧猶枝扞也。臣瓚曰。小柱爲枝。邪柱爲梧。今屋梧邪柱是也。

伍被曰。吳王賜號爲劉氏祭酒。曼几杖而不嚳。

如淳曰。祭祠時唯尊長者以酒沃鬯。

廉隅。賈誼傳十八。

賈誼曰。人主之尊譬如堂。羣臣如陛。衆庶如地。故陸九級。上廉遠地則堂高。陸亡級。廉近地則堂卑。高者難攀。卑者易陵。理勢然也。故古者聖王制爲等列。內有公卿大夫士。外有公侯伯子男。然後有官師。小吏延及庶人。等級分明。而天子加焉。故其尊不可及也。

師古曰。級等也。廉側隅。官師一官之長。

轅門。項籍傳。

楚已破秦軍。項羽見諸侯將，入轅門，膝行而前，莫敢仰視。

張晏曰：軍行以車爲陳，轅相向爲門，故曰轅門。師古曰：周禮掌舍，王行則設車宮轅門也。

廝養。張耳傳。

蘇林曰：廝，取薪者也。養，養人者也。廝，晉斯。

相駁。薛宣傳五十二。

薛宣後母死，弟修去官持服，宣謂修：三年服少能行之者，兄弟相駁不可。修遂竟服，繇是兄弟不和。

師古曰：駁者，執意不同，猶如色之間雜。

秋豪。高帝紀。

沛公入關，秋豪無所敢取。

文穎曰：豪，秋乃成好，舉盛而言也。師古曰：豪成之時，端極纖細，適足諭小，非言其盛。

犬牙。

高帝王子弟，地犬牙相制，所謂盤石之宗也。

師古曰：犬牙，言地形如犬之牙交相入也。

騰乘。文帝紀。

代王令宋昌驂乘。

師古曰。乘車之法。尊者居左。御者居中。又有一人處車之右。以備傾側。是以戎事則稱車右。其餘則曰驂乘。驂者三也。蓋取三人爲名義耳。

進善旌。文帝紀。

二年詔曰。古之治天下。朝有進善之旌。

應劭曰。旌。幡也。堯設之五達之道。令民進善也。如淳曰。欲有進者。立於旌下言之。

長星。彗。文帝紀。

八年有長星出於東方。

文穎曰。彗。彗。長三星。其占略同。然其形象小異。彗星光芒短。其光四出。蓬蓬。彗星也。彗星參參。長如掃。彗。長星。光芒有一直指。或竟天。或十丈。或三丈。或二丈。無常也。大法。彗星多爲除舊布新。火災。

長星多爲兵革事。

豎儒。高帝紀三年。

師古曰。言其賤劣無智。若童豎也。

出其右。高帝紀九年。

賢趙臣田叔、孟舒等十人。召見與語。漢廷臣無能出其右者。

師古曰古者以右爲尊。言材用無能過之者。故云不出其右也。  
湯沐邑。高帝紀十二年。

其以沛爲朕湯沐邑。

師古曰凡言湯沐邑者。謂以其賦稅供湯沐之具也。

編戶。高帝紀。

諸將故與帝爲編戶民。北面爲臣。心常鞅鞅。

師古曰編戶者。列次名籍也。

章程。帶厲。鐵契。規摹。高帝紀。

初高祖不修文學。而性明達。好謀能聽。自監門戍卒。見之如舊。初順民心。作三章之約。天下既定。命蕭何次律令。韓信申軍法。張蒼定章程。叔孫通制禮儀。陸賈造新語。又與功臣剖符作誓。丹書鐵契。金匱石室。藏之宗廟。雖日不暇給。規摹宏遠矣。

如淳曰章程。歷數之章術也。程。權衡丈尺斗斛之平法也。師古曰程。法式也。剖符作誓者。如淳曰。謂功臣表誓。使河如帶。太山若厲。國乃滅絕。又功臣表注。應劭曰。封爵之誓。國家欲使功臣傳祚無窮也。帶。衣帶也。厲。砥厲石也。河當何時如衣帶。山當何時如厲石。言如帶厲。國猶永存。以及後世子孫也。金匱石室者。如淳曰。金匱猶金滕也。師古曰。以金爲匱。以石爲室。重緘封之。保慎之義。規摹者。鄧展

曰若畫工規摸物之摹。韋昭曰。正員之器曰規。摹者如畫工未施采事摹之矣。師古曰。取喻規摹。謂立制垂範也。給足也。日不暇足。言衆事繁多。常汲汲也。

百二。建瓴。高帝紀六年。

田肯賀上曰。甚善。陛下得韓信。又治秦中。秦形勝之國也。帶河阻山。縣隔千里。持戟百萬。秦得百二焉。地勢便利。以其下兵於諸侯。譬猶居屋之上。建瓴水也。

蘇林曰。百二得百中之二。二萬人也。秦地險固。二萬人足當諸侯百萬人也。如淳曰。瓴。盛水瓶也。居高屋之上。而幡瓶水。言其向下之勢易也。蘇林曰。瓴。讀曰鈴。建音居。偃反。

計偕。武帝紀元光五年。

徵吏民有明當世之務。習先聖之術者。縣次續食。令與計偕。

師古曰。計者。上計簿使也。郡國每歲遣詣京師上之。偕者。俱也。今所徵之人。與上計者俱來。而縣次給之食。

角抵。武帝紀元封三年。

作角抵戲。

文穎曰。名此樂爲角抵者。兩兩相當角力。角技藝。射御。故名角抵。蓋雜技樂也。巴俞戲。魚龍蔓延之屬也。後漢更名平樂觀。

池籩宣帝紀

地節三年詔池籩未御幸者假與貧民。

蘇林曰析木以繩縣連禁籩使人不得往來律名爲籩應劭曰池者陂池也籩者禁苑也。

飲飛宣帝紀

神爵元年西羌反應募飲飛射士。

服虔曰周時度江越人在船下負船將覆之飲飛入水殺之漢因以材力名官如淳曰呂氏春秋荆有茲非得寶劍於干將度江中流兩蛟繞舟茲非拔寶劍赴江刺兩蛟殺之荆王聞之仕以執珪後世以爲勇力之官茲飲音相近師古曰取古勇力人以名官熊渠之類是也亦因取其便利輕疾若飛故號飲飛。

一封軺傳平帝紀

元始五年徵天下通知逸經古記天文歷算鍾律小學史篇方術本草及五經論語孝經爾雅教授者在所爲駕一封軺傳遣詣京師至者數千人。

如淳曰律諸當乘傳及發駕置傳者皆持尺五寸木傳信封以御史大夫印章其乘傳參封之參三也。有期會累封兩端端各兩封凡四封也。乘置馳傳五封之兩端各二中央一也。軺傳兩馬再封之一馬一封也。師古曰以一馬駕軺車而乘傳傳音張戀反。



元服。昭帝紀。

元鳳四年。帝加元服。

師古曰。元首也。冠者首之所著。故曰元服。其下汲黯傳序云。上正元服。是知謂冠爲元服。

昆蟲。成帝紀。

建始三年詔曰。草木昆蟲。咸得其所。

師古曰。昆衆也。昆蟲言衆蟲也。又許慎說文云。二蟲爲蝨。讀與昆同。謂蟲之總名。兩義並通。虫音許。

尾反。

璽符節。高帝紀元年。

秦王子嬰封皇帝璽符節。降枳道旁。

應劭曰。璽。信也。古者尊卑共之。左傳。襄公在楚。季武子使公冶問璽書。追而與之。秦漢尊者以爲信。

羣下乃避之。師古曰。符謂諸所合符以爲契者也。節以毛爲之。上下相重。取象竹節。因以爲名。將命者持之以爲信。

按堵。高帝紀元年。

高祖入關。除去秦法。吏民皆按堵如故。

應劭曰。按。按次第堵。牆堵也。師古曰。言不遷動也。

按堵。高祖入關。除去秦法。吏民皆按堵如故。

鉤距。趙廣漢傳四十六。

趙廣漢精於吏職。尤善爲鉤距。以得事情。

蘇林曰。鉤得其情。使不得去也。晉灼曰。鉤。致也。距。閉也。使對者無疑。若不（原缺）。

朔陳泰階六符。

孟康曰。泰階。三台也。每台二星。凡六星。符。六星之符驗也。應劭曰。黃帝泰階六符。經曰。太階者。天之三階也。上階爲天子。中階爲諸侯。公卿大夫。下階爲士。庶人。上階。上星爲男主。下星爲女主。中階。上星爲諸侯。三公。下星爲卿大夫。下階。上星爲元士。下星爲庶人。三階平。則陰陽和。風雨時。社稷神祇咸獲其宜。天下大安。是爲太平。三階不平。則五神乏祀。日有食之。水潤不浸。稼穡不成。冬雷夏霜。百姓不寧。故治道傾。天子行暴令。好興甲兵。修宮榭。廣苑囿。則上階爲之奄。奄。䟽闊也。以孝武皆有此事。故朔爲陳之。又藝文志注。李奇曰。三台。謂泰階兩兩成體。三台故六。觀色以知吉凶。故曰六符。

賈區。胡建傳三十七。

胡建爲軍正丞。時監軍御史爲姦。穿北軍壘垣。以爲賈區。建斬之以奏。

師古曰。坐賈曰賈。爲賣物之區也。區者。小室之名。若今小庵屋之類耳。故衛士之屋。謂之區廬。宿衛宮外士。稱爲區士也。

投石拔距。甘延壽傳四十。

甘延壽少以良家子善騎射爲羽林投石拔距絕於等倫嘗超踰羽林亭樓

應劭曰投石以石投人也師古曰拔距者有人連坐相把據地距以爲堅而能拔取之皆言其有手掣之力超踰亭樓又言趨捷耳今人猶有拔瓜之戲蓋拔距之遺法

尸祿鮑宣傳四十二

師古曰尸主也不愛其職但主食祿而已

漿酒霍肉蒼頭廬兒鮑宣傳

鮑宣諫曰陛下奈何獨私養外親與幸臣董賢多賞賜以大萬數使奴從賓客漿酒霍肉蒼頭廬兒皆用致富非天意也

劉德曰視酒如漿視肉如霍也師古曰霍豆葉也貧人茹之也孟康曰黎民黔首黎黔皆黑也下民陰類故以黑爲號漢名奴爲蒼頭非純黑以別於良人也諸給殿中者所居爲廬蒼頭侍從因呼爲廬兒臣瓚曰漢儀注官奴給書計從侍中已下爲蒼頭青幘

衣敝履空鮑宣傳

唐尊衣敝履空以瓦器飲食又以歷遺公卿被虛僞名

服虔曰履猶屨也師古曰衣音於既反著敝衣躡空履也空穿也歷遺公卿者服虔曰以瓦器遺之縣力 嚴助傳三十四

淮南王曰。越人。縣力薄材。

師古曰。縣。弱也。言其柔弱如縣。

遲明。高帝紀

沛公乃夜引軍從他道還。偃旗幟。遲明。圍宛城三匝。

師古曰。言圍城事畢。然後天明。明遲於是。故曰遲明。變爲去聲。音丈二反。漢書諸言遲某事者。義類此。史記遲字作邈。亦徐緩之意也。音黎。

閩中。高帝紀

師古曰。閩。越。今泉州建安。是其地也。其人本蛇種。故其字從虫。虫許尾反。

亡賴。高帝紀九年

高祖奉玉卮。爲太上皇壽。曰。始大人常以臣亡賴。不能治產業。不如仲力。

晉灼曰。許慎云。賴。利也。無利入於家也。或曰。江淮之間。謂小兒多詐。狡獪爲無賴。獪。音工外反。

逮捕。高帝紀九年

貫高等謀逆。發覺。逮捕高等。

師古曰。逮捕。謂事相連及者。皆捕之也。一曰。在道守禁。相屬不絕。若今之傳送囚耳。

三族。高帝紀九年

如淳曰。父族、母族、妻族也。

羽檄。高帝紀十年。

羽檄徵天下兵。

師古曰。檄者以木簡爲書。長尺二寸。用檄召也。其有急事。則加以烏羽插之。示速疾也。魏武奏事云。今邊有警。輒露檄插羽。檄音胡歷反。

權酤。武帝紀。

天漢三年。初權酒酤。

韋昭曰。以木渡水曰權。謂禁民酤釀。獨官開置。如道路設木爲權。獨取利也。師古曰。權者。步渡橋。爾雅謂之石杠。今之略約是也。禁閉其事。總利入官。而下無由以得。有若渡水之權。因立名焉。酤音工。護反。約音酌。

阡陌。成帝紀。陽朔四年。

師古曰。阡陌。田間道也。南北曰阡。東西曰陌。蓋秦時商鞅所開也。

幸酒。成帝紀。

成帝爲太子。其後幸酒。樂燕樂。

晉灼曰。幸酒。好酒也。師古曰。論語云。樂燕樂。燕讀如本字。上音五孝反。下音來各反。

傅婢。王吉傳四十二。

師古曰。凡言傅婢者。謂傅相其衣服衽席之事。一說。傅曰附。謂近幸也。財取。寶嬰傳二十二。

寶嬰爲大將軍。賜金千斤。陳廊廡下。軍吏過。輒令財取爲用。金無入家者。

師古曰。財與裁同。謂裁量而用之。

闔郡。武帝紀元朔元年。

今或至闔郡而不薦一人。

師古曰。闔。閉也。總一郡之中。故云闔郡。

黃鶴下太液。昭帝紀始元元年。

黃鶴下建章宮太液池中。

師古曰。黃鶴。大鳥也。一舉千里者。非白鶴也。太液池者。言津潤所及廣也。

弄田。昭帝紀始元元年。

上耕于鉤盾弄田。

師古曰。謂宴游之田。天子所戲弄耳。非謂昭帝年幼創有此名。

飾廚傳。宣帝紀元康二年。

詔吏務平法。或擅興繇役。飾廚傳。稱過使客。越法踰職。以取名譽。

韋昭曰。廚謂飲食。傳謂傳舍。師古曰。使人及賓客來者。稱其意而遣之。令過去也。

城旦舂。鬼薪。白粲。惠帝紀

當爲城旦舂者。皆耐爲鬼薪。白粲。

應劭曰。城旦者。旦起行治城。舂者。婦人不豫外徭。但舂作米。皆四歲刑也。今皆就鬼薪。白粲。取薪給

宗廟爲鬼薪。坐擇米使正白爲白粲。皆三歲刑也。漢書音義曰。城旦。輕刑之名也。後漢韓棧傳注。晝

日司寇。夜暮築長城。曰城旦。

酎金。景帝紀元年

高廟酎金。

張晏曰。正月旦作酒。八月成。名曰酎。酎之言。純也。至武帝時。因八月嘗酎。會諸侯廟中。出助祭。所謂

酎金也。師古曰。酎三重釀醇酒也。味厚。故以薦宗廟。酎音直救反。

方內。谷永傳五十五。

谷永對策云。方內之治亂。在陛下所執。

師古曰。方內。四方之內也。

陸海。東方朔三十五。

東方朔曰。漢興。去三河之地。止灊滻以西。都涇渭之南。此所謂天下陸海之地。

師古曰。高平曰陸。關中地高。故稱陸耳。海者。萬物所出。言關中山川物產饒富。是以謂之陸海。

不根持論。嚴助傳三十四。

朔。臯。不根持論。上頗俳優畜之。

師古曰。論議委隨。不能持正。如樹木之無根柢也。

漏澤。吾丘壽王傳三十四。

吾丘壽王對寶鼎事曰。臣聞周德始乎后稷。長於公劉。大於太王。成於文武。顯於周公。德澤上昭天下。漏泉。

師古曰。昭。明也。漏。言潤澤下霑。如屋之漏。

棄繻。終軍傳三十四下。

終軍入關。關吏予軍繻。

蘇林曰。繻。帛邊也。舊關出入皆以傳。傳煩。因裂繻頭。合以爲符信也。

狼戾。嚴助傳。

淮南王上書曰。閩越王狼戾不仁。

師古曰。狼性貪戾。凡言狼戾者。謂貪而戾。



鼓鑄終軍傳

鼓鑄鹽鐵

如淳曰鑄銅鐵扇熾火謂之鼓

五鼎主父偃傳三十四

主父偃曰生不五鼎食死則五鼎烹

張晏曰五鼎食牛羊豕魚麋也諸侯五卿大夫三

綠幘傳東方朔傳

館陶公主自引董君綠幘傳曰館陶公主胞人

應劭曰宰人服也韋昭曰鞬形如射鞬以縛左右手於事便也師古曰綠幘賤人服也傳著也鞬即

今之臂鞬也傳讀曰附胞與庖同

抗疏揚雄傳五十七下

師古曰抗舉也謂上之也疏者疏條其事而言之

徇地酈食其傳十三

陳項起諸將徇地過高陽

師古曰徇亦略也

傳舍。酈食其傳。

沛公至高陽傳舍。

師古曰。傳舍者。人所止息。前人已去。後人復來。轉相傳也。一音張戀反。謂傳置之舍也。其義兩通。他皆類此。

揜擊。郊祀志五上。

五利將軍變大。數月佩六印。貴震天下。而海上燕齊之間。莫不揜擊。而自言有禁方。能神仙矣。師古曰。揜。捉持也。擊。古手腕字。揜音扃。

羽衣。郊祀志。

五利將軍衣羽衣。立白茅。上受印。以視不臣也。

師古曰。羽衣。以鳥羽爲衣。取其神仙飛翔之意。

六飛。袁盎傳十九。

上從霸陵。欲西馳下峻阪。袁盎攬轡諫曰。陛下騁六飛。馳不測。

師古曰。攬。與擊同。如淳曰。六馬之疾若飛也。

隋直。晁錯傳十九。

晁錯爲人。隋直刻深。

師古曰。隋與峭同。峻謂峻陜也。音千笑反。

虎落。晁錯傳。

鄭氏曰。虎落者。外蕃也。若今時竹虎也。師古曰。虎落。以竹篾相連遮落也。

還踵。晁錯傳。

晁錯言。勸以厚賞。威以重罰。則死不還踵矣。

師古曰。還讀曰旋。旋踵。迴旋其足也。

調兵食。晁錯傳。

吳楚七國俱反。上方與錯調兵食。

師古曰。調謂計發之也。音徒釣反。

十年不調。張釋之傳二十。

張釋之為騎郎。事文帝。十年不得調。亡所知名。

師古曰。調。選也。音徒釣反。

倚瑟。張釋之傳。

慎夫人鼓瑟。上自倚瑟而歌。

李奇曰。聲氣依倚瑟也。師古曰。倚瑟。即今之以歌合曲也。倚音於綺反。

腐儒。黥布傳四。後漢李固傳。

師古曰。腐者爛敗。言無所堪任。注云。腐生者。猶言腐儒也。

武帳。汲黯傳二十。

上嘗坐武帳。汲黯前奏事。上不冠。望見黯。避帷中。

孟康曰。今御武帳。置兵闌五兵於帳中也。

舞文。汲黯傳。

汲黯曰。張湯好興事。舞文法。

如淳曰。舞猶弄也。

巧詆。汲黯傳。

刀筆之吏。深文巧詆。

師古曰。詆毀辱也。又誣也。

尺籍伍符。馮唐傳二十。

馮唐曰。夫士卒盡家人子。起田中從軍。安知尺籍伍符。

李奇曰。尺籍。所以書軍令。伍符。軍士五五相保之符信也。如淳曰。漢軍法曰。吏卒斬首。以尺籍書下。

縣移郡。令人故行不行。奪勞二歲。伍符亦什伍之符。要節度也。師古曰。家人子。謂庶人之家子也。

蹶張。申屠嘉傳十二。

申屠嘉以材官蹶張。從高帝擊項籍。

如淳曰。材官之多力。能腳踏疆弩張之。故曰蹶張。師古曰。今之弩以手張者曰擘張。以足踢者曰蹶張。音厥。擘音布麥反。

一襲。叔孫通傳十三。

賜叔孫通衣一襲。

原廟。師古曰。上下皆具也。今人呼爲一副也。又昭帝紀。賜衣被一襲。注曰。一襲一稱也。叔孫通傳十三。

惠帝詔有司立原廟。

師古曰。原。重也。先以有廟。今更立之。故曰重也。謂高帝廟。元帝建昭五年。復太上皇寢廟園原廟。

械器。宣帝贊八。  
文穎曰。高祖已自有廟。在長安城中。惠帝更於渭北作廟。謂之原廟。爾雅曰。原者。再。再作廟也。

孩提。賈誼傳十八。  
師古曰。械者。器之總名也。一曰。有盛爲械。無盛爲器。

賈誼陳教太子事云孩提有識。

師古曰孩小兒也提謂提撕也。

物故。蘇武傳。

師古曰言同於鬼物而故也。一說不欲斥言但云其所服用之物皆已故耳。

三秦。高帝紀元年。

應劭曰章邯爲雍王司馬欣爲塞王董翳爲翟王分王秦地故曰三秦。

爲壽。高帝紀。

項莊入爲壽。

師古曰凡言爲壽謂進爵於尊者而獻無疆之壽。

荜馬犍僮。西南夷傳六十五。

巴蜀商賈取其荜馬犍僮旄牛以此巴蜀殷富。

地理志注師古曰言滇犍之地多出僮隸邛荂之地出馬及旄牛滇音顛犍音蒲北反荂音材各反。

西南夷有荂都亦有君長。

百越。地理志八下。

粵地牽牛婺女之分野也。今之蒼梧鬱林合浦交阯九真南海日南皆粵分也。其君禹後帝少康之庶

子云封於會稽。

師古曰。越之爲號。其來尙矣。少康封庶子以主禹祠。君於越地耳。故此志云。其君禹後。豈獨百越之人皆禹苗裔。

壬人。元帝紀永光元年。

詔曰。朕之不明。亡以知賢也。是故壬人在位。而吉士雍蔽。服虔曰。壬人。佞人也。師古曰。吉善也。

汶上明堂。郊祀志五下。

武帝封泰山。泰山東北趾。古時有明堂處。處險不敞。上欲治明堂。奉高旁未曉其制度。濟南人公玉帶上黃帝時明堂圖。於是上令奉高作明堂汶上。如帶圖。

訾算得官。景帝紀後二年。

詔曰。今訾算十以上。迺得官。廉士算不必衆。有市籍不得官。無訾又不得官。朕甚愍之。訾算四得官。亡令廉士久失職。貪夫長利。

應劭曰。古者限訾十算。乃得爲吏。十算。十萬也。

姬妾。文帝紀。

如淳曰。姬者。衆妾之總稱。漢官儀曰。姬妾數百。外戚傳曰。幸姬戚夫人。師古曰。姬者。本周之姓。貴於

衆國之女。所以婦人美號。皆稱姬焉。

辟彊。文帝紀二年。

趙王遂弟名辟彊。

師古曰。辟彊言辟禦彊梁者。亦猶辟兵辟非耳。

白公。溝洫志九。

大始二年。趙中大夫白公復奏穿渠。引涇水。首起谷口。尾入櫟陽。  
鄭氏曰。白姓。師古曰。公相呼尊長之稱耳。



## 兩漢博聞卷第三

更有三品。昭帝紀元鳳四年。

如淳曰。更有三品。有卒更。有踐更。有過更。古者正卒無常人。皆當迭爲之。一月一更。是爲卒更。貧者欲得顧更錢者。次直者出錢顧之。月二千。是謂踐更也。天下之人。皆直戍邊三日。亦名爲更。律所謂繇戍也。雖丞相子亦在戍邊之調。不可人人自行三日戍。又行者當自戍三日。不可往便還。因使住一歲一更。諸不行者。出錢三百入官。官以給戍者。是爲過更也。律說卒踐更者。居也。居更縣中五月乃更也。後從尉律。卒踐更一月。休十一月也。

志曰。月爲更卒。已復爲正。一歲屯戍。一歲力役。三十倍於古。此漢初因秦法而行之也。後遂改易。有謫乃戍邊一歲耳。更音工衡反。又食貨志注。師古曰。更卒。謂給郡縣一月而更者也。正卒。謂給中都官者也。率計今人一歲之中屯戍及力役之事。三十倍多於古也。

暴室。宣帝紀。後漢桓帝鄧皇后傳。

掖庭令張賀嘗事戾太子。思顧舊恩。哀曾孫宣帝。爲取暴室。嗇夫許廣漢女。

師古曰。暴室者。掖庭主織作染練之署。故謂之暴室。取暴曬爲名耳。或云。薄室者。薄亦暴也。今俗語亦云薄曬。蓋暴室職務既多。因爲置獄主治其罪人。故往往云暴室獄耳。然本非獄名。嗇夫者。暴室

屬官亦猶縣鄉之畜夫也

注云漢官儀曰暴室主宮中婦人疾病者其皇后貴人亦就此室也

中二千石宣帝紀神爵四年

黃霸以治行尤異秩中二千石

師古曰霸舊已二千矣今增爲中二千石以寵異之此與地節三年增膠東相王成秩其事同耳漢制秩二千石者一歲得一千四百四十石實不滿二千石也其云中二千石者一歲得二千一百六十石舉成數言之故曰中二千石者滿也

佐酒高帝紀十二年

上置酒沛宮悉召故人父老子弟佐酒

應劭曰助行酒

張飲高帝紀

上過沛留止張飲三日

張晏曰張帷帳也張音竹亮反

馱驢鄒陽傳二十一

蘇秦相燕人惡之燕王燕王按劍而怒食以馱驢

孟康曰。馱。馱駿馬也。蘇秦雖有讒謗。而更食以珍奇之味。

擁彗。高帝紀六年。

太公擁彗迎門卻行。

李奇曰。如今卒持帚也。師古曰。彗者所以埽也。卻退而行也。彗音似歲反。

復道。高帝紀。

上居南宮。從復道上。

如淳曰。復音復。上下有道。故謂之復。

乘傳。高帝紀五年。

田橫乘傳詣維陽。未至三十里。自殺。

如淳曰。律。四馬高足爲置傳。四馬中足爲馳傳。四馬下足爲乘傳。一馬二馬爲軺傳。急者乘一乘傳。師古曰。傳者。若今之驛。古者以車。謂之傳車。其後又單置馬。謂之驛騎。傳音張戀反。

舍人。

蘇林曰。藺相如爲宦者。令舍人。韓信爲侯。亦有舍人。師古曰。舍人。親近左右之通稱也。後遂以爲私屬官號。又曹參傳。注曰。舍人猶家人也。一說私屬官。主家事者也。

宿兵。韓安國傳二十二。

韓安國曰。孝文皇帝嘗壹擁天下之精兵。聚之廣武常谿。然終無尺寸之功。孝文寤於兵之不可宿。故復合和親之約。

師古曰。宿。久留也。

柱國。

應劭曰。柱國。上卿官也。若相國矣。

詭辯。趙王彭祖傳二十三。

趙王彭祖爲人心刻深。好持律詭辯以中人。

師古曰。詭辯。違道之辯也。中。傷也。

權會。趙王彭祖傳。

趙王擅權。使使卽縣爲賈人權會。

韋昭曰。平會。兩家買賣之賈者。權者。禁他家。獨王家得爲之也。師古曰。卽就也。就。諸縣而專權。賈人之會。若今和市矣。會。音工反。

一子不事。賈山傳二十一。

賈山曰。陛下卽位。振貧民。禮高年。九十者。一子不事。八十者。二算不事。

師古曰。一子不事。蠲其賦役。二算不事。免二口之算賦也。

合從。項籍傳贊一。

過秦論曰。諸侯恐懼。會盟而謀弱秦。不愛珍器重寶肥饒之地。以致天下之士。合從締交。相與爲一。師古曰。締結也。從。子容反。締大系反。

約從。從橫。項籍傳贊。後漢馮衍傳。

過秦論曰。約從離橫。

師古曰。約誓爲從。欲以分離爲橫。橫謂秦也。

馮衍顯志賦云。毒從橫之敗俗。

注云。毒恨也。關東爲從。關西爲橫。蘇秦事鬼谷先生。爲從說。說關東六國爲從。親以畔秦。會於涇水之上。剗白馬而盟。張儀與蘇秦同師。爲關西橫說。說關西六國合事秦。皆尙誣詐。不遵道德。

景從。項籍傳贊。

天下雲合。嚮應。贏糧而景從。

師古曰。嚮讀曰響。如響之應聲。贏。擔也。景從。言如影之隨形也。

頭會箕斂。張耳傳二。

頭會箕斂。以供軍費。

服虔曰。吏到其家。人人頭數出穀。以箕斂之。

同產子。平帝紀元始元年。

平帝即位。令諸侯王公列侯關內侯。亡子而有孫。若子同產子者。皆得以爲嗣。

師古曰。子同產子者。謂養昆弟之子爲子者。

縣官。東平王字傳五十。

東平王字曰。今縣官年少。

張晏曰。不敢指斥成帝。謂之縣官也。

渙汗。元帝永光四年。後漢胡廣傳。

詔曰。政令多還。民心未得。

李奇曰。還。反也。易曰。渙汗其大號。言王者發號施令。如汗出不可復反。

胡廣曰。政令如汗。往而不反。

郵亭。薛宣傳五十三。

郵亭不修。

師古曰。郵。行書之舍。亦如今之驛。及行道館舍也。

左道。王商傳五十二。

執左道以亂政。

師古曰。左道、僻左之道。謂不正。

相訐。王商傳。

父子相訐。

師古曰。訐、告斥其罪也。

鞮鼓。史丹傳五十二。

師古曰。鞮本騎上之鼓。

流庸。昭帝紀。

始元四年詔曰。比歲不登。民匱於食。流庸未盡還。

師古曰。流庸。謂去其本鄉而行爲人庸作。

傳馬。昭帝紀。

張晏曰。驛馬也。

馬口錢。昭帝紀。

元鳳二年詔曰。其令郡國毋斂今年馬口錢。

文穎曰。往時有馬口出斂錢。今省。如淳曰。所謂租及六畜也。

緡錢。武帝紀元狩四年。

李斐曰緡絲也。以貫錢也。一貫千錢。出算二十也。師古曰。謂有儲積錢者。計其緡貫而稅之。緡。武巾反。

計帳。武帝紀。

武帝元封五年。明堂朝諸侯王列侯。受郡國計。

師古曰。計。若今之諸州計帳也。

占租。昭帝紀。

始元六年。令民得以律占租。

如淳曰。律諸當占租者。家長身各以其物占。占不以實。家長不身自書。皆罰金二斤。沒入所不自占物。及賈錢縣官也。師古曰。占。謂自隱度其實。定其辭也。占。章贍反。又言占名數。其義並同。今猶謂獄訟之辨曰占。皆其意也。蓋武帝時。賦斂繁多。律外而取。今始復舊。

倉廩。昭帝紀。

師古曰。倉。新穀所藏也。廩。穀所振入也。

長楊五柞。宣帝紀。

武帝疾。往來長楊五柞宮。

師古曰。長楊五柞二宮。並在盤屋。皆以樹名也。



橋虔吏。武帝紀。

師古曰：橋與矯同。其字從手，矯，託也。虔，固也。妄託上命，而堅固為邪惡也。

侵漁。宣帝紀。

侵漁百姓。

師古曰：漁者，若言漁獵也。

絕幕。武帝紀元朔六年。

衛青復將六將軍絕幕。

應劭曰：幕，沙幕，匈奴之南界也。臣瓚曰：沙土曰幕。直渡曰絕。師古曰：幕者，即今之突厥中磧耳。

柏梁臺。武帝紀元鼎二年。

師古曰：三輔舊事云：以香柏為之。今書字皆從柏。

火耕水耨。武帝紀。

江南之地，火耕水耨。

應劭曰：燒草下水種稻，草與稻並生，高七八寸，因悉芟去，復下水灌之，草死，獨稻長，所謂火耕水耨。

泛駕之馬。武帝紀元封五年。

師古曰：泛，覆也。音方勇反。字本作𩇛。後通用耳。覆駕者，言馬有逸氣而不循軌轍也。

跡弛武帝紀

跡弛之士

如淳曰士行有卓異不入俗檢而見斥逐者也師古曰跡者跡落無檢局也弛者放廢不遵禮度也跡士各反弛式爾反

典屬國昭帝紀始元六年

蘇武前使匈奴留單于庭十九歲迺還奉使全節以武爲典屬國

如淳曰以其久在外國知邊事故令典主諸屬國師古曰典屬國本秦官漢因之掌歸義蠻夷屬官有九譯令後省并大鴻臚

水衡錢宣帝紀

本始二年以水衡錢爲平陵徙民起第宅

應劭曰水衡與少府皆天子私藏耳縣官公作當仰給司農今出水衡錢言宣帝卽位爲異政也

倭仔昭帝紀

師古曰倭接幸也仔美貌也故以名宮中婦官字或並從女音接余

便殿武帝紀

師古曰凡言便殿便室便坐者皆非正大之處所以就便安也

子大夫。武帝紀。

師古曰：子者，人之嘉稱。大夫，舉官稱也。志在優賢，故謂之子大夫也。

算商車。武帝紀。

元光六年，初算商車。

李奇曰：始稅商買車船，令出算。

漕渠。武帝紀元光六年。

穿漕渠通渭。

如淳曰：水轉運曰漕。

不肖。武帝紀。

師古曰：肖，似也。不肖者，言無所象類，謂不材之人也。

惡少年。昭帝紀。

發三輔及郡國惡少年，吏有告劾亡者，屯遼東。

師古曰：惡少年，謂無賴子弟也。被告劾而逃亡者。

緩頰。高帝紀。

漢王謂酈食其曰：緩頰往說魏王豹。

張晏曰：緩頰，徐言引譬喻也。

間出。高帝紀。

紀信曰：事急矣，臣請誑楚，可以間出。

師古曰：間出，投間隙私出。若言間行微行耳。紀信詐爲漢王，而王出西門遁，是私出也。

亢禮。高帝紀。

師古曰：亢，當也。高下相當，無所卑屈，不獨謂揖拜也。

三川。高帝紀。

沛公與項羽西略地至雍邱，與秦軍戰，大敗之，斬三川守李由。

應劭曰：三川，今河南郡也。由，李斯子也。韋昭曰：有河、洛、伊，故曰三川。

銜枚。高帝紀。

章邯夜銜枚擊項梁。

師古曰：銜枚者，止言語謹囂，欲令敵人不知其來也。周官有銜枚氏，枚狀如箸，橫銜之。

老弱傳籍。高帝紀二年。

蕭何發關中老弱未傅者悉詣軍。

服虔曰：傅音附。如淳曰：今老弱未嘗傅者，皆發之。未二十三爲弱，過五十六爲老。師古曰：傅，著也。言

著名籍給公家徭役也。

甬道。高帝紀。

漢王築甬道屬河以取敖倉粟。

應劭曰恐敵鈔輜重故築垣牆如街巷也。鄭氏曰甬音踊。師古曰屬聯也之欲反。

陛下。高帝紀。

應劭曰陛下升堂之陛王者必有執兵陳於陛階之側羣臣與至尊言不敢指斥故呼在陛下者爾告之因卑以達尊之意也。若今稱殿下閣下侍者執事皆此類也。

三齊。田儻傳三。

并三齊之地。

師古曰齊及濟北膠東。

苑囿。高帝紀。

師古曰養鳥獸曰苑苑有垣曰囿所以種植謂之園。

酒闌。高帝紀。

文穎曰闌言希也謂飲酒者半罷半在謂之闌。

賜告。高帝紀。

高祖嘗告歸之田。

孟康曰：古者名吏休假，曰告。漢律：吏二千石有予告，有賜告。予告者，在官有功最法所當得也。賜告者，病滿三月當免。天子優賜其告，使得帶印綬，將官屬歸家治病。師古曰：告者，請謁之言，謂請休耳。或謂之謝，謝亦告也。左氏傳曰：韓獻子告老，禮記曰：若不得謝，漢書諸云：謝病，皆同義。

繡衣直指，百官公卿表七上。

待御史有繡衣直指。

服虔曰：指事而行，無阿私也。師古曰：衣以繡者，尊寵之也。

長揖，高帝紀。

師古曰：長揖者，手自上而極下也。

斬以狗，高帝紀。

師古曰：徇，行示也。司馬法曰：斬以徇，言使人將行，徧示衆士以爲戒。

宗臣，蕭曹傳贊，王莽傳六十九上。

蕭曹位冠羣后，聲施後世，爲一代之宗臣。

師古曰：言爲後世之所尊仰，故曰宗臣。

法有祖，王莽傳。

令大法有設。後世有祖。

師古曰。祖始也。以此爲法之始。

較然。王莽傳。

如此卽羣下較然輸忠。黎庶昭然感德。

師古曰。較。明貌也。

籍橐。元后傳六十八。

車騎將軍音藉橐請罪。

師古曰。自坐橐上。言就刑戮也。

青瑣。元后傳。

孟康曰。以青畫戶邊鏤中。天子制也。師古曰。青瑣者。刻爲連瑣文而青塗也。

濯歌。元后傳。

成都侯王商嘗病。欲避暑。從上借明光宮。後又穿長安城。引內灑水。注第中大陂。以行船。立羽蓋。張周帷。輯濯越歌。上幸商第。見穿城引水。意恨內銜之。

師古曰。輯與楫同。濯與權同。皆所以行船也。令執楫權人爲越歌也。輯。謂權之短者也。今吳越之人呼爲橈者。音饒。越歌爲越之歌。

奉常。百官公卿表。

師古曰。太常。王者旌旗也。畫日月焉。王有大事則建以行。禮官主奉持之。故曰奉常也。後改曰太常。

尊大之義也。

期門。

羽林。百官公卿表。宣帝神爵元年。

期門羽林。皆屬光祿勳。

服虔曰。與期門下次微行。後遂以名官。師古曰。羽林亦宿衛之官。言其如羽之疾。如林之多也。一說。

羽所以爲王者羽翼也。

應劭曰。天有羽林。大將軍之星。

閑駒。

百官公卿表。

太僕有龍馬。閑駒。橐泉。駒駘。承華。五監長丞。

如淳曰。橐泉廡。在橐泉宮下。師古曰。閑關。養馬之所也。故曰閑駒。駒駘出北海中。其狀如馬。駒。徒高。

反駘音塗。

少府。百官公卿表。

少府秦官。掌山海池澤之稅。以給共養。

師古曰。大司農供軍國之用。少府以養天子也。共居用反。養。弋亮反。



執金吾。百官公卿表。

師古曰。金吾。鳥名也。主辟不祥。天子出行。職主先導。以禦非常。故執此鳥之象。因以名官。水衡都尉。百官公卿表。

張晏曰。主都水及上林苑。故曰水衡。主諸官。故曰都。有卒徒武事故曰尉。師古曰。衡。平也。主平其稅入。

越騎。百官公卿表。

越騎校尉掌越騎。

如淳曰。越人內附。以爲騎也。師古曰。宣紀言。飲飛射士。胡越騎。又此有胡騎。校尉掌胡騎。與越騎校尉俱在八校尉數。

戊己校尉。百官公卿表。

師古曰。甲乙丙丁庚申壬癸。皆有正位。唯戊己寄治耳。今所置校尉。亦無常居。故取戊己爲名也。有戊校尉。有己校尉。一說戊己居中。鎮覆四方。今所置校尉。亦處西域之中。撫諸國也。

金璽。百官公卿表。

晉灼曰。璽。草名也。出琅邪平昌縣。如艾可染綠。因以爲綬名也。師古曰。璽之爲言。信也。古者印璽通名。今則尊卑有別。漢舊儀云。諸侯王黃金璽。橐佗鈕。文曰璽。謂刻云某王之璽。

徹侯。百官公卿表。

秦制爵二十級。以賞功勞。徹侯最貴。金印紫綬。漢避武帝諱。曰通侯。

師古曰。徹言其爵位上通於天子。

丞相。百官公卿表。

秦有左右丞相。

荀悅曰。秦本次國命卿二人。是以置左右丞相。無三公官。

五兵。晉丘壽王傳三十四。

師古曰。謂矛戟弓劍戈也。

輸之司空。百官公卿表。

宗正屬官。有都司空令丞。

如淳曰。律。司空主水及罪人。賈誼曰。輸之司空。編之徒官。

司隸。百官公卿表。

司隸校尉。持節。從中都官徒千二百人。

師古曰。以掌徒隸而巡察。故云司隸。中都官。京師諸官府也。

行在。武帝紀。

師古曰。天子或在京師。或出巡狩。不可豫定。故言行在所耳。不得亦謂京師爲行在也。  
睢上。武帝紀元鼎四年。

蘇林曰。睢音誰。如淳曰。汾陰縣。治睢之上。后土祠在縣西。汾在睢之北。師古曰。睢者。以其形高起如人尻。睢故以名云。一說此臨汾水之上。地本名鄭。音與葵同。彼鄉人呼葵音如誰。故轉而爲睢字。故漢舊儀云。葵上。

渥注馬。武帝紀。

馬生渥注水中。

李斐曰。南陽新野有暴利長。當武帝時遭刑。屯田燉煌界。數於此水旁見羣野馬。中有奇異者。與凡馬來飲此水。利長持勒鞞收得其馬。獻之。欲神異此馬。云從水中出。師古曰。渥音握。注於佳反。

朝日夕月。武帝紀元鼎五年。

師古曰。春朝朝日。秋暮夕月。蓋常禮也。郊泰時而揖日月。此又別儀。

先甲。武帝紀。

詔曰。辛亥夜若景光十有二明。易曰。先甲三日。後甲三日。朕飭躬齋戒。丁酉拜況於郊。師古曰。況。賜也。辛亥夜有光。是先甲三日也。丁日拜況。是後甲三日也。故詔引易文。

舳舻。武帝紀元封五年。

舳艫千里。

李斐曰。舳。船後持柁處也。艫。船前頭刺櫂處也。言其船多前後相銜。千里不絕也。舳音虛。艫音慮。

汗血馬。

武帝紀太初四年西域大宛國傳

貳師將軍李廣利斬大宛王首。獲汗血馬來。作西極天馬之歌。

孟康曰。言大宛國有高山。其上有馬。不可得。因取五色母馬置其下。與集。生駒皆汗血。因號曰天馬子云。

應劭曰。大宛舊有天馬種。蹋石汗血。汗從前膊出如血。號一日千里。師古曰。蹋石者。謂蹋石而有跡。言其躡堅利。

躡蹠金。

武帝紀太始二年

詔曰。泰山見黃金。宜改故名。今更黃金爲麟趾褭蹠。以協瑞焉。因以班賜諸侯王。

師古曰。武帝欲表祥瑞。故普改鑄爲麟趾馬蹠之形。以易舊法耳。今人往往於地中得馬蹠金。甚精好。形製巧妙。褭。奴了反。

小步馬。

西域傳六十六上

烏耗國出小步馬。

師古曰。小。細也。細步。言其能蹠足。卽今所謂百步千跡者也。烏。一加反。耗。直加反。

蠶齋。孔氏傳六十一。

師古曰：蠶，細也。與織同。齋，愛也。細吝於財利也。

晚節。石顯傳六十二。

元帝晚節寢疾。

師古曰：晚節，猶言末時也。

計然。貨殖傳六十一。

句踐困於會稽之上，迺用范蠡計然。

孟康曰：姓計名然，越臣也。師古曰：據古今人表，計然列在第四等。計然一號計研，故賓戲云：研桑心計於無垠，即爲此耳。計然者，濮上人也。博學無所不通，尤善計算。嘗南遊越，范蠡卑身事之。其書則有萬物錄，著五方所出，皆直還之事。見皇覽及晉中經簿。又吳越春秋及越絕書，並作計倪。此則倪研及然聲皆相近，實一人耳。

掌故。鼂錯傳十九。

鼂錯以文學爲大常掌故。

應劭曰：掌故，六百石吏主故事。

狼顧。食貨志四上。

失時不雨。民且狼顧。

李奇曰：狼性怯，走喜還顧。言民見天不雨，今亦恐也。

服役。食貨志。

今農夫五口之家，其服役者不下二人。

師古曰：服，事也。給公事之役也。

心計。食貨志四下。

桑宏羊：洛陽賈人之子，以心計，年十三侍中。

師古曰：心計，不用籌算。

齊民。食貨志。

如淳曰：齊，等也。無有貴賤，謂之齊民。若今言平民矣。

均輸。平準。食貨志。

桑宏羊爲治粟都尉，領大農，請置大農部丞數十人，分主郡國，置均輸鹽鐵官，令遠方各以其物，如異時商賈所轉販者爲賦，而相權輸。置平準於京師，都受天下委輸。大農諸官盡籠天下之貨物，貴則賣之，賤則買之。如此，富商大賈亡所牟大利，則反本，而萬物不得騰躍。故曰平準。

三木。司馬遷傳三十二。

魏其衣赭關三木。

師古曰三木在頸及手足。

關茸司馬遷傳

師古曰關茸猥賤也。關下也。茸細毛也。言非豪傑也。關吐合反。茸人勇反。又賈誼傳注關茸下材，不肖之人也。

青社齊懷王傳三十三

皇帝使御史湯廟立子闕為齊王，曰受茲青社。

師古曰於廟授策也。張晏曰王者以五色土為大社，封四方諸侯，各以其方色與之。苴以白茅歸以立社。

宵人廣陵厲王傳三十三

應劭曰無邇近小人也。

劍論司馬遷傳

司馬氏在趙者以傳劍論顯。

服虔曰世善劍也。師古曰劍論者能說劍術也。論來頓反。

圍牆司馬遷傳

幽於圜牆之中。

師古曰。圜牆。獄也。周禮謂之圜土。

少從。張騫傳三十一。

師古曰。漢時謂隨使而出外國者。爲少從。總言其少年而從使也。從。材用反。

進孰。張騫傳。

大宛以西。皆自恃遠。尙驕恣。漢使往既多。其少從率進孰於天子。言大宛有善馬。

師古曰。進孰者。但空進成孰之言。

積竹杖。昌邑王傳三十三。

昌邑王徵詣長安。爲昭帝嗣。到濟陽。求長鳴雞。道買積竹杖。

文穎曰。合竹作杖也。

仰藥。息夫躬傳十五。

師古曰。仰首而飲藥也。

招權。季布傳七。

辯士曹丘。往數招權。顧金錢。事貴人趙談等。

師古曰。言招求貴人威權。因以請託。故得他人顧金錢也。



采金鄱水。地理志八上。

孟康曰。鄱陽。鄱音婆。師古曰。采者取金之處。

## 兩漢博聞卷第四

治行曹參傳九

蕭何薨。曹參聞之。告舍人趣治行。

師古曰。舍人猶家人也。一說私屬官。主家事者也。趣讀曰促。謂速也。治行。謂修行治裝也。

獄市曹參傳

曹參屬其後相曰。以齊獄市爲寄。曰。夫獄市者。所以并容也。今君擾之。姦人安所容乎。

孟康曰。夫獄市者。兼受善惡。若窮極姦人。姦人無所容竄。久且爲亂。秦人極刑而天下畔。孝武峻法。而獄繁。此其效也。師古曰。老子云。我無爲民自化。我好靜民自正。參欲以道化爲本。不欲擾其末也。

事刃蒯通傳十五

蒯通爲范陽令。曰。足下殺人之父。孤人之子。慈父孝子。不敢事刃於公之腹者。畏秦法也。

李奇曰。東方人以物舌地中爲事。師古曰。事音側吏反。字本作傳。

封人頸王莽傳六十九中

王莽下書曰。妄封人頸。得錢者去。

如淳曰。權臣妄以法枉其人爲僮僕。封其頸。以別之也。得顧錢乃去封。

阪上走丸。劇通傳。

劇通曰。范陽令先下而身富貴。邊城必相率降。如阪上走丸也。

師古曰。言乘勢便易。

申子學。張歐傳十六。

張歐。孝文時以治刑名侍太子。

師古曰。劉向別錄云。申子學。號曰刑名。刑名者。循名以責實。其尊君卑臣。崇上抑下。合於六經說者。

云。刑名家名家。即太史公所論六家之二也。此說非。歐音驅。

任俠。季布傳七。

應劭曰。任。謂有堅完可任託以事也。如淳曰。相與信爲任。同是非爲俠。師古曰。任。謂任使其氣力。俠

之言挾也。以權力俠輔人也。任音人。禁反。俠音下頰反。

冠玉。陳平傳十。

或譏陳平曰。平雖美丈夫。如冠玉耳。其中未必有也。

孟康曰。飾冠以玉。光好外見。中非所有也。

端門。周勃傳十。

師古曰。端門殿之正門。

從理入口。周勃傳。

許負相周亞夫。君後三歲而侯。侯八歲爲將相後九歲而餓死。負指其口曰。從理入口。此餓死法也。亞夫果封條侯。爲將軍。拜太尉。下廷尉。不食五日死。

師古曰。從。豎也。音子容反。

簿責。周勃傳。

周亞夫下吏吏簿責亞夫。如淳曰。簿。問其辭情。師古曰。簿。問者。書之於簿。一一問之也。

四皓。王賈兩龔傳序四十二。

漢興有東園公、綺里季、夏黃公、甬里先生。

師古曰。四皓稱號。本起於此。更無姓名可稱。知此蓋隱居之人。匿跡遠害。不自標顯。祕其氏族。故史傳無得而詳。至於後代。皇甫謐圈稱之。徒及諸地理書說。竟爲四人。施安姓字。自相錯互。語又不經。班氏不載於書。諸家皆臆說。今並棄略。一無取焉。

銜。王吉傳四十二。司馬相如傳二十七下。

師古曰。銜。馬銜也。概。車鉤心也。張揖以概爲馬之長銜。非也。概音其月反。又注司馬相如諫獵書曰。銜槩之變。言馬銜或斷。鉤心或出。則致傾敗以傷人也。

詐僞萌生。王吉傳。

師古曰：萌生，言其事出如草木之初生。

翁主。王吉傳。高帝紀又注。

漢家列侯尚公主，諸侯則國人承翁主。

晉灼曰：娶天子女曰尚公主，國人娶諸侯女曰承翁主，尚承皆卑下之名也。師古曰：翁主者，言父自主婚也。

王主。成帝紀建始元年。

張晏曰：王主，王之女也。師古曰：王主，即翁主也。主自主婚，故曰王主。

軌躅。敘傳七十一。

伏周孔之軌躅。

鄭氏曰：躅迹也。三輔謂牛蹄處爲躅，音丈欲反。

偶人。公孫賀傳三十六。

朱安世自獄中上書告公孫賀之子敬聲與陽石公主私通，及使人巫祭祠詛上，且上甘泉當馳道理。偶人賀父子死獄中，家族巫蠱之禍，起自朱安世，成於江充，遂及公主皇后太子，皆敗。

師古曰：刻木爲人象人之形，謂之偶人，偶並也，對也。

左驗。楊惲傳三十六。張湯傳二十九。

楊惲下廷尉。廷尉于定國考問。左驗明白。

師古曰。左。證左也。言當時在其左右見此事者也。又張湯傳注。李奇曰。左。證左也。師古曰。謂之左者。言除罪人正身之外。又取其左右者考問也。

城門候。蔡義傳三十六。

師古曰。門候。主候時而開閉也。

橋正。劉屈氂傳三十六。

橋當世反諸正。

師古曰。正曲曰橋。橋讀與矯同。其字從手。

小生。朱雲傳三十七。

丞相薛宣留朱雲宿。因謂曰。且留我東閣。可以觀四方奇士。雲曰。小生適欲相吏邪。宣不敢復言。

師古曰。小生。謂其新學後進。言欲以我爲吏乎。

畔換。敘傳七十下。

項氏畔換。黜我巴漢。

孟康曰。畔。反也。換。易也。不用義帝要換。易與高祖漢中也。師古曰。此說非也。畔換。強恣之貌。猶言跋。

扈也。詩大雅皇矣篇曰：無然畔換。

君侯。劉屈氂傳三十六。

如淳曰：漢儀注：列侯爲丞相稱君侯。師古曰：惲傳：邱常謂惲爲君侯。是則通呼列侯之稱耳。非必丞相也。

子絲。敘傳。

子絲慷慨。

師古曰：爰盎字絲。此加子者。是嘉稱以偶句耳。

行馳道。鮑宣傳四十二。

丞相孔光。四時行園陵官屬。以令行馳道中。

如淳曰：令諸侯有制得行馳道中者。行旁道。無得中央三丈也。

成帝紀云：不敢絕馳道。

應劭曰：馳道。天子所行道也。若今之中道。

丈人。疏廣傳四十一。

師古曰：丈人。嚴莊之稱也。故親而老者皆稱焉。

鉦鼓。東方朔傳三十五。平帝紀元始二年。

師古曰。鉦鼓之教。鉦鼓所以爲進退士衆之節也。

平帝紀。遣執金吾侯陳茂行邊兵。假以鉦鼓。

應劭曰。將帥乃有鉦鼓。今茂官輕兵少。又但往諭曉之耳。所以假鉦鼓者。欲重其威也。鉦者。鑊也。似鈴柄中上下通。師古曰。鉦音征。鑊音女交反。

亞將。灌嬰傳十二。

虜亞將周蘭。

師古曰。亞次也。

射鵬。李廣傳二十四。

文穎曰。鵬鳥也。故使善射者射之。師古曰。鵬。大鷲鳥也。一名鷲。黑色。翻可以爲箭。羽音彫。蓬蔭。

師古曰。蓬蔭。口柔。觀人顏色而爲辭佞也。

閹尹。敍傳下。

師古曰。謂宦人爲閹者。言其精氣奄閉不泄也。一曰主奄閉門者。尹正也。

奪適。梅福傳三十七。

諸侯奪宗。聖庶奪適。



如淳曰：奪宗始封之君，尊為諸侯，則奪其舊為宗子之事也。奪適，文王舍伯邑考而立武王是也。孔子雖庶，可為殷後。師古曰：適讀曰嫡。

祁連山霍去病傳二十五

霍去病出北地，遂深入至祁連山。

師古曰：祁連山，即天山也。匈奴呼天為祁連，祁音上夷反。

躡鞠去病傳

去病在塞外，卒乏糧，而去病尙穿城躡鞠也。

服虔曰：穿地作鞠室也。師古曰：鞠以皮為之，實以毛，蹙躡而戲也。躡音徒臘反，鞠音距六反。

冢象祁連去病傳

霍去病薨，上悼，發屬國玄甲軍陳，自長安至茂陵，為冢象祁連山。

師古曰：在茂陵旁，冢上有豎石，冢前有石人馬者是也。

求雨董仲舒二十六

董仲舒為江都相，治國以春秋災異之變，推陰陽所以錯行，故求雨，閉諸陽，縱諸陰，其止雨反是。

師古曰：若謂閉南門，禁舉火，及開北門，水灑人之類是也。

旬歲翟方進傳五十四

翟方進爲丞相司直。旬歲間免兩司隸。朝廷憚之。

師古曰。旬。徧也。滿也。旬歲。猶言滿歲也。若十日之一周。

泉山。朱買臣傳三十四。

東越王居保泉山。

師古曰。泉山。卽今泉州之山也。保者。保守之以自固也。

承明廬。嚴助傳三十四。

賜會稽太守嚴助詔曰。君厭承明之廬。

張晏曰。承明廬。在石渠閣外。直宿所止。曰廬。

威稜。李廣傳二十四。

威稜。愴乎鄰國。

李奇曰。神靈之威曰稜。愴。動也。愴音徒濫反。

鑿坏。楊雄傳五十七下。

應劭曰。鑿坏。謂顏闔也。魯君聞顏闔賢。欲以爲相。使者往聘。因鑿後垣而亡也。坏音陪。又音普回反。

宦騎。蘇武傳二十四。

師古曰。宦騎。宦者而爲騎也。

周陸揚雄傳

以罔爲周陸

李奇曰陸遮禽獸圍陳也陸

旄旗藝文志十

師古曰畫龜蛇曰旄鳥隼曰旗

諡司馬相如傳二十七下

師古曰諡者行之迹也

文鷁相如傳二十七

浮文鷁

張揖曰鷁水鳥也畫其象於船首淮南子曰龍舟鷁首天子之乘也

榜人相如傳

榜人歌

張揖曰榜船也月令云命榜人榜人船長也主倡聲而歌者也榜音滂又方孟反

屬車相如傳二十七下

應劭曰古者諸侯貳車九乘秦滅九國兼其車服漢依秦制故大駕屬車八十一乘師古曰屬者言

相連續不絕也。

反騷。廣騷。畔牢愁。楊雄傳五十七上。

楊雄讀屈原離騷文。未嘗不流涕。以爲君子遇不遇命也。何必湛身哉。湛。沈也。沈謂投水而死。迺作書。往往撫離

騷文而反之。自岷山投書江流。以弔屈原。名曰反離騷。又旁離騷作重一篇。名曰廣騷。又旁惜誦以下

至懷沙一卷。名曰畔牢愁。

師古曰。旁。依也。音步浪反。其下類此。重音直用反。李奇曰。畔。離也。牢。聊也。與君相離愁而無聊也。師

古曰。惜誦懷沙。皆屈原所作九章中名也。

品藻。楊雄傳五十七下。

仲尼之後。訖於漢。道德行。顏閔股肱。蕭曹爰及名將。尊卑之條。稱述品藻。譏淵騫。

師古曰。品藻者。定其差品及文質。

咫尺之書。韓信傳四。

奉咫尺之書。以使燕。燕必不敢不聽。

師古曰。八寸曰咫。咫尺者。言其簡牘。或長咫。或長尺。喻輕率也。今俗言尺書。或言尺牘。蓋其遺語耳。

枉矢。劉向傳六。

枉矢夜光。

應劭曰：流星也。其射如矢。蛇行不正。故曰枉矢流。以亂伐亂。蘇林曰：有聲爲天狗。無聲爲枉矢。

天狗。劉向傳。

孝昭時。有大星如月。西行。衆星隨之。此爲特異。孝宣興起之表。天狗夾漢而西。

李奇曰：流星也。下墮地爲天狗。皆妖星。

常伯。谷永傳五十五。

戴金貂之節。執常伯之職。

師古曰：常伯。侍中也。伯。長也。常。使長事者也。一曰：常。任使之。人。此爲長也。

法從。楊雄傳五十七上。

趙昭儀方大幸。每上甘泉。常法從。

師古曰：法從者。以言法當從耳。非失禮。一曰：從法駕也。

殊庭。郊祀志五下。

師古曰：殊庭。蓬萊中仙人庭也。

首級。衛青傳二十五。

斬輕銳之卒。捕伏聽者三千一十七級。

張晏曰：伏於隱處聽軍虛實。師古曰：本以斬敵一首。拜爵一級。故謂一首爲一級。因復名生獲一爲

一級也。秦法斬首一，賜爵一級。

裨王衛青傳

漢兵圍右賢王，右賢王驚夜逃潰圍北去，輕騎校尉郭成等追數百里弗得，得右賢裨王十餘人。

師古曰：裨王，小王也。若言裨將也。

大黃李廣傳二十四

李廣自以大黃射其裨將。

服虔曰：黃肩，弩也。孟康曰：太公陷堅卻敵，以大黃參連弩也。晉灼曰：黃肩，即黃間也。大黃，其大者也。

師古曰：服晉二說是也。

從橫短長術張湯傳二十九 主父偃傳三十四上 藝文志下

邊通學短長官至濟南相。

應劭曰：短長術，興於六國時，短長其語，隱謬用相激怒也。張晏曰：蘇秦張儀之謀，趣彼爲短，歸此爲

長。戰國策名短長術也。

主父偃學短長從橫術。

藝文志云：從橫家者流，蓋出於行人之官。孔子曰：誦詩三百，使於四方，不能顯對，雖多亦奚以爲。

師古曰：謂人不達於事，誦詩雖多，亦無所用。

三尺法。杜周傳二十。

客謂廷尉杜周曰：君爲天下決平，不循三尺法，專以人主意指爲獄，獄者固如是乎？

孟康曰：以三尺竹簡書法律也。

箴石。藝文志。

師古曰：箴，所以刺病也。石，謂砭石，卽石箴也。古者攻病則有砭，今其術絕矣。箴音之林反，砭音彼廉反。

褻然。董仲舒傳二十六。

子大夫褻然爲舉首。

張晏曰：褻，進也，爲舉賢良之首也。師古曰：褻然，盛服貌也。

數奇。李廣傳。

大將軍陰受上指，以爲李廣數奇。

孟康曰：奇，隻不耦也。如淳曰：數爲匈奴所敗，爲奇不耦。師古曰：言廣命隻，不耦合也。孟說是矣。數音所角反，奇音居宜反。

居無何。李廣傳。

師古曰：無何，謂未多時也。

烏號。司馬相如傳二十七上。

郊祀志五上。  
左烏號之雕弓。

應劭曰。楚有柘桑。烏栖其上。支下著地。不得飛。欲墮號呼。故曰烏號。

郊祀志。黃帝采首山銅鑄鼎於荆山下。鼎既成。有龍垂胡髯下迎黃帝。黃帝上騎。羣臣後宮從上。龍七十餘人。龍迺上去。餘小臣不得上。迺悉持龍頰。龍頰拔墮。墮黃帝之弓。百姓仰望黃帝既上天。乃抱其弓與龍頰號。故後世名其處曰鼎湖。其弓曰烏號。於是天子曰嗟夫。誠得如黃帝。吾視去妻子如脫屣耳。

師古曰。屣。小履。脫屣者。言其便易無所顧也。

不世之功。後漢魏鸞傳三附。

足下將建伊呂之業。宏不世之功。

注云。不世者。言非世之所常有也。

鼉。鼉。郊祀志。

鼉。鼉及鼉。

師古曰。鼎絕大者謂之鼉。圓弁上謂之鼉。鼉音乃代反。鼉音茲。

十二樓。郊祀志五下。



方士有言黃帝時爲五城十二樓以候神人名曰迎年。

應劭曰昆侖玄圃五城十二樓仙人之所常居師古曰迎年若云祈年。

箭服相如傳。

右夏服之勁箭。

伏儼曰服盛箭器也夏后氏之良弓名繁弱其矢亦良卽繁弱之箭服也師古曰箭服卽今之步也。

伏祠郊祀志五上。

秦德公作伏祠。

孟康曰六月伏日也周時無至此乃有之師古曰伏者謂陰氣將起迫於殘陽而未得升故爲藏伏因名伏日也立秋之後以金代火金畏於火故至庚日必伏庚金也。

梟鏡郊祀志。

人有言古天子常以春解祠祠黃帝用一梟破鏡。

張晏曰黃帝五帝之首也春歲之始也梟惡逆之鳥方士虛誕云以歲始破除凶災令神仙之帝食惡逆之物使天下爲逆者破滅訖竟無有遺育也孟康曰梟鳥名食母破鏡獸名食父黃帝欲絕其類使百吏祠皆用之破鏡如羆而虎眼如淳曰漢使東郡送梟五月五日作梟羹以賜百官以其惡

鳥故食之也。師古曰：解祠者，謂祠祭以解罪求福。

縉紳郊祀志

李奇曰：縉，插笏於紳。紳，大帶也。臣瓚曰：縉，赤白色。紳，大帶也。左氏傳有縉雲氏。師古曰：李曰：縉，插也。字本作摺。插笏於大帶與革帶之間耳。或作薦紳者，亦謂薦笏於紳帶之間，其義同。

縣叢叔孫通傳十三

叔孫通與其弟子百餘人爲縣叢野外。

應劭曰：立竹及茅索營之，習禮儀其中也。如淳曰：謂以茅翦樹地爲纂位尊卑之次也。春秋傳曰：置茅莖。師古曰：叢與莖同。並子悅反。如說是也。

九賓叔孫通傳

大行設九賓臚句傳。

蘇林曰：上傳語告下爲臚。下告上爲句也。韋昭曰：大行掌賓客之禮。今之鴻臚也。九賓，則周禮九賓也。謂公侯伯子男孤卿大夫士也。

鷓夷范蠡傳六十一 鄒陽傳二十八

師古曰：范蠡自號鷓夷。子皮者，言若盛酒之鷓夷，多所容受，而可卷懷。與時張弛也。鷓夷，皮之所爲。故曰子皮。應劭曰：吳王取馬革爲鷓夷。受伍子胥沈之江。鷓夷，楹形。師古曰：卽今之盛酒鷓夷勝。

傾蓋鄆陽傳

鄆陽上梁孝王書語曰白頭如新傾蓋如故何則知與不知也  
孟康曰初相識至白頭不相知文穎曰傾蓋猶交蓋駐車也

統斷幹枚乘傳二十一

秦山之靈穿石單極之統斷幹

孟康曰西方人名屋梁爲極單一也一說梁謂井鹿盧也言鹿盧爲綆索久鏗斷井幹也晉灼曰統  
古綆字也單盡也盡極之綆斷幹井上四交之幹常爲汲索所契傷也師古曰晉說近之幹者交  
木井上以爲欄者也孟云鹿盧失其義也統綆皆音鯁鏗契皆刻也音口計反

文甲東方朔傳 後漢杜篤傳 後漢王符傳

師古曰瑋瑁文甲也廣志曰瑋瑁形似龜出南海吳錄曰瑋瑁似龜而大

五諸侯高帝紀二年

羽雖聞漢東旣擊齊欲遂破之而後擊漢漢王以故得劫五諸侯兵

師古曰五諸侯者謂常山河南韓魏殷也此年十月常山王張耳降河南王申陽降韓王鄭昌降三  
月魏王豹降虜殷王卬

復除高帝紀二年

蜀漢民給軍事勞苦，復勿租稅二歲。

師古曰：復者，除其賦役也。音方目反。

拔城。高帝紀秦二年。

攻碭，三日拔之。

師古曰：拔者，克城邑而取之。言若拔樹木，并得其根。

穀嘽。郊祀志五下。

師古曰：嘽，少意也。言穀稼少。嘽音苦簞反。

急就篇。藝文志十。

元帝時，黃門令史游作急就篇。成帝時，李長作元尚篇，皆蒼頡中正字也。

八體。藝文志。

章昭曰：八體，一曰大篆，二曰小篆，三曰刻符，四曰蟲書，五曰摹印，六曰署書，七曰殳書，八曰隸書。

六體。藝文志。

六體者，古文、奇字、篆書、隸書、繆篆、蟲書。

師古曰：古文謂孔子壁中書，奇字即古文而異者也。篆書謂小篆，蓋秦始皇使程邈所作也。隸書亦程邈所獻，生於徒隸，從簡易也。始造隸書起於官獄多事，苟趨省易施之於徒隸也。繆篆謂其文屈曲纏繞，所以摹印章也。蟲

書謂蟲鳥之形所以書幡信也

秦篆藝文志

史籀篇者周時史官教學童書也與孔氏壁中古文異體蒼頡七章者李斯所作也博士七章者胡毋敬所作也文字多取史籀篇而篆體復頗異所謂秦篆也

竹皮冠高帝紀

應劭曰以竹始生皮作冠今鵠尾冠是也文穎曰高祖居貧志大取其約省與衆有異韋昭曰竹皮竹筴也今南夷取竹紉時續以爲帳師古曰竹皮筴皮謂筴上所解之籜耳非竹筴也今人亦往往爲筴皮巾古之遺制也

能高帝紀

吾非敢自愛恐能薄

師古曰能謂材也能本獸名形似熊足似鹿爲物豎中而強力故人謂有賢材者皆爲能

擊筑高帝紀十二年 後漢延篤傳五十四

高祖過沛留置酒沛宮酒酣上擊筑而歌

鄧展曰筑音竹應劭曰狀似琴而大頭安弦以竹擊之故名曰筑師古曰今筑形似瑟而細頸也後漢書注云說文曰筑五弦之樂沈約宋書曰筑不知誰所造也史記唯云高漸離擊筑案今筑形似

箏。有項有柱。史記。荆軻至燕。日與屠狗及高漸離擊筑。荆軻和而歌於市中。相樂已而相泣。旁若無人。

三雍。河間獻王傳二十三。

河間獻王。武帝時來朝。獻雅樂。對三雍宮。

應劭曰。辟雍。明堂。靈臺也。雍。和也。言天地君臣人民皆和也。又漢書音義曰。皆叶天人雍和之氣爲之。故謂三雍。

蹲鴟。貨殖傳六十一。

蜀卓氏曰。吾聞崕山之下沃壑。下有蹲鴟。至死不飢。

師古曰。蹲鴟謂芋也。其根可食。以充糧。故無飢年。華陽國志曰。汝山郡都安縣有大芋。如蹲鴟也。感槩。郭解傳六十二。季布傳七。

郭解少時。陰賊感槩。

師古曰。陰賊者。陰懷賊害之意也。感槩者。感意氣而立節槩也。

季布傳贊曰。婢妾賊人。感槩而自殺。非能勇也。

五陵。原涉傳六十二。

師古曰。五陵謂長陵、安陵、陽陵、茂陵、平陵也。班固西京賦曰。南望杜霸。北眺五陵。是知霸陵、杜陵。非

此五陵之數也。而說者以爲高祖以至茂陵爲五陵，失其大意。

二府。劉向傳六。

如淳曰：二府，謂丞相、御史大夫府也。亦曰兩府也。

交戟。劉向傳。

佞邪與賢臣並在交戟之內。

師古曰：交戟，謂宿衛者。

置醴。楚元王傳六。

魯穆生受詩於浮丘伯。楚元王好詩，以穆生爲中大夫。穆生不嗜酒，元王每置酒，常爲穆生設醴。及王戊卽位，常設，後忘設焉。穆生退曰：可以逝矣。醴酒不設，王之意怠。楚人將鉗我於市，稱疾臥。

師古曰：醴，甘酒也。少麴多米，一宿而熟，味齊也。

枕中書。劉向傳。

宣帝興神仙方術之事，而淮南有枕中鴻寶苑祕書，言神仙使鬼物爲金之術，及鄒衍重道延命方，世人莫見。而劉更生父德，武帝時治淮南獄，得其書，更生幼而讀誦，以爲奇，獻之。言黃金可成，上令典尙方鑄作事，費甚多，方不驗。

師古曰：鴻寶苑祕書，並道術篇名，藏在枕中，言常存錄之，不漏泄也。

印刂。韓信傳四。

韓信曰。項王使人有功當封爵。刻印刂。忍不能予。

蘇林曰。刂音刂。角之刂。刂與搏同。手弄角。訛不忍授也。師古曰。刂音五九反。搏音大官反。

馮軾。鄺食其傳十三。

鄺食其馮軾。下齊七十餘城。

師古曰。馮讀曰憑。憑據也。軾。車前橫板隆起者也。云憑軾者。言但安坐乘車而游說。不用兵衆。

間路。韓信傳。黥布傳四。

韓信欲東下井陘。擊趙。李左車說趙王曰。願假臣等兵三萬人。從間路絕其輜重。

師古曰。間路。微路也。

黥布先從間道破關。下軍。

師古曰。間道。微道也。

葬驪山。劉向傳。

秦始皇葬於驪山之阿。下錮三泉。上崇山墳。高五十餘丈。石椁爲游館。人膏爲燈燭。水銀爲江海。黃金爲鳧雁。珍寶之藏。機械之變。棺槨之麗。宮館之盛。不可勝原。又多殺宮人。生葬工匠。計以萬數。驪山之作未成。而周章百萬之師至其下矣。項籍燔其宮室。往者咸見發掘。其後牧兒亡羊。羊入其鑿。牧者持



火照求羊失火燒其藏櫛。

師古曰石櫛為游館者多累石於壙中以為離宮別館也孟康曰作機發木人之屬盡其巧變也晉灼曰始皇本紀命匠作機弩矢有所穿近輒射之又言工匠為機咸皆知之已下閉羨門皆殺工匠也師古曰不可勝原者言不能盡其本數也周章陳勝之將也往者皆發掘之以求財物也鑿謂所穿冢藏者音在剝反。

騶騎惠帝紀 東方朔傳又注

應劭曰騶騶騎也師古曰騶本廐之馭者後又令為騎因為騶騎耳。

凌室惠帝紀 武帝紀又注

師古曰凌室藏冰之室也。

間者文帝紀

師古曰間者猶言中間之時也。

弋綈文帝紀贊

文帝身衣弋綈。

如淳曰弋阜也賈誼曰身衣阜綈師古曰弋黑色也綈厚繒音大奚反。

太夫人文帝紀

醪文帝紀

如淳曰。列侯之妻稱夫人。列侯死。子復爲列侯。乃得稱太夫人。子不爲列侯。不得稱也。

師古曰。醪。汗滓酒也。

指縱。蕭何傳九。

功臣皆曰。蕭何未有汗馬之勞。居臣等上何也。上曰。諸君知獵乎。夫獵。追殺獸者。狗也。而發縱指示獸處者。人也。

師古曰。發縱。謂解絛而放之也。指示者。以手指示之。俗言放狗。縱音子用反。而讀者乃爲蹤蹟之蹤。非也。書本皆不爲蹤字。自有逐蹤之狗。不待人發也。

棧道。高帝紀。

張良曰。說漢王燒絕棧道。

師古曰。閣道也。

鳩酒。齊悼惠王傳八。

應劭曰。鳩鳥。黑身赤目。食虻蛇野葛。以其羽畫酒中。飲之立死。

引強。周勃傳十。

周勃材官引強。

服虔曰能引強弓弩官也。孟康曰如今挽強司馬也。師古曰強音其兩反。

殿兵。周勃傳。

周勃擊章邯車騎殿。

師古曰殿填也。謂鎮軍後以扞敵。勃擊破章邯之殿兵也。殿音丁見反。

鈍如椎。周勃傳。

周勃不好文學。每召諸生說十東鄉坐責之。趣爲我語。其樸椎少文如此。

臣瓚曰。令直言勿稱經也。師古曰。趣讀曰促。謂令速言也。服虔曰。謂訥鈍也。應劭曰。今俗名拙語爲椎儲。師古曰。椎謂樸鈍如椎也。音直推反。

酒家保。藥布傳七。

藥布窮困。賣庸於齊。爲酒家保。

孟康曰。酒家作保。保庸也。可保信。故謂之保。師古曰。謂庸作受顧也。爲保。謂保可任使。

遮虜障。李陵傳二十四。

師古曰。障者。塞上險要之處。往往修築。別置候望之人。所以自障蔽而伺敵也。遮虜。障名也。

穹廬。匈奴傳六十四上。

師古曰。穹廬。旃帳也。其形穹隆。故曰穹廬。

成蹊。李廣傳贊二十四。

諺曰：桃李不言，下自成蹊。

師古曰：蹊，謂徑道也。言桃李以其華實之故，非有所招呼，而人爭歸趣來往不絕，其下自然成徑。以喻人懷誠信之心，故能潛有所感也。

爰臂。李廣傳。

李廣爰臂。

如淳曰：臂如猿臂通肩也。

厥角齧首。諸侯王表二。

王莽因母后之權，漢諸侯王厥角齧首。

應劭曰：厥者，頓也。角者，頷角也。齧首，首至地。言王莽漸漬威福，漢之王侯莫敢怨望，皆頓角齧首至地，而上其鬣綬也。晉灼曰：厥猶豎也。叩頭則頷角豎，齧與稽同。

門牡飛。五行志七中之上。

成帝元延元年，長安章城門門牡自亡。函谷關次門牡亦自亡。

晉灼曰：章城門者，西出南頭第一門也。師古曰：牡，所以下閉者也。亦以鐵爲之。章昭曰：次門者，函谷關邊小門也。師古曰：非行人所由，蓋關司曹府所在之門也。

京房易傳曰。飢而不損。茲爲泰。厥災水。厥咎牡亡妖。辭曰。關動牡飛。辟爲士道。臣爲非厥咎。亂臣謀篡。故谷永對曰。章城門。通路寢之路。函谷關。距山東之險。城門。關守國之固。固將去焉。故牡飛也。

九流。藝文志十。

儒家者流。出於司徒之官。道家者流。出於史官。陰陽家者流。出於羲和之官。法家者流。出於理官。名家者流。出於禮官。墨家者流。出於清廟之守。從橫家者流。出於行人之官。雜家者流。出於議官。農家者流。出於農稷之官。小說家者流。出於稗官。諸子十家。其可觀者九家而已。皆起於王道既微。諸侯力政。時君世主。好惡殊方。是以九家之術。蠶出並作。

師古曰。稗音穉。稗之稗。稗官。小官。漢名臣奏。唐林請省置吏公卿大夫至都官。稗官各減什三。是也。初用夏正。高里。武帝紀。

太初元年冬十月。行幸泰山。十一月甲子朔旦冬至。祀上帝於明堂。十二月禮高里。

應劭曰。初用夏正。以正月爲歲首。故改年爲太初也。高里者。伏儼曰。山名。在泰山下。師古曰。此高字。自作高下之高。而死人之里。謂之蒿里。或呼爲下里者也。字卽爲蓬蒿之蒿。或者旣見。太山神靈之府。高里山。又在其旁。卽誤以高里爲蒿里。混同一事。文學之士。共有此謬。陸士衡尙不免。況其餘乎。今流俗書本。此高字。有作蒿者。妄加增耳。

彝命。昭帝紀。

始元元年益州、牂柯等皆反。遣水衡都尉呂破胡、募吏民及發犍爲蜀郡苑馬擊益州。大破之。

應劭曰：舊時郡國皆有材官騎士以赴急難。今夷反，常兵不足以討之，故權選取精勇，聞命奔走。故謂之奔命。師古曰：犍，古奔字耳。犍音虔。又鉅言反。

封君食貨志四下。

師古曰：封君受封邑者，謂公主及列侯之屬也。

卽山鑄錢食貨志。

建元以來用度少，縣官往往卽多銅山而鑄錢。

師古曰：就多銅之山而鑄錢也。

摩錢質取鉛食貨志。

姦或盜摩錢質而取鉛。

臣瓚曰：許慎云：鉛，銅屑也。摩，錢漫而以取其屑，更以鑄錢。西京黃圖：鈹曰：民摩錢取屑是也。師古曰：

鉛音谷。

皮幣食貨志。

有司言曰：古者皮幣，諸侯以聘享，金有二等，黃金爲上，白金爲中，赤金爲下。今半兩錢法重四銖，而姦或盜摩錢質而取鉛，錢益輕薄而物貴，則遠方用幣煩費不省，乃以白鹿皮方尺，緣以績，爲皮幣，直四

十萬。王侯宗室朝覲聘享，必以皮幣薦璧，然後得行。又造銀錫白金，以爲天用，莫如龍，地用，莫如馬，人用，莫如龜，故白金三品，其一曰重八兩，圓之，其文龍，名曰白撰，直三千二百，以重差小方之，其文馬，直五百，三曰復小，橢之，其文龜，直三百，令縣官銷半兩錢，更鑄三銖錢，重如其文，盜鑄諸金錢罪皆死，而吏民之犯者不可勝數。

孟康曰：白金，銀也，赤金，丹陽銅也。鄭氏曰：半兩錢，其文爲半兩，實重四銖也。師古曰：績繡也。繪，五采而爲之。如淳曰：銀錫白金者，雜鑄銀錫爲白金也。晉灼曰：以重差小之者，以半斤之重差爲三品，則中品六兩，下品四兩也。師古曰：橢，音他果反，橢圓而長之也。

苑馬景帝紀中六年

匈奴入鴈門，至武泉，入上郡，取苑馬。

如淳曰：漢儀注：太僕牧師諸苑三十六所，分布北邊西邊，以郎爲苑監官，奴婢三萬人，養馬三十萬頭。師古曰：武泉，雲中之縣也。養鳥獸者，通名爲苑，故謂牧馬處爲苑。

商顏溝洫志九

發卒萬人穿渠，自徵引洛水至商顏下。

師古曰：徵，音懲，卽今所謂澄城也。商顏，商山之顏也，謂之顏者，譬人之顏額也，亦猶山領象人之額領。

黔首。藝文志十。後漢光武紀。

師古曰。秦謂人爲黔首。言其頭黑也。又光武建武五年注。秦呼人爲黔首。謂奴爲蒼頭。以別於良人也。

鷩冠。藝文志。後漢志三十。

楚人居深山。以鷩爲冠。師古曰。以鷩鳥羽爲冠。

後漢志。武冠加雙鷩尾。豎左右爲鷩冠。五中郎將羽林左右監等皆冠鷩冠。鷩者。勇雉也。其鬪對一死乃止。故趙武靈王以表武事奉施之焉。

徐廣曰。鷩似黑雉。出於上黨。荀綽晉百官表注曰。冠插兩鷩。鷩鳥之暴疏者也。每所攫撮。應爪摧劓。天子武騎。故以冠焉。傅玄賦注曰。羽騎騎者戴鷩。

雉經。馮奉世傳贊四十九。

申生雉經。

師古曰。國語云。晉獻公黜太子申生。乃雉經於新城之廟。蓋爲俛頸閉氣而死。若雉之爲

牢讓。

牢讓爵位。

咀樂。王嘉傳五十六。



王嘉引藥杯以擊地曰三公負國當伏刑都市何謂咀藥而死。

師古曰咀嚼也。

劍璣王莽傳六十九上。

王莽爲新都侯就國孔休守新都相莽盡禮待之緣恩意進玉具寶劍欲以爲好休不肯受莽因曰誠見君面有瘢美玉可滅瘢欲獻其瑒卽解其瑒休復辭莽曰君嫌其價邪遂椎碎之自裹以進休休乃受及莽徵去欲見休休稱疾不見。

師古曰瘢創痕也服虔曰瑒音衛蘇林曰劍鼻也師古曰瑒本作璣後傳寫訛也瑒自彫瑒字耳音篆說文云劍鼻玉也從玉彘音直例反。

秒忽紋傳七十下。

元元本本數始於一產氣黃鍾造計秒忽。

劉德曰秒禾芒也忽蜘蛛網細者也師古曰秒音眇其字從禾。

置亭馮奉世傳劉屈氂傳又注。

師古曰置謂置驛之所也。

離飢寒蕭望之傳四十八。

邊郡數被兵離飢寒。

師古曰。離。遭也。

金選之品。蕭望之傳。

西羌反。張敞上書言。縣官穀度。不足以振之。度徒各反。願令諸有辜。非盜受財殺人及犯法不得赦者。皆得以差入穀贖罪。天子下其議。兩府丞相御史以難問敞。敞曰。因此令贖。其便明甚。何化之所亂。甫刑之罰。小過赦。薄罪贖。有金選之品。

師古曰。呂侯爲周穆王司寇。作贖刑之法。謂之呂刑。後改爲甫侯。故又稱甫刑也。應劭曰。選音刷。金銖兩名也。師古曰。音刷是也。字本作銖。銖卽鉞也。其重十二銖。二十五分銖之十三。一曰重六兩。呂刑曰。墨辟疑赦。其罰百銖。劓辟疑赦。其罰惟倍。荆辟疑赦。其罰倍差。宮辟疑赦。其罰六百銖。大辟疑赦。其罰千銖。是其品也。

名數。孔光傳五十一。

元帝賜霸第一區。徒名數於長安。

師古曰。名數。戶籍也。

首鼠兩端。田蚡灌夫傳二十二。

武安侯田蚡。始未貴時。往來侍酒於魏侯竇嬰所。跪起如子姓。及蚡貴。士吏趨勢利者。皆去嬰而歸蚡。蚡日益橫。灌夫者。父張孟。嘗爲灌嬰舍人。得幸。故蒙灌氏姓。吳楚反。夫父子俱有功武帝時。夫位至太

僕。後蚡請嬰城南田。嬰曰：老僕雖棄，將軍雖貴，寧可以勢相奪乎？不許。夫聞怒，蚡聞嬰，夫怒不與田，蚡亦怒。兩人有隙，蚡取燕王女爲夫人，嬰與夫俱往賀，遂縛夫居室，遣吏遂捕諸灌氏支屬，皆得棄市罪。嬰救夫，因言蚡短，兩人廷辨之，蚡罷朝，召御史大夫韓安國，怒曰：與長孺共治一秃翁，何爲首鼠兩端？嬰夫皆棄市。

師古曰：姓，生也。言同子禮若己所生也。居室署名，屬少府。長孺，安國字也。張晏曰：秃翁，言嬰年老嗜酒，頭秃，言當共治一秃翁也。服虔曰：首鼠，一前一卻也。

睢陽曲 梁孝王傳十七

梁孝王築東苑三百餘里，廣睢陽城七十里。

師古曰：更廣大之也。晉太康地記云：城方十三里。梁孝王築之，鼓倡節杵而後下，和之者稱睢陽曲。今踵以爲，故今之樂家睢陽曲，是其遺音。

# 兩漢博聞卷第五

請閒文帝紀 爰盎傳十九

代王至渭橋。羣臣拜謁。太尉勃進曰。願請閒。宋昌曰。所言公。公言之。所言私。王者無私。

師古曰。閒。容也。猶今言中間也。請容暇之頃。當有所陳。不欲於衆顯論也。又注云。欲因閒隙。私有所白也。

鳴鏑匈奴傳六十四上

冒頓作鳴鏑。令曰。鳴鏑所射。而不悉射者。斬已。而冒頓以鳴鏑自射其善馬。復射其愛妻。左右或莫敢射。皆斬之。後獵。以鳴鏑射煞其父頭曼自立。

應劭曰。鳴鏑。髡箭也。髡音呼交反。師古曰。曼音莫安反。

持滿匈奴傳

持滿。傳矢外鄉。

師古曰。傳。讀曰附。鄉。讀曰嚮。持滿。言滿引弓弩。注。矢外掉也。

駿驥冠佞幸傳六十三 司馬相如傳二十七上

孝惠時。侍中皆冠駿驥。貝帶。傅脂粉。

師古曰。以駿驥毛羽飾冠。海貝飾帶。駿驥即鷲鳥也。音峻儀。又相如傳注云。駿驥似山雞而小。冠背毛黃。腹下赤。項綠色。其尾毛紅赤。光采鮮明。今俗呼為山雞。其實非也。

餐霞。相如傳二十七下。

吸沆瀣兮餐朝霞。

應劭曰。列仙傳。陵陽子言。春食朝霞。日始欲出。赤黃氣也。夏食沆瀣。北方夜半氣也。并天地玄黃之氣為六氣。

倒景。相如傳。

貫列缺之倒景。

服虔曰。列缺。天閃也。人在天上。下向視日月。故景倒在下也。

郊祀志。登遐倒景。如淳曰。在日月之上。反從下照。故其影倒。

涓人。蒼頭軍。陳勝傳一。石奮傳十六。

陳勝既為其御莊賈所殺而降秦。勝故涓人將軍呂臣為蒼頭軍。起新陽。

應劭曰。時軍皆著青巾。故曰蒼頭軍也。師古曰。涓。潔也。涓人。主潔除之人。涓音蠲。石奮為高祖中涓。中涓官名。主居中而涓潔者。

上游。項籍傳一。匈奴傳。

項羽陽尊懷王爲義帝。曰：古之王者，地方千里，必居上游。徙之長沙，都郴。

文穎曰：居水之上流也。師古曰：游，卽流也。又匈奴傳：從上游來厭人。

拾芥。夏侯勝傳四十五。

夏侯勝每講授，常謂諸生曰：士病不明經術，經術苟明，其取青紫如俛拾地芥爾。

師古曰：地芥，謂草芥之橫在地上者，俛而拾之，言其易而必得也。青紫，卿大夫之服也。俛，卽俯字也。

天極。李尋傳四十五。

李尋云：紫宮極樞，通位帝紀。

孟康曰：紫宮，天之北宮也。極，天之北極星也。樞，是其迴轉者也。天文志曰：天極，其一明者，太一常居也。太一，天皇帝也。與通極爲一體，故曰通位帝紀也。

折膠。晁錯傳。

晁錯曰：陛下絕匈奴不與和親，臣竊意其冬來南也。欲立威者，使於折膠，來而不能困，使得氣去，後未易服也。

蘇林曰：秋氣至，膠可折，弓弩可用。匈奴常以爲候而出軍。師古曰：使得氣去者，使其得勝逞志氣而去。

賈豎。張良傳十。

張良曰：秦兵尙強，未可輕也。其將屠者子賈，豎易動以利，令持重寶啗秦將。

師古曰：商賈之人，志無遠大，譬如僮豎，故云賈豎。

長休告。丙吉傳四十四。

丙吉居相位，上寬大，椽史有罪，臧不稱職，輒予長休告。

師古曰：長給休假，令其去職也。

大府。張湯傳二十九。

大府，丞相府也。

方中。張湯傳。

張湯調茂陵尉，治方中。

蘇林曰：天子卽位，豫作陵，師古曰：古謂掘地爲阬曰方。今荆楚俗，土功築作，算程課者，猶以方計之。

爰書。張湯傳。

張湯劾鼠掠治，傳爰書訊鞠論報。

師古曰：傳謂傳遞，若今之追送赴對也。爰，換也。以文書代換其口辭也。訊，考問也。鞠，窮也。謂窮覈之也。論報，謂上論之而獲報也。

縣士炭。天文字志六。李尋傳。

天文志曰。冬至短極。縣土炭。炭動。麋鹿解角。蘭根出。泉水踊。

孟康曰。先冬至三日。縣土炭於衡。兩端輕重適均。冬至而陽氣至。則炭重。夏至而陰氣至。則土重。晉灼曰。蔡邕律歷記候。鍾律。權土炭。冬至陽氣應。黃鍾通。土炭輕而衡仰。夏至陰氣應。蕤賓通。土炭重而衡低。進退先後五日之中。

李尋曰。政治感陰陽。猶鐵之低仰。見效可信者也。

孟康曰。天文志云。縣土炭也。以鐵易土耳。先冬夏至。縣鐵炭於衡各一端。令適停。冬陽氣至。炭仰而鐵低。夏陰氣至。炭低而鐵仰。以此候二至也。

景星。天文志六。

景星。德星也。其狀無常。常出於有道之國。

舞知。乾沒。張湯傳。

張湯舞知以御人。始爲小吏。乾沒。與長安富賈田甲魚翁叔之屬交私。

師古曰。舞弄其智制御他人也。服虔曰。乾沒。射成敗也。如淳曰。豫居物以待之。得利爲乾。失利爲沒。

乾音干。

閒適。杜欽傳三十。

支庶有閒適之心。



師古曰。閒代也。音居覓反。適讀曰嫡。

綠車。金日磾傳三十八。王莽傳六十九上。

金敞爲衛尉。病甚。上拜其子涉爲侍中。使綠車載送衛尉舍。

晉灼曰。漢注。綠車名皇孫車。太子有子。乘以從。如淳曰。常置左右以待召。載皇孫。李奇曰。欲敞見其榮寵也。

王莽得乘綠車從。

師古曰。亦以寵之也。

珠襦。霍光傳三十八。

將廢昌邑王。太后被珠襦。盛服。坐武帳中。武士陛戟。陳列殿下。

晉灼曰。貫珠以爲襦。形若今革襦矣。師古曰。陛戟。謂執戟以衛陛下。

席勝。劄通傳十五。

乘利席勝。威震天下。

師古曰。席。因也。若人之在席上。

琅瑯。西域傳六十六上。後漢循吏傳序注。

軍候趙德使鬪賓。與鬪賓王陰末赴相失。陰末赴鎖琅瑯當德。殺副已下七十餘人。

師古曰。琅當。長鎖也。若今之禁繫人鎖矣。琅音郎。後漢注云。王莽一家鑄錢。保五人沒入爲官奴婢。男子檻車。女子步鐵鎖。琅當其頸。愁苦死者十七八。

橫行書。西域傳。

服虔曰。安息國橫行爲書記。師古曰。今西方胡國及南方林邑之徒。書皆橫行。不直下也。

尉薦。趙廣漢傳四十六。

趙廣漢爲二千石。以和顏接士。其尉薦待遇吏殷勤甚備。

師古曰。尉薦。謂安尉而薦達之。

童騎。張敞傳四十六。

出從童騎。

師古曰。以童奴爲騎而自從也。

便面。張敞傳。王莽傳。

張敞爲京兆尹。無威儀。時罷朝會。過走馬章臺街。使御史驅。自以便面拊馬。

師古曰。便面。所以障面。蓋扇之類也。不欲見人。以此自障面。則得其便。故曰便面。亦曰屏面。今之沙門所持竹扇。上裘平而下圓。卽古之便面也。音頻面反。

王莽常翳雲母便面。

金布令。蕭望之傳四十八。

金布令甲曰。邊郡數被兵。離飢寒。天絕天年。父子相失。令天下共給其費。

師古曰。同共給之也。自此以上。令甲之文。金布者。令篇名也。其上有府庫金錢布帛之事。因以篇名。令甲者。其篇甲乙之次。

犀利。馮奉世傳四十九。

羌戎弓矛之兵。耳器不犀利。

晉灼曰。犀。堅也。

千人司馬。馮奉世傳。

如淳曰。漢注。邊郡置都尉及千人司馬。皆不治民也。

畫象。武帝紀元光元年。

詔曰。昔在唐虞。畫象而民不犯。

應劭曰。二帝但畫衣冠異章服。而民不敢犯。師古曰。白虎通云。畫象者。畫其衣服象五刑。

度曲。元帝紀贊。

元帝多材藝。善史書。鼓琴瑟。吹洞簫。自度曲。被歌聲。

應劭曰。史書。周宣王太史籀所作大篆也。度曲。謂自隱度作新曲。因持新曲以爲歌詩聲也。荀悅曰。

被聲能播樂也。臣瓚曰：度曲謂歌終，更授其次，謂之度曲。西京賦曰：度曲未終，雲起雪飛，張衡舞賦亦曰：度終復位，次受二八，度音大各反。被音皮義反。

甲觀畫堂。成帝紀。

孝成皇帝，元帝太子也。母王皇后，元帝在太子宮，生甲觀畫堂。

如淳曰：三輔黃圖云：太子宮有甲觀。師古曰：甲者，甲乙丙丁之次。元后傳言見於丙殿，此其例也。畫堂但畫飾耳。霍光止畫室中，是則宮殿中通有彩畫之堂室。

祿祭。平帝紀。

元始五年，祿祭明堂。

應劭曰：禮五年而再殷祭，一禘一祿。祿祭者，毀廟與未毀廟之主，皆合食於太祖。郡將，嚴延年傳六十。

師古曰：謂郡守爲郡將者，以其兼領武事也。

股弁。嚴延年傳。

嚴延年爲涿郡太守，按大姓高氏獄，吏皆股弁。

師古曰：股戰若弁，弁謂撫手也。

縣度。西域烏秬國六十六上，西域圖志。

烏秣國其西則有縣度。去陽關五千八百八十八里。縣度者石山也。谿谷不通。以繩索相引而度。成帝時。屬賓國復遣使獻謝罪。漢欲遣使者報送其使。杜欽說大將軍王鳳曰。今縣度之阨。歷大頭痛。小頭痛之山。赤土身熱之阪。令人身熱無色。頭痛嘔吐。驢畜盡然。行者騎步相持。繩索相引。二千餘里。乃到縣度。其鄉慕不足以安西域。有求則卑辭。無欲則嬌嫚。終不可懷服也。

師古曰。縣繩度也。縣古懸字耳。

蝮飲。西域傳。

烏秣國山居。累石爲室。民接手飲。

師古曰。自高山下谿澗中飲水。故接連其手。如蝮之爲。

馬復令。西域傳。

當今務在禁苛暴。止擅賦。力本農。修馬復令。

師古曰。馬復因養馬以免徭賦也。復音方目反。

田輪臺渠犁。西域傳。

武帝初通西域。置校尉屯田渠犁。是時軍旅連出。海內虛耗。弘羊等奏言。故輪臺以東。撻枝渠犁。有溉田五千頃以上。臣以爲可遣屯田卒詣輪臺。以東置校尉三人分護。以時益種五穀。詔曰。今請遠田輪臺。起亭隧。是擾勞天下。非所以優民也。

師古曰。隧者。依深險之處。關通行道也。

儀形。王莽傳六十九上。

唯陛下儀形虞周之盛。

子午道。王莽傳

王莽以皇后有子孫瑞。通子午道。子午道從杜陵直絕南山。徑漢中。

張晏曰。時年十四。始有婦人之道也。子水午火也。水以天一爲牡。火以地二爲牡。故火爲水妃。今通

子午以協之。師古曰。子。北方也。午。南方也。言通南北道相當。故謂之子午耳。今京城直南山有谷通

梁漢道者。名子午谷。又宜州西界有山名子午嶺。計南北直相當。此則北山者是子。南山者是午。共

爲子午道。

跬步。王莽傳

進不跬步。

師古曰。半步曰跬。謂一舉足也。音空榮反。

毛摯。義縱傳六十。

義縱爲定襄太守。郡中不寒而栗。縱以鷹擊爲治。

師古曰。言如鷹隼之擊。奮毛羽。執取飛鳥也。

束溼甯成傳

甯成以郎謁者事景帝。好氣。爲少吏。必陵其長吏。爲人上。操下急如束溼。

師古曰。操執持也。束溼言其急之甚也。溼物則易束。操音千高反。

曲臺記。孟卿傳五十八。藝文志十。

后蒼說禮數萬言。號曰后氏曲臺記。

服虔曰。在曲臺校書著記。因以爲名。師古曰。曲臺殿。在未央宮。藝文志注。如淳曰。行禮射於曲臺。后

蒼爲記。故名曰曲臺記。漢官儀曰。大射于曲臺。晉灼曰。天子射宮也。西京無太學。於此行禮也。

大小戴。孟卿傳。

梁戴德延君。戴聖次君。德號大戴。聖號小戴。皆受經于后蒼。由是禮有大戴小戴之學。

驪駒。王式傳五十八。

諸博士共薦王式。詔除下爲博士。式徵來。諸大夫博士共持酒肉勞式。江公世爲魯詩宗。心嫉式。謂歌

吹諸生曰。歌驪駒。式曰。聞之師。客歌驪駒。主人歌。客毋庸歸。今日諸君爲主人。日尙早。未可也。遂謝病

免歸。

服虔曰。逸詩篇名也。見大戴禮。客欲去歌之。文穎曰。其辭云。驪駒在門。僕夫具存。驪駒在路。僕夫整

駕也。客毋庸歸者。庸用也。主人禮未畢。且無用歸也。

鬼廷柏。東方朔傳三十五。

東方朔曰。柏者鬼廷也。

師古曰。言鬼神尙幽闇。故以松柏之樹爲廷府也。

真宅。楊王孫傳三十七。

楊王孫病將死。先令其子曰。吾欲羸葬。以反吾真。且曰。死者物之歸也。精神者天之有也。形骸者地之有也。精神離形。各歸其真。夫裹以幣帛。鬲以棺槨。支體絡束。口含玉石。欲化不得。鬱爲枯腊。千載之後。棺槨朽腐。迺得歸土。就其真宅。遂羸葬。

銛笛。趙廣漢傳四十六。王溫舒傳六十。

趙廣漢爲潁川太守。先是潁川豪桀大姓。相與爲婚姻。吏俗朋黨。漢患之。出有案問。故漏泄其語。令相怨咎。又教吏爲銛笛。及得投書。削其主名。而託以爲豪桀大姓子弟所言。其後彊宗大族。結爲仇讐。姦黨散落。風俗大改。吏民相告。許廣漢得以爲耳目。

蘇林曰。銛音項。如餅。可受投書。孟康曰。笛。竹笛也。如今官受密事。笛也。師古曰。銛若今盛錢藏瓶。爲小孔。可入而不可出。或銛或笛。皆爲此制。而用受書。令投其中也。笛音同。王溫舒爲中尉。少年投銛。購告言姦。

負海。五行志七下之六。



秦大用民力轉輸起負海至北邊負海猶言背海也。  
隼五行志。

方制地理志八上。師古曰隼鷲鳥卽今之鵠也。鵠字音胡骨反。鵠與鶻同。

黃帝方制萬里畫楚分州得百里之國萬區方制以爲方域也。

日夜食五行志七下之下。李尋傳又注。

日夜食則無景立六尺木不見其景以此爲候。  
雒陽地理志八上。

師古曰魚篆云漢火行忌水故云洛水而加佳如魚氏說則光武已後改爲雒字也。

酒泉郡地理志八下。

酒泉郡武帝太初元年開。

應劭曰其水若酒故曰酒泉。師古曰舊俗傳云城下有金泉味如酒。

古瓜州地理志。

燉煌古瓜州也地生美瓜。

師古曰卽春秋左氏傳允姓之戎居于瓜州也其地今猶出大瓜長者狐入瓜中食之首尾不出。

靈州地理志

惠帝四年置有河奇苑號非苑。

師古曰苑謂馬牧也水中可居者曰洲此池在河之洲隨水高下未嘗淪沒故號曰靈州又曰河奇也二苑皆在北焉。

日南部地理志

故秦象郡武帝時更名屬交州。

耐刑。師古曰言在日之南所謂北戶以向日者。

高祖七年令郎中有罪耐已上請之。

耐。高帝紀。應劭曰輕罪不至于髡完其形鬢故曰耐。古從彡髮膚之意也。師古曰耐當音而耐謂頰旁毛也。

鬪。高帝紀。鬪毛若今髡及髡鬻之類也。鬪居例反。髡音曷。鬻音瞿。鬻音俞。說文云鬻鬻種綫之屬。蓋方言也。別注云鬪織毛爲布者。

略地高帝紀

凡言略地者皆謂行而取之用功力少。

葭莩之故王莽傳六十九 中山靖王傳二十三

王莽上言曰自諸侯王以下至於吏民咸知莽與陛下有葭莩

中山靖王曰今羣臣亦有葭莩之親鴻毛之重

晉灼曰葭莩裏之白皮也師古曰葭蘆也莩者其筩中白皮至薄者也葭莩喻著鴻毛喻輕薄甚也

前星五行志七下之下

大辰心也心爲明堂天子之象又星傳曰心大星天王也其前星太子也後星庶子也

河源西域傳六十六 張騫贊三十一

西域傳河有兩源一出葱嶺山一出于闐于闐在南山下其河北流與葱嶺河合東注蒲昌海蒲昌海

一名蓋澤者也去玉門陽關三百餘里廣袤三百里其水亭居冬夏不增減皆以爲潛行地下南出於

積石中國河又張騫傳贊曰禹本紀言河出崑崙山高二千五百餘里日月所相避隱爲光明也自張

騫使大夏之後窮河源惡睹所謂崑崙者乎故言九州山川尙書近之矣至禹本紀山經所有放哉尙

書曰導河積石在金城河關不言出崑崙也是謂河源出於積石

會稽禹穴九疑司馬遷傳三十二 司馬相如傳注

司馬遷自敘曰遷年十歲則誦古文二十而南游江淮上會稽探禹穴窺九疑

張晏曰禹巡狩至會稽而崩因葬焉上有孔穴民間云禹入此穴師古曰會稽山名本茅山也禹於

此會諸侯之計。因名會稽也。九疑山在零陵營道縣。舜所葬也。疑似也。山有九峯。其形相似。故曰九疑。

紫貝。相如傳二十七上。

釣紫貝。郭璞曰。紫貝。紫質黑文也。師古曰。貝水中介蟲。古以爲貨也。

珊瑚。相如傳。

郭璞曰。珊瑚。生水底石邊。大者樹高二尺餘。枝格交錯。無有葉。

家徒四壁。相如傳。

相如居成都。家徒四壁立。

師古曰。徒。空也。但有四壁。更無資產。

犢鼻。相如傳。

相如身自著犢鼻褌。

師古曰。卽今之松也。形似犢鼻。故以名云。松音之容反。

蜀徼。西南夷傳六十五。

巴蜀西南外蠻夷諸侯。秦時頗置吏焉。秦滅。漢興。皆棄此國。而關蜀故徼。

師古曰。西南之徼。猶北方塞也。徼音工釣反。張揖曰。徼。謂以木石水爲界者也。

請吏。一奇相如傳二十七下。西南夷傳。

邛笮之君長。聞南夷與漢通。得賞賜多。多欲願爲內臣妾。請吏比南夷。

南夷君長以十數。夜郎最大。武帝時。唐蒙往南粵。食蜀枸醬。問之。知牂柯江出番禺城下。歸上書說上。曰。竊聞夜郎所有精兵。可得十萬。浮船牂柯。出不意。此制粵一奇也。

流離。西域傳六十六上。

流離出罽賓國。

師古曰。魏略云。大秦國出赤白黑黃青綠縹紺紅紫十種流離。

變告。韓信傳四。

師古曰。凡言變告者。謂告非常之事。

持更。西域傳。

杜欽說王鳳曰。欲遣使報送罽賓國。使斥候七百餘人。五分夜擊刁斗自守。

師古曰。夜有五更。故分而持之。

附離。五行志七下之下。

成帝時。夜過中星隕。谷永曰。星辰附離于天。猶庶民附離王者也。王者失道。下將叛去。故星叛天而隕。以見其象。

監奴。霍光傳三十八

霍光愛幸監奴馮子都，常與計事。

師古曰：監奴，謂奴之監知家務者也。

甲令。宣帝紀地節四年。後漢皇后紀十上。

文穎曰：蕭何承秦法所作爲律令經是也。如淳曰：令有先後，故有令甲令乙令丙。師古曰：甲乙者，若今之第一第二篇耳。

後漢書：向使設外戚之禁，編著甲令，改正后妃之制，貽厥方來，豈不休哉。

試守。一切平帝紀元始元年。後漢齊武王續傳注。

平帝初卽位，詔二百石以上一切滿秩如真。

師古曰：時諸官有試守者，特加非常之恩，令如真耳。非凡除吏皆當試守也。一切者，權時之事，非經常也。猶如以刀切物，苟取整齊，不顧長短縱橫，故言一切。他皆倣此。

後漢注云：試守者稱職滿歲爲真。

昆明池。武帝紀元狩三年。

發謫吏穿昆明池。

臣瓚曰：西南夷傳有越巂昆明國，有滇池方三百里。漢使求身毒國而爲昆明所閉，今欲伐之，故作

昆明池。象之以習水戰。在長安西南。周回四十里。食貨志又曰。時越欲與漢用船戰。遂乃大脩昆明

池也。師古曰。謾吏。吏有罪者。罰而役之。滇音顛。

居延。武帝紀元狩二年。

將軍去病出北地二千餘里。過居延。

師古曰。居延。匈奴中地名也。

五屬國。武帝紀

匈奴昆邪王殺休屠王。并將其衆。合四萬餘人來降。置五屬國以處之。以其地爲武威酒泉郡。

師古曰。昆音下門反。屠音儲。凡言屬國者。存其國號。而屬漢朝。故曰屬國。武威今涼州也。酒泉今肅

州也。

詳延。武帝紀元朔五年。

詳延。天下方聞之士。咸薦諸朝。

師古曰。詳。悉也。延。引也。方。道也。聞。博聞也。言悉引有道博聞之士。而進於朝也。

鄜時。郊祀志五上。

時音止。神靈之所止也。秦文公夢黃蛇。自天下屬地。口止於鄜衍。作鄜時。祭白帝焉。

李奇曰。三輔謂山陵間爲時。

密時。郊祀志。

作鄭時。後八十四年。秦宣公作密時於渭南。祭青帝。

吳陽上下時。郊祀志。

自秦宣公作密時。後二百五十年。而秦靈公於吳陽作上時祭黃帝。作下時祭炎帝。自未作鄭時。而雍旁故有吳陽武時。雍東有好時。皆廢無祀。或曰。自古以雍州積高神明之隩。故立時。郊上帝。諸神祠皆聚云。又作吳陽上下時。後五十年。櫟陽兩金。秦獻公自以爲得金瑞。故作畦時。櫟陽而祀白帝。

師古曰。畦時者。如種韭畦之形。而於畦中各爲一土封也。畦音下圭反。

五時。郊祀志。

諸祠唯雍四時。上帝爲尊。高祖東擊項籍而還入關。問故秦時上帝祀何帝也。對曰。四帝有白青黃赤帝之祠。高祖曰。吾聞天有五帝。而四何也。莫知其說。於是高祖曰。吾知之矣。待我而具五也。乃立黑帝祠。名曰北時。有司進祠。上不親往。至文帝始幸雍郊。見五時。趙人新垣平以望氣見上。言長安東北有神氣成五采。若人冠冕焉。宜立祠上帝以合符應。於是作渭陽五帝廟。帝一殿。面五門。各如其帝色。祠所用及儀亦如雍五時。

木寓龍馬。郊祀志。

秦祠四時。每時用木寓龍一駟。木寓車馬一駟。各如其帝色。



李奇曰。寓寄也。寄生龍形於木也。師古曰。一駟亦四龍也。

三服官。元帝紀。

元初五年罷齊三服官。

李斐曰。齊國舊有三服之官。春獻冠幘。縱爲首服。紈素爲冬服。輕絹爲夏服。凡三。縱與纒同音。山爾反。

司馬門。元帝紀。

師古曰。司馬門者。宮之外門也。衛尉有八屯衛候司馬。主衛士徼巡宿衛。每面各二司馬。故謂宮之外門爲司馬門。

項籍傳。留司馬門三日。

師古曰。凡言司馬門者。宮垣之內。兵衛所在。四面皆有司馬。司馬主武事。故總謂宮之外門爲司馬門。

後漢趙王乾居父喪。白衣出司馬門。

注云。諸侯王宮門有兵衛。亦爲司馬門。

陽朔年。成帝紀。

河平四年。山陽火生石中。明年改元爲陽朔。

師古曰。朔始也。以火生石中。言陽氣之始。

微行。成帝紀。

鴻嘉元年。上始爲微行出。

張晏曰。於後門出。從期門郎及私奴客十餘人。白衣組纈。單騎出入市里。不復警蹕。若微賤之所爲。故曰微行。

陵夷。成帝紀。

帝王之道。日以陵夷。

師古曰。陵。邱陵也。夷。平也。言其顛替若邱陵之漸平也。又曰。陵遲亦如邱陵之透遲。稍卑下也。

客土。成帝紀。

詔曰。昌陵作治五年。百姓罷勞。客土疏惡。終不可成。

服虔曰。取他處土以增高爲客土。

枌榆社。郊祀志五上。

高祖禱豐枌榆社。

鄭氏曰。枌榆。鄉名也。社在枌榆。晉灼曰。枌。白榆也。社在豐東北十五里。師古曰。以此樹爲社神。因立名也。枌音符云反。

公社郊祀志

高祖令縣爲公社。

李奇曰公社猶官社。

官稷成帝紀

元始三年安漢公奏立官稷。

師古曰初立官稷於官社之後是爲一處今更創置建於別所不相從也。

榘櫨成帝紀河平四年

民爲水所流死不能自葬者令郡國給榘櫨葬埋。

師古曰榘櫨謂小棺榘音衛。

米鹽黃霸傳五十九成宣傳

黃霸爲潁川太守爲政米鹽靡密初若煩碎。

師古曰米鹽言雜而且細。

咸宜爲左內史其治米鹽。

銀黃三組楊僕傳六十

楊僕懷銀黃垂三組。

師古曰。銀、銀印也。黃、金印也。僕爲主爵都尉。又爲樓船將軍。并將梁侯三印。故三組也。組、綬也。  
郎中令。百官公卿表七上。

郎中令秦官。武帝更名光祿勳。

臣瓚曰。主郎內諸官。故曰郎中令。應劭曰。光、明也。祿、爵也。勳、功也。

中郎將。百官公卿表。

中郎有五官。左、右、三將。秩皆比二千石。

車戶騎三將。百官公卿表。

郎中有車戶騎三將。秩皆比千石。

如淳曰。主車曰車郎。主戶衛曰戶郎。漢儀注。左右車將主左右車郎。左右戶將主左右戶郎。

檻車。陳餘傳二。

貫高與趙王檻車詣長安。

師古曰。檻車者。車而爲檻形。謂以板四周之。無所通見。

絕亢。陳餘傳。

貫高絕亢而死。

師古曰。亢者。總謂頸耳。爾雅云。卽喉嚨也。音工郎反。

沐猴。項籍傳一。

人謂楚人沐猴而冠。

張晏曰。沐猴。獼猴也。師古曰。言雖著人衣冠。其心不類人也。

辟易。項籍傳。

楊喜爲郎騎。追項羽。羽還叱之。喜人馬俱驚。辟易數里。

師古曰。辟易。謂開張而易其本處。辟音頻亦反。

麗譙。陳勝傳一。

陳勝攻陳。戰譙門中。

師古曰。譙門。謂門上爲高樓以望耳。樓一名譙。故謂美麗之樓爲麗譙。譙亦呼爲巢。所謂巢車者。亦

於兵車之上爲樓以望敵也。譙巢聲相近。本一物也。

蒂芥。相如傳二十七上。賈誼傳。

吞若雲夢者八九。其於胷中。曾不蒂芥。

張揖曰。蒂芥。刺鯁也。賈誼傳注。師古曰。蒂芥。小鯁也。

攝弓。相如傳二十七下。

攝弓而馳。

師古曰。攝謂張弓注矢而持之也。攝。女涉反。  
騎置。西域傳六十六下。

事有便宜。因騎置以聞。

師古曰。騎置卽今之驛馬也。

斷匈奴左右臂。西域傳贊。後漢班超傳。

孝武之世。圖制匈奴。患其兼從西國。結黨南羌。迺表河曲列四郡。開玉門。通西域。以斷匈奴右臂。隔絕南羌月氏。單于失援。由是遠遁。而幕南無王庭。後漢班超曰。先帝開西域。議者皆曰。取三十六國。號爲斷匈奴右臂。

注云。哀帝時劉歆上議曰。武帝時立五屬國。起朔方。伐朝鮮。起玄菟。樂浪。以斷匈奴之左臂。西伐大宛。結烏孫。裂匈奴之右臂。南面以西爲右也。

分陝。王莽傳六十九中。

王莽時分陝立二伯。

師古曰。分陝者。欲依周公召公故事。自陝以東。周公主之。自陝以西。召公主之。

甌脫。匈奴傳六十四上。

東胡使使謂冒頓曰。匈奴所與我界。甌脫外棄地。匈奴不能至也。吾欲有之。

服虔曰。甌脫作土室。胡兒所作以候漢也。師古曰。境上候望之處。若今之伏宿舍也。甌音一侯反。脫

音土活反。

威斗。王莽傳六十九下。

王莽親之南郊。鑄作威斗。威斗者。以五石銅爲之。長二尺五寸。以厭勝衆兵。既成。令司命負之。莽出在前。入在御旁。

李奇曰。以五色藥石及銅爲之。師古曰。若今作鑰石之爲。

跂行喙息。匈奴傳

上及飛鳥。跂行喙息。蠕動之類。

師古曰。跂行。凡有足而行者也。喙息。凡以口出氣者也。跂音岐。喙音許穢反。蠕音人窆反。

豬其宮室。王莽傳六十九上

古者畔逆之國。既已誅討。則豬其宮室。以爲汗池。納垢濁焉。名曰凶虛。雖生菜茹。而人不食。

李奇曰。掘其宮以爲池。用貯水也。師古曰。豬謂畜水汗下也。汗音烏。所食之菜曰茹。

盱衡。王莽傳

盱衡厲色。振揚武怒。

孟康曰。眉上曰衡。盱衡舉揚目也。

校司馬南粵王傳六十五。

伏波將軍路博德討南粵。而南粵王趙建德亡入海。伏波遣人追。故其校司馬蘇弘得建德。

師古曰。校之司馬。若今之行軍總管司馬也。

受降城。匈奴傳。李陵傳二十四。

單于年少。好煞伐。左大都尉使人閒告漢曰。我欲殺單于降漢。漢聞此言。故築受降城。

李陵傳注。師古曰。受降城。公孫敖所築。



## 兩漢博聞卷第六

龍樓成帝紀十

成帝爲太子，初居桂宮，上嘗急召太子，出龍樓門。

師古曰：三輔黃圖，桂宮在城中，近北宮，非太子宮。張晏曰：樓上有銅龍，若白鶴飛廉之爲名也。  
枸醬西南夷傳六十五

唐蒙使南粵，食蒙蜀枸醬，蒙問所從來，曰：道西北牂柯江，江廣數里，出番禺城下，蒙歸至長安，問蜀賈人，獨蜀出枸醬，多持竊出市，夜郎者，臨牂柯江，江廣百餘步，足以行船，南粵以財物役屬，夜郎然亦不能臣使也。

晉灼曰：枸音矩，師古曰：子形如桑椹耳，緣木而生，非樹也，味尤辛，不酢，今宕渠則有之，食讀曰飲，舉白，敘傳七十上。

引滿舉白。

師古曰：引取滿觴而飲，飲訖舉觴告白，盡不也，一說白者，罰爵之名也，飲有不盡者，則以此爵罰之，魏文侯與大夫飲酒，令曰：不酺者浮以大白，於是公乘不仁，舉白浮君，是也。

白繆孝成趙皇后傳

鄭氏曰自縊也。師古曰繆絞也。居虬反。

戲戟。匈奴傳六十四下。

漢賜孝單于戲戟十。

師古曰戲戟有旗之戟也。戲許宜反。又音麾。

清狂。昌邑王傳三十三。

昌邑王清狂不惠。

蘇林曰凡狂者陰陽脉盡濁。今此人不狂似狂者。故言清狂也。或曰色理清徐而心不慧。曰清狂。清如白癡也。

著令。吳芮傳四。

高祖封吳芮長沙王。制詔御史長沙王忠。其定著令。

鄧展曰漢約非劉氏不王。而芮王。故著令中使將王也。或曰以芮至忠。故著令也。故贊云著于甲令而稱忠也。

支庶。吳芮傳。

孝惠高后時封吳芮庶子二人為列侯。故贊云慶流支庶。有以矣夫。

樵蘇。韓信傳四。

樵蘇後爨，師不宿飽。

師古曰：樵，取薪也。蘇，取草也。小雅白華之詩云：樵彼束薪。

食采。楊雄傳五十七上。刑法志三。

楊雄，其先出自周伯僑者，以支庶初食采於晉之楊，因氏焉。楊在河汾之間。

師古曰：采，官也。以官受地，謂之采地。應劭曰：左傳云：霍楊韓魏，皆姬姓也。刑法志注：師古曰：因官食地，故曰采地。

三輔號爲卿，王尊傳四十六。

如淳曰：三輔，皆秩中二千石，號爲卿也。

迹射士。王尊傳。

校尉傅剛，將迹射士千人，逐捕南山羣盜。

師古曰：迹射，言能尋跡而射取之也。射，食亦反。

布鼓。王尊傳。

王尊曰：毋持布鼓過雷門。

師古曰：雷門，會稽城門也。有大鼓，越擊此鼓，聲聞洛陽。布鼓，謂以布爲鼓，故無聲。

柱後惠文。張敞傳四十六。

應劭曰。柱後。以鐵爲柱。今法冠是也。一名惠文冠。晉灼曰。漢柱法冠也。一號柱後惠文。以纊裹鐵柱。卷。秦制。執法服。今御史服之。謂之獬廌。一角。今冠兩角。以獬廌爲名耳。纊。卽今方目紗也。纊。山爾反。卷。去權反。

榜掠。孫寶傳四十七。後漢陳寵傳附。

師古曰。榜掠謂笞擊而考問之也。榜音彭。

陳寵曰。獄者急於笞格酷烈之痛。

注云。笞卽榜也。古字通用。格擊也。又陳萬年傳。下獄掠治。注云。掠。擊也。力向反。

抱弩負蘭。韓延壽傳四十六。

如淳曰。蘭。盛弩箭箠也。師古曰。鞬鞞卽兜鞞也。蘭。盛弩矢者也。其形如木桶。鞬。丁奚反。鞞。莫侯反。

雞卜。郊祀志五下。

立粵祠而以雞卜。

李奇曰。持雞骨卜如鼠卜。

挺身逃。劉屈氂傳三十六。

師古曰。挺身引也。獨引身而逃難。

傅會。爰盎贊十九。

爰盎雖不好學，亦善傳會。

張晏曰：因宜附著合會之。

衣褐。張良傳。

師古曰：褐製若裘，今道士所服者是。

禁錢。買捐之傳五十四下。

賈捐之曰：往者暴師曾未一年，費四十餘萬，大司農錢盡，乃以少府禁錢續之。

師古曰：少府錢主供天子，故曰禁錢。

浩穰。張敞傳四十六。

長安中浩穰於三輔，尤爲劇。

師古曰：浩，大也。穰，盛也。言人衆之多也。穰，人掌反。

清閒之燕。蔡義傳三十六。

蔡義上疏曰：願賜清閒之燕，得盡精思於前，上召見說詩，甚說之。

師古曰：燕，安息也。閒，讀曰閑。

扼虎。命中李陵傳二十四。

力扼虎射命中。

師古曰。扼。謂捉持之也。命中者。所指名處卽中之也。

儲備。除舍。孫寶傳四十七。後漢肅宗紀。

御史大夫張忠辟孫寶爲屬。欲令授子經。更爲除舍。設備儲備。

師古曰。除。爲修飾掃除也。設備儲備。謂豫備器物也。備。文紀反。

後漢書云。南巡狩。詔所經道一郡縣。無得設備儲備。

注云。儲。積也。跣。具也。言不預有蓄備。

擿。孫寶傳。

傅太后怒曰。帝置司隸。使擿缺以揚我惡。我當坐之。

師古曰。擿。缺。謂挑發之。擿。他歷反。缺。音決。

以日易月。文帝紀後六年。

文帝遺詔曰。服大紅十五日。小紅十四日。織七日。釋服。

服虔曰。皆當言大功小功布也。織。細布衣也。應劭曰。紅者。中祥大祥以爲領緣。織者。禫也。凡三十六

日而釋服矣。此以日易月也。晉灼曰。漢書例以紅爲功也。師古曰。紅與功同服。晉二說是也。此喪制

者。文帝自率己意創而爲之。非有取於周禮也。何爲以日易月乎。三年之喪。其實二十七月。豈有三

十六月之文。禮又無七月也。應氏旣失之於前。而近代學者。因循謬說。未之思也。

檉柳胡桐白草。西域傳六十六上。

樓蘭國出玉多葭葦檉柳胡桐白草。

注云孟康曰白草草之白者胡桐似桑而多曲師古曰檉柳河柳也今謂之赤檉白草似莠而細無芒其乾熟時正白色牛馬所嗜也胡桐亦似桐不類桑也蟲食其樹而沫出下流者俗名爲胡桐淚言似眼淚也可以汗金銀工匠用之流俗語訛呼淚爲律檉丑成反。

臧緇食貨志四下。

萬室之邑必有萬鍾之臧。臧緇千萬。千室之邑必有千鍾之臧。臧緇百萬。春以奉耕。夏以奉耘。耒耜器械。種饟糧食。必有取澹焉。故大賈畜家。不得豪奪吾民矣。

孟康曰六斛四斗爲鍾。錢貫也。饟與餉同。謂餉田之具也。

都護。督察西域傳。

日逐王畔單于。將衆來降。護鄯善以西使者鄭吉迎之。既至。漢封日逐王爲歸德侯。吉爲安遠侯。因使吉并護北道。故號曰都護。都護之起。自吉置矣。都護督察烏孫康居諸外國。

師古曰都猶總也。言總護南北之道。督視也。

單于。文帝紀。匈奴傳六十四上。

單于者。廣大之貌也。言其象天單于然也。

師古曰。單于。匈奴天子之號。單音蟬。

突門。後漢竇融傳附。

注云。突門。守城之門。墨子曰。城百步爲一突門也。

日者。高帝紀。

師古曰。日者。猶往日也。

倒縣。賈誼傳十八。

賈誼曰。天下之執方倒縣。凡天子者。天下之首。何也。上也。蠻夷者。天下之足。何也。下也。今匈奴媿姆侵掠。至不敬也。而漢歲致金絮采繒以奉之。夷狄徵令。是主上之操也。天子供貢。是臣下之禮也。足反居上。首顧居下。倒縣如此。莫之能解。猶爲國有人乎。

碑碣。後漢竇憲傳附。

封神邱兮建隆碣。

注云。神邱。卽燕然山也。方者謂之碑。圓者謂之碣。碣亦碣也。其例反。

駝。項籍傳一。

羽駿馬名。

師古曰。蒼白雜毛曰駝。蓋以其色名之。



贈行。段會宗傳四十。

朋友以言贈行。

師古曰：贈行，謂將別相贈也。

炳管蕭。禮樂志三。郊祀歌。

李奇曰：管腸，閒脂也。蕭，香蒿也。師古曰：以蕭炳脂合馨香也。管，來彫反。炳，人說反。

柘漿。禮樂志樂府歌。

秦尊柘漿析朝醒。

應劭曰：柘漿，取其柘汁以爲飲也。醒，病酒也。析，解也。

贅培。賈誼傳十八。

秦人家富子壯則出分，家貧子壯則出贅。

應劭曰：出則贅培也。師古曰：謂之贅培者，言其不當出妻家，亦猶人身之有疣贅，非應所有也。贅之

銳反。扶問反。

隊帥。爰盎傳十九。

如淳曰：隊帥，軍中小官。

請室。賈誼傳。爰盎傳。

賈誼曰。大臣有鼻。白冠。鵲纓。盤水加劍。造請室而請鼻耳。

應劭曰。請鼻之室。蘇林曰。車駕出。有請室。令在前先驅。此官有別獄也。如淳曰。水性平。若已有正罪。君以平法治之也。加劍。當以自刎也。或曰。殺牲者以盤水取頸血。故示若此也。

爰盎傳云。人上書告絳侯反。時絳侯已就國。徵繫請室。

師古曰。請室。獄也。

兩宮。王莽傳六十九上。

師古曰。兩宮。謂成帝及太后也。

祖有功。景帝紀。

詔曰。古者祖有功而宗有德。

師古曰。祖。始也。始受命也。宗。尊也。有德可尊。

天郊。成帝紀。建始二年。

應劭曰。天郊。在長安城南。地郊。在長安城北。

款塞。宣帝紀。本始二年。

百蠻鄉風。款塞來享。

應劭曰。款。叩也。皆叩塞門來服從也。

什器。平帝紀。

師古曰。軍法。五人爲伍。二伍爲什。則其器物。故通謂生之具爲什器。亦猶今之從軍及作役者。十人爲火。共畜調度也。

除保父母同產令。元帝紀。

初元五年。詔除光祿大夫已下至郎中保父母同產之令。

應劭曰。舊時相保。一人有過。皆當坐之。師古曰。特爲郎中已上除此。今者所以優之也。同產謂兄弟也。

給事宮司馬中。元帝紀。

元帝詔。今從官給事宮司馬中者。得爲大父母。父母兄弟通籍。

應劭曰。司馬中者。宮內門也。司馬主武兵禁之意也。籍者。爲二尺竹牒。記其年紀名字物色。縣之宮門。案省相應。乃得入也。師古曰。從官親近天子常侍從者。皆是也。

四輔。谷永傳五十五。

師古曰。四輔謂左輔、右弼、前疑、後丞也。

瞽說。谷永傳。

聽矇昧之瞽說。

師古曰。瞽說言不中道若無目之人也。噫與暗同。

小學。杜鄴傳五十五。

杜鄴初從張吉學。吉子竦。又幼孤。從鄴學問。亦著於世。尤長小學。鄴子林。清靜好古。亦有雅才。其正文。字過於鄴。竦。故世言小學者由杜公。

師古曰。小學。謂文字之學也。周禮。八歲入小學。保氏教國子以六書。故因名云。藝文志載小學十家。三十五篇。

首歲。蕭望之傳四十八。

師古曰。首歲。歲之初。首謂正月也。

下走。蕭望之傳。

應劭曰。下走。僕也。師古曰。下走者。自謙言趨走之役也。又司馬遷報任少卿書曰。太史公。牛馬走。注云。言已爲太史公掌牛馬之僕。自謙之辭也。出文選。

望舒。楊雄傳五十七。

望舒彌轡。

師古曰。望舒。月御也。彌。斂也。言天子之車。斂轡徐行。故假望舒爲言耳。

結轍。文帝紀後二年。

使者冠蓋相望，結轍於道。

韋昭曰：使車往還，故轍如結也。

膠葛。

解難云：獨不見夫翠蚪絳螭之將登虛天，不階浮雲，翼疾風，虛舉而上升，則不能撼膠葛騰九閭。

師古曰：攬，揭也。膠葛，上清之氣也。九閭，九天之門。攬音戟，揭，居足反。

又甘泉賦：齊攢擗其相膠葛兮。

師古曰：膠葛猶言膠加也。

獲人，楊雄傳。

獲人亡則匠石斲斤，而不敢妄斲。

服虔曰：獲，古之善塗墍者也。施廣領大袖以仰塗，而領袖不汗，有小飛泥，誤著鼻，因令匠石揮斤而

斲之。知石之善斲，故敢使之也。師古曰：獲，杖拭也。故謂塗者爲獲人，獲，乃高反。

琴徽，楊雄傳。

師古曰：徽，琴徽也，所以表發撫抑之處也。

三宮，王嘉傳五十六。

師古曰：三宮，天子、太后、皇后也。

立樂府。

武帝定郊祀之禮。祠太一於甘泉。祭后土於汾陰。乃立樂府。采詩夜誦。以李延年爲協律都尉。多舉司馬相如等數十人。造爲詩賦。略論律呂。以合八章之調。作十九章之歌。以正月上辛用事甘泉圓邱。使童男女七十人俱歌。昏祠至明。夜常有神光如流星。止集于祠壇。天子自竹宮而望拜。

師古曰。樂府之名。蓋起於此。韋昭曰。竹宮以竹爲宮也。師古曰。采詩夜誦者。其言辭或祕不可宣露。故於夜中歌誦也。

百賈。王嘉傳。

師古曰。賈謂販賣之人也。

案脉。王嘉傳。

師古曰。案脉爲切脉也。

厭衆意。王莽傳。

莽欲厭衆意。

師古曰。厭。滿也。一豔反。

雅拜。何武傳五十六。

何武爲京兆尹。坐舉方正。所舉者召見。槃辟雅拜。有可以爲詭衆虛僞。武坐左邊。楚內史。

服虔曰。行禮容拜也。師古曰。槃辟。猶槃旋也。辟音闕。詭。遠也。

昆雞。司馬相如傳二十七上。

張揖曰。昆雞似鶴。黃白色。

靈鼈。相如傳。

樹靈鼈之鼓。

師古曰。以鼈皮爲鼓。

釋。王襄傳三十四下。

離疏釋蹠。而享膏粱。

應劭曰。離此蔬食。釋此木蹠也。師古曰。蹠。卽鞋也。居略反。史記。虞卿蹠蹠擔簦。說趙。注云。蹠。草履也。

褒成君。孔光傳五十一。

孔霸以選授太子經。元帝卽位。徵霸以師。賜爵關內侯。食邑八百戶。號褒成君。

如淳曰。爲帝師。教令成就。故曰。褒成君。

尺二牘。匈奴傳六十四上。

漢遣單于書。以尺一牘。中行說令單于以尺二寸牘。及印封皆令廣長大。倨驚其辭。以答漢。漢遣中行說使匈奴。而說不欲行。漢強使之。說遂降匈奴不歸。

高營貨殖傳六十一

丹、王君房、竒、樊少翁、王孫大卿爲天下高營。

師古曰：王君房、賣丹、竒、少翁及王孫大卿、賣竒，亦致高營。營讀與資同。

力政，游俠傳六十二，五行志七中之下。

戰國合從連衡，力政爭疆。

師古曰：力政者，棄背禮義，專任威力也。

天子微弱，諸侯力政。

師古曰：政亦征也。言專以武力相征討。

醜，郭解傳六十二。

郭解姊子，負解之勢，與人飲，使之醜，非其任，彊灌之，人怒，刺殺解姊子。

師古曰：盡爵曰醜，其人不能飲而使盡爵，乃強灌之，故怨怒也。醜，子笑反。

內朝外朝，劉輔傳四十七。

劉輔上書直諫，收繫庭祕獄，於是中朝左將軍辛慶忌、右將軍廉褒、光祿勳師丹、太中大夫谷永俱上書諫，得減死罪一等。

孟康曰：中朝，內朝也。大司馬、左右前後將軍、侍中、常侍、散騎諸吏爲中朝，丞相以下至六百石爲外



朝也。

傳漏。董賢傳六十三。

董賢傳漏在殿下。

師古曰。傳漏奏時刻也。

梁肉。霍去病傳二十五。食貨志四上。

師古曰。梁粟類也。米之善者。食貨志曰。梁好粟也。卽今之梁米也。

特將。去病傳。張良傳十。

衛青家爲特將者十五人。

師古曰。特將。謂獨別爲將而出征也。

高帝時。魏王豹反。使韓信特將北擊之。

師古曰。特獨也。專任之使將也。

渾殺。董仲舒傳二十六。

賢不肖渾殺。

注云。殺雜也。

邊穀。劉屈氂傳三十六。

如淳曰。戍邊卒糧也。

車丞相。車千秋傳三十六。

秋本姓田氏。爲丞相年老。上優之。朝見得乘小車入宮殿。因號曰車丞相。

譙讓。高帝紀。

樊噲譙讓項羽。

師古曰。譙。責也。才笑反。

月蝓日域。楊雄傳五十七下。

長楊賦。西厭月蝓。東震日域。

服虔曰。蝓。音窟。穴之窟。月蝓。月所生也。師古曰。日域。日初出之處也。

廉問。高帝紀五年。

高帝詔曰。且廉問。有不如吾詔者。以重論之。

師古曰。廉。察也。

詔。高帝紀。

如淳曰。詔。告也。自秦漢以下。唯天子獨稱之。

梟騎。高帝紀。

項羽未平北貉。燕人來致梟騎助漢。

應劭曰：北貉，國也。梟，健也。張晏曰：梟，勇也。若六博之梟也。師古曰：貉在東北方。三韓之屬，皆貉類也。莫客反。

兜離。後漢董祀妻傳附。

言兜離兮狀窈窕。

注云：兜離，匈奴言語之貌。

二斬。後漢曹世叔妻傳附。

禮。夫有再娶之義，婦無二適之文。故曰：夫者天也。

注云：儀禮曰：父在爲母，何以甚至尊，在不敢伸也。父必三年而後娶，達子志也。夫者，妻之天也。婦人，不二斬者，猶曰不二天也。

比落蒙全。後漢姜詩傳附。

姜詩至孝，赤眉賊經詩里，弛兵而過，曰：驚大孝，必觸鬼神。時歲荒，賊乃遺詩米肉，受而埋之。比落蒙其安全。

注云：比，近也。落，藩也。

楚歌。高帝紀。

漢圍項羽於垓下。羽夜聞漢軍四面皆楚歌。知盡得楚地。

應劭曰：楚歌者，雞鳴歌也。漢已略得其地，故楚歌者多雞鳴時歌也。師古曰：楚歌者爲楚人之歌，猶言吳歛越吟耳。若以雞鳴爲歌曲之名，於理則可不得云雞鳴時也。高祖令戚夫人楚舞，自爲作楚歌，豈亦雞鳴時乎？

顧山錢平帝紀元始元年

平帝詔天下女徒已論歸家，顧山錢月三百。

如淳曰：已論者，罪已定也。令甲女子犯罪，作如徒。六月，顧山遣歸。一說以爲當於山伐木，聽使入錢。顧山直，故謂之顧山。應劭曰：舊刑鬼薪，取薪於山，以給宗廟。今使女徒出錢顧薪，故曰顧山也。師古曰：如說近之。論女徒論罪已定，並放歸家，不親役之，但令一月出錢三百以顧人也。爲此恩者，所以行太后之德，施惠政於婦人。

體貌大臣賈誼傳十八

體貌大臣而厲其節也。

師古曰：體貌，謂加禮容而敬之也。

官師賈誼傳

官師小吏

師古曰。官師。一官之長也。

粟紅腐。賈捐之傳三十四下。

太倉之粟。紅腐而不可食。

師古曰。粟久腐壞。則色紅赤也。

上東門。賈誼傳。

雒陽上東門。

師古曰。東面最北門曰上東門。

跡前事。賈誼傳。

臣竊跡前事。

師古曰。尋前事之蹤跡也。

無狀子。杜欽傳三十。

紅陽侯與杜業書曰。誠哀老姊垂白。隨然狀子出關。

師古曰。無狀。猶言不肖也。

排擠。杜欽傳。

排擠英俊。

師古曰。擠墜也。

橐佗。匈奴傳六十四上。

師古曰。橐佗言能負橐囊而馱物也。

刑名。元帝紀。

宣帝所用多文法吏。以刑名繩下。

師古曰。劉向別錄云。申子學號刑名。刑名者。以名責實。尊君卑臣。崇上抑下。宣帝好觀其君臣篇繩。謂彈治之耳。

戚里。萬石君傳十六。

師古曰。於上有姻戚者皆居之。故名其里爲戚里。

廷見。萬石君傳。

石建奏事於上前。卽有可言。屏人乃言。極切至。廷見。如不能言者。

師古曰。廷見。謂當朝而見時。

議格。文三王傳十七。

大臣及爰盎等有所關說於帝。太后議格。

蘇林曰。音閣。

魁岸。江充傳十五。

爲人魁岸。

師古曰。魁。大也。岸者。有廉棱如崖岸之形。

微諫。伍被傳十五。

師古曰。私諫之也。

假吏。蘇武傳二十四。

蘇武使匈奴。有假吏常惠等。

師古曰。假吏。猶言兼吏也。時權爲使之吏。若今差人充使典矣。

官吏。外戚傳六十七下。

師古曰。宦吏。謂奄人也。

循江上。西南夷傳六十五。

將兵循江上。

師古曰。循。順也。謂緣江而上也。

# 兩漢博聞卷第七

阿房賈山傳

秦爲阿房之殿。

師古曰阿房者言殿之四阿皆爲房也。一說大陵曰阿言其殿高若於阿上爲房也。

韋帶賈山傳

布衣韋帶之士。

師古曰韋帶以單韋爲帶無飾也。

弧弓韓安國傳二十二

弧弓射獵。

師古曰以木曰弧以角曰弓。

魯縞韓安國傳

疆弩之末力不能入魯縞。

師古曰縞素也曲阜之地俗善作之尤爲輕細故以取喻也。

劇上賈山傳贊二十一



賈山自下劓上。卒免刑戮者。以其言正也。

孟康曰。劓上者。謂剗切之也。蘇林曰。劓音摩。厲也。師古曰。剗。工來反。

齧郟。王褒傳三十四下。

孟康曰。良馬低頭口至郟。故曰齧郟。

么麼。敘傳七上。

勇如信布。彊如項籍。威如王莽。然卒潤鑊伏鑕。亨醢分裂。又況么麼。尙不及數子。

師古曰。么麼。皆微之稱也。么。一堯反。麼。莫可反。

北叟。

北叟頗識其倚伏。

丹青之信。王莽傳。

明告以生活。丹青之信。

師古曰。生活。謂來降者不殺之也。丹青之信。言明著也。

渾元。敘傳。

渾元運物。

師古曰。渾元。天地之氣也。

椒除王莽傳

羣臣扶掖王莽自前殿南下椒除

服虔曰除殿陛之道也椒取芬香之名也

秦中婁敬傳

師古曰秦中謂關中故秦地也

東箱周昌傳十二

呂后側耳於東箱聽

師古曰正寢之東西室皆曰箱言似箱篋之形

大奴昌邑哀王傳

師古曰凡言大奴者謂奴之尤長大者也

南北軍七校刑法志三

漢初天下既定踵秦置材官於郡國京師有南北軍之屯至武帝平百粵內增七校外有樓船皆歲時

講肄脩武備云

晉灼曰百官表中壘屯騎步兵越騎長水胡騎射聲虎賁凡八校尉胡騎不常置故此言七也

飲泣賈捐之傳三十四下

飲泣巷哭。

師古曰：淚流被面，以入於口，故言飲泣也。

提封。東方朔傳三十五。

盤屋以東，宜春以西，提封頃畝，及其賈直。

師古曰：提封，謂提舉四封之內，總計其數也。

衲褐。賈馮博四十二。

衲褐不完。

師古曰：衲者，謂僮豎所著布長襦也。褐，毛布之衣也。衲音豎。

顯門。夏侯勝傳四十五。

夏侯建者，勝之從父子也。師事勝。勝非建章，句小儒，破碎大道，建亦非勝為學，疏略，難以應敵，建卒自

顯門。

社木。陸弘傳四十五。

師古曰：社木，社主之樹也。

菜色。翼奉傳四十五。

百姓菜色。

師古曰。人專食菜。故肌膚青黃。爲菜色也。

伏歷。李尋傳四十五。

馬不伏歷。不可以趨道。

師古曰。伏歷。謂伏槽歷而秣之也。

壺輿。敘傳七。

究先聖之壺輿。

應劭曰。宮中門謂之闈。宮中巷謂之壺。苦本反。

牛衣。王章傳四十六。

師古曰。牛衣。編亂麻爲之。卽今俗呼爲龍具者。

蹂躪。王商傳。

百姓奔走相蹂躪。訛言大水至也。

師古曰。蹂踐也。躪。轢也。蹂人九反。躪音蘭。

文母害。蕭何傳九。

蕭何以文母害爲沛主吏掾。

蘇林曰。無害言無比也。一曰。害。勝也。無能勝害之者。晉灼曰。酷吏傳。趙禹爲丞相亞夫吏。府中皆稱

其廉然亞夫不任。曰：極知禹無害，然文深不可以居大府。蘇說是也。師古曰：害，傷也。無人能傷害之者。蘇、晉兩說皆得其意。

豪吏。曹參傳九。

蕭何曹參並爲縣之豪吏。

師古曰：言爲吏之豪長也。

梟首。高帝紀四年。

漢王西入關，梟故塞王欣頭櫟陽市。

師古曰：梟，縣首於木上。

啗秦將。高帝紀秦三年。

漢王使酈食其、陸賈往說秦將，啗以利。秦將果欲連和。

師古曰：啗者，以食餽人。令其啗食徒濫反。今言以利誘之，取食爲譬。

甚亡謂也。高帝紀。

師古曰：亡謂者，失於事宜，不可以訓。

七大夫。高帝紀。

高帝詔曰：七大夫以上，皆令食邑。

臣瓚曰：秦制列侯乃得食邑，今七大夫以上皆食邑，所以寵之也。師古曰：七大夫，公大夫也。爵第七，故謂之七大夫。

省中，昭帝紀。

昭帝八歲卽位，帝姊鄂邑公主益湯沐邑，爲長公主，共養省中。

師古曰：以供養天子，故益邑也。伏儼曰：蔡邕云：本爲禁中，門閣有禁，非侍御之臣不得妄入行道。豹尾中亦爲禁中。孝元皇后父名禁，避之，故曰省中。師古曰：省，察也。言入此中皆當察視，不可妄也。

海丞、果丞，平帝紀。

元始元年，置少府海丞、果丞各一人。

師古曰：海丞主海稅，果丞掌諸果實也。

輪獵車，宣帝紀。

霍光廢昌邑王，太僕以輪獵車奉迎曾孫，是爲宣帝。嗣昭帝後。

文穎曰：輪獵，小車，前有曲輿，不衣也。近世謂之輪獵車。李奇曰：蘭輿，輕車也。是時未備天子車駕，故且取其輕便爾。

疇其爵邑，宣帝紀地節二年。

霍光薨，詔曰：大將軍功德茂盛，朕甚嘉之。復其後世，疇其爵邑。世世毋有所與。

張晏曰律非始封十減二疇者等也言不復減也師古曰與讀曰豫

年號武帝紀

武帝卽位年號建元元年

師古曰自古帝王未有年號始起於此

大要陳萬年傳三十六

陳咸謂其父曰具曉所言大要教咸調也

師古曰大要大歸也

射聲百官公卿表七上

射聲校尉掌待詔射聲士

服虔曰工射者也冥冥中聞聲則中之因以名也應劭曰須詔所命而射故曰待詔射也

大長秋百官公卿表

師古曰秋者秋成之時長者恆久之義故以爲皇后官名景帝時置皇后卿也

長信少府百官公卿表

長信詹事掌皇太后宮景帝更名長信少府

張晏曰以太后所居宮爲名也居長信宮則曰長信少府居長樂宮則曰長樂少府也

塊然。陳湯傳四十。

師古曰。塊然。獨處之意。如土塊也。

廉上。趙充國傳三十九。

辛武賢擊罕羌。入鮮水北。句廉上。

服虔曰。句音鉤。師古曰。句廉。謂水岸曲而有廉稜也。

倅馬。趙充國傳。

趙充國上屯田奏曰。至四月草生。發郡騎及屬國胡騎。伉健各千倅。馬什二。就草爲田者。遊兵。

師古曰。倅。副也。什二者。千騎則與副馬二百匹也。伉。口浪反。

薦草。趙充國傳。

今虜亡其美地。薦草。

師古曰。薦。稠草也。

刺舟。王莽傳六十九下。

師古曰。檝。所以刺舟也。

班輸。紋傳七十一。

班輸。推巧於斧斤。



師古曰班輸卽魯公輸班也。一說班魯班也。與公輸氏爲二人也。皆有巧藝也。故樂府云誰能爲此器。公輸與魯班推專也。一曰競也。推音角。

鷓鴣雀。黃霸傳五十九。

京兆尹張敞舍鷓鴣雀飛集丞相府。

師古曰此鷓音芬。本作鴝。此通用耳。鴝雀大而色青。出羌中。非武賁所著。武賁鷓者色黑。出上黨。以其鬪死不止。故用其尾飾武臣首。云今時俗人所謂鷓雞者也。音曷。非此鷓雀也。

胥靡。楚元王傳六。

楚王戊淫暴。申公、白生二人諫不聽。胥靡之。

胥灼曰。胥相也。靡隨也。師古曰。聯繫使相隨而服役之。故謂之胥靡。猶今之役囚徒。以鎖聯綴耳。部署。高帝紀。

漢王引兵東定三秦。部署諸將。

師古曰。分部而署置。

屬吏。昌邑哀王傳三十三。

昌邑王賀徵入嗣位。過弘農。使大奴善以衣車載女子。至湖。郎中令龔遂入問賀。賀曰。無有。遂曰。卽無有。何愛一善。以毀行義。請收以湔灑。大王卽粹善屬衛士長行法。

師古曰。以善付吏也。屬之欲反。湔澣也。灑灌也。湔。子顛反。灑。先禮反。粹。持頭也。衛士長主衛之官。粹才兀反。

博望苑。武五子傳三十三。

武帝爲戾太子立博望苑。使通賓客。

師古曰。取其廣博觀望也。

禱祝。武五子傳。

武帝年二十九乃得太子。甚喜。爲立禱。使東方朔。枚皋作禱祝。

師古曰。禱。求子之神也。禮。月令。祀于高禱是也。令朔等作祝禱之辭。

少府私府。路溫舒傳二十二。

路溫舒遷廣陽私府長。

師古曰。藏錢之府。天子曰少府。諸侯曰私府。長者其官之長也。

厄三七之間。路溫舒傳。谷永傳五十五。

路溫舒從祖父受歷數天文。以爲漢厄三七之間。

張晏曰。三七。二百一十歲也。自漢初至哀帝元年。二百一年也。至平帝崩。二百十一年。

成帝時。谷永曰。陛下承八世之功業。當陽數之標季。涉三七之節紀。直百六之災阨。

孟康曰陽九之末季也。至平帝乃三七二百一十歲之厄。今已涉向其節紀。師古曰直當也。

土著。張騫傳三十三。

身毒國在大夏東南。可數千里。其俗土著。

鄧展曰。毒音篤。李奇曰。一名天篤。卽浮屠胡是也。師古曰。卽敬佛道者也。土著者。謂有城郭常居。不隨畜牧移徙也。著。直略反。西南夷傳。身毒國卽天竺國也。

不得月支要領。張騫傳

張騫至大月支。留歲餘。還不得月支要領。

師古曰。要。衣要也。領。衣領也。凡持衣者。執要與領。言騫不得月支意趣。無以持歸漢。故以爲喻。要一遙反。

先容。鄒陽傳二十一。

蟠木根柢輪囷離奇。而爲萬乘器者。以左右先爲之容也。

師古曰。蟠木。屈曲之木也。萬乘器者。天子車輿之屬也。容。謂彫刻加飾。

七首。鄒陽傳

七首竊發。

師古曰。七首。短劔也。其首類七。便於用也。

寥廓之士。鄒陽傳。

師古曰。寥廓。遠大之度也。

糲食。司馬遷傳。

糲梁之食。

服虔曰。糲。粗米也。一斛粟七斗米爲糲。音賴。師古曰。食飯也。

杜陵男子。蕭育傳四十八。後漢楊彪傳四十四。

蕭育爲茂陵令。扶風怒曰。召諸後曹。當以職事對。育徑出。曹佐隨牽育。育案佩刀曰。蕭育杜陵男子。何詣曹也。

如淳曰。賊曹。法曹。皆後曹也。師古曰。欲以職事責之也。自言欲免官而去。但是杜陵一白衣男子耳。何須召我詣曹乎。

後漢曹操欲殺楊彪。孔融謂操曰。今橫殺無辜。海內觀聽。誰不解體。孔融魯國男子。明日便當拂衣而去。

押至。息夫躬傳十五。

軍書交馳而輻湊。羽檄重迹而押至。

師古曰。押至。言相因而至也。

侵牟。李廣利傳三十一。

將吏侵牟之。

師古曰。侵牟。言如牟賊之食苗也。

質木。地理志八下。

民俗質。

師古曰。質木者。無有文飾。如木石然。

虎牢。地理志八上。

成皋。注云。故虎牢。或曰制。師古曰。穆天子傳云。七萃之士生捕獸。卽獻天子。天子畜之。東號。號曰獸

牢。

句吳。于越。地理志八下。

師古曰。句音鉤。夷俗語之發聲也。亦猶越爲于越耳。

勃碣。地理志武帝紀元封元年注。

勃碣之閒。一都會也。

師古曰。薊縣。燕之所都也。勃。勃海也。碣。碣石也。此石著海旁。碣碣然特立之貌也。

三楚。高帝紀。

項羽自立爲西楚霸王。

孟康曰。舊名江陵爲南楚。吳爲東楚。彭城爲西楚。

罽罽。文帝紀七年。

未央宮東闕罽罽災。

如淳曰。東闕與其兩旁罽罽皆災也。晉灼曰。東闕之罽罽獨災也。師古曰。罽罽。謂連闕曲閣也。以覆重刻垣墉之處。其形罽罽然。一曰屏也。罽音浮。五行志注云。罽罽。闕之屏也。

卽拜。趙充國傳三十九。

上迺拜樂成侯許延壽爲強弩將軍。卽拜酒泉太守武賢爲破羌將軍。

師古曰。卽。就也。就其郡而拜之。

三始。鮑宣傳四十二。

如淳曰。正月一日爲歲之朝。月之朝。日之朝。始由朝也。

蕭然。食貨志四下。

江淮之間。蕭然煩費矣。

師古曰。蕭然。猶騷然。勞動之貌。

子母錢。食貨志。

周景王時，患錢輕，更鑄大錢。單穆公曰：不可。古者量資幣，權輕重以救民。民患輕，則爲之作重幣以行之。於是母權子而行，民皆得焉。若不堪重，則多作輕而行之，亦不廢重。於是子權母而行，小大利之。今王廢輕而作重，民失其資，能無匱乎？

應劭曰：母重也，其大倍，故爲母也。子輕也，其輕少半，故爲子也。民患幣之輕而物貴，爲重幣以平之。權時而行，以廢其輕，故曰母權子。猶言重權輕也。民皆得者，本末有無，皆得其利也。孟康曰：重爲母，輕爲子。若市八十錢物，以母當五十，以子當三十，續之。民患幣重，則多作輕錢而行之，亦不廢去重者。言重者行其貴，輕者行其賤也。

腹非，食貨志。

張湯奏當異九卿見令不便，不入言而腹非，論死。自是後有腹非之法比。

師古曰：比，則例也。

姦鑄，赤仄，食貨志。

郡國鑄錢，民多姦鑄，錢多輕，而公卿請令京師鑄官赤仄，一當五，賦官用，非赤仄不得行。

師古曰：姦鑄，謂巧鑄之雜鉛錫，應劭曰：赤仄，謂子紺錢也。如淳曰：以赤銅爲其郭也。今錢郭見有赤者，不知作法云何。師古曰：凡充賦及給官用，皆令以赤仄。

莢錢，食貨志。

漢興以爲秦錢重難用更令民鑄莢錢

如淳曰如榆莢也

八銖錢

高后紀

高后二年行八銖錢

應劭曰本秦錢質如周錢文曰半兩重如其文卽八銖也漢以其太重更鑄莢錢今民間名榆莢錢是也民患其太輕至此復行八銖錢

五分錢

高后紀

高后六年行五分錢

應劭曰所謂莢錢者

四銖錢

文帝紀五年

食貨志

孝文時以錢益多而輕乃更鑄四銖錢其文爲半兩除盜鑄錢令使民放鑄師古曰恣其私鑄也

賈誼諫曰令細民人操造幣之執各隱屏而鑄作姦錢日多其爲禍博矣

五銖錢

武帝紀 食貨志

武帝元狩五年罷半兩錢行五銖錢



食貨志。元狩五年。三官初鑄五銖錢。三官謂上林三官也。

契刀錯刀食貨志。

王莽居攝。變漢制。以周錢有母子相權。於是更造大錢。徑寸二分。重十二銖。文曰大錢五十。又造契刀。錯刀。契刀其環如大錢。身形如刀。長二寸。文曰契刀五百。錯刀以黃金錯其文曰一刀直五千。與五銖錢凡四品並行。

張晏曰。案今所見契刀錯刀。形質如大錢。而肉好輪厚異於此。大錢形如大刀環矣。契刀身形員。不長二寸也。其文左曰契。右曰刀。無五百字也。錯刀則刻之作字也。以黃金填其文。上曰一。下曰刀。二刀泉甚不與志相應也。以扎單差錯。文字磨滅。故耳。師古曰。王莽錢刀今並尙在。形質及文與志相合。無差錯。

連弩。李陵傳。

李陵發連弩射單于。

張晏曰。三十綦共一臂也。綦去權反。

便衣。李陵傳。

師古曰。謂著短衣小褻也。

一半冰。李陵傳。

李陵令軍士人持二升糒，一半冰。

師古曰：半讀曰判，判大片也。時冬寒有冰，持之以備渴也。

百金稅。朱建傳十三。

朱建母死，辟陽侯奉百金稅。

師古曰：贈終者之衣被曰稅。言以百金爲衣被之具。稅式芮反。其字從衣。

問遺。婁敬傳十三。

師古曰：問遺謂餉饋之也。

舍匿。淮南厲王傳十四。

舍匿者，論皆有法。

師古曰：舍匿謂容止而藏隱也。

發車封。淮南厲王傳。

不敢發車封。淮南厲王謀逆，赦死罪，載以輜車，令縣次傳。王不食而死。縣傳者不敢發車封。

孟康曰：檻車有封。

友培。嚴助傳三十四上。

嚴助對武帝曰：臣家貧，爲友培富人所辱。

師古曰。友壻。同門之壻也。

搏景。圭父偃傳三十四。

匈奴獸聚而鳥散。從之如搏景。

師古曰。搏擊也。搏人之陰景。言不可得也。

刷恥。貨殖傳六十一。

報彊吳。刷會稽之恥。

師古曰。刷。謂拭除之也。

埒富。豨頤傳。

與王者埒富。

師古曰。埒。等也。

稱之不容口。晏盎傳十九。

師古曰。稱美其德。口不能容也。

法宮。晁錯傳。

五帝神聖。處法宮之中。明堂之上。

如淳曰。法宮。路寢正殿也。

充賦。晁錯傳。

晁錯曰。以臣充賦。甚不稱明詔求賢之意。

如淳曰。猶言備數也。臣瓚曰。充賦。此錯之謙也。云如賦調也。

狐白。匡衡傳五十一。

夫富貴在身。而列士不譽。是有狐白之裘。而反衣之也。

師古曰。狐白。謂狐掖下之皮。其毛純白。集以爲裘。輕柔難得。故貴也。反衣之者。以其毛在內也。今人則以背毛爲裘。而棄其白。蓋取厚而溫也。衣於旣反。

隨牒。匡衡傳。

匡衡材智有餘。經學絕倫。但以無階朝廷。故隨牒在遠方。

師古曰。階。謂升次也。隨牒。謂隨選補之常牒。不被超擢者。

已然諾。灌夫傳二十二。

灌夫不好文學。喜任俠。已然諾。

師古曰。已。必也。謂一言許人。必信之也。

餐錢奉邑。高后紀二年。

列侯幸得賜餐錢奉邑。

韋昭曰。稅租奉祿。正所食也。四時得閒賜。是爲餐錢。餐。小食也。師古曰。餐。澹。同一字耳。于安反。澹。所謂吞食物也。餐錢。賜廚膳錢也。奉邑。本所食邑也。奉。扶用反。

# 兩漢博聞卷第八

大駕 法駕 小駕 輿服志二十九

胡廣漢制度曰天子出有大駕法駕小駕大駕則公卿奉引大將軍驂乘太僕御屬車八十一乘備千乘萬騎法駕八卿不在鹵簿唯河南尹執金吾洛陽令奉引侍中驂乘奉車郎御屬車四十六乘小駕太僕奉駕侍御史整車騎也

文始五行武德之舞 顯宗紀

永平三年 烝祭光武廟 初奏文始五行武德之舞

注云禮記曰冬祭曰烝烝衆也冬物畢成可祭者衆前書曰文始舞者本舜韶舞也高祖六年更名文始其舞者執羽籥五行者本周舞也秦始皇二十六年更名五行其舞者冠冕衣服法五行色武德者高祖四年作言行武以除亂也其舞者執干戚光武草創禮樂未備今始奏之

三老五更 顯宗紀永平一年

詔曰光武皇帝建三朝之禮而未及臨饗眇眇小子初行大射復踐辟雍尊事三老兄事五更三老李躬年耆學明五更桓榮授朕尚書其賜榮爵關內侯三老五更皆以二千石祿養終厥身

注云三朝之禮謂明堂辟雍靈臺也安車坐乘之車輓輪以蒲裹輪輓而覓反三老就車天子親執

綏授之。綏，車中把也。漢官儀曰：三老五更，皆取有首妻男女全具，用其德行年耆高者。三公一人爲三老，次卿一人爲五更，皆冠進賢，扶玉杖。其日，乘輿先到辟雍，遣使者安車迎三老五更。天子迎于門屏，交拜。三公設几杖，九卿正履。天子親袒割俎，執醬而饋，執爵而醑。五更南面，三公進供，禮亦如之。醬，醢也。

橫吹，班超傳三十七

拜班超爲將兵長史，假鼓吹幢麾。

注云：古今樂錄曰：橫吹，胡樂也。張騫入西域，傳其法於長安，唯得摩訶兜勒一曲。李延年因之，更造新聲二十八解，乘輿以爲武樂。後漢以給邊將，萬人將軍得之，在俗用者，有黃鶴隴頭、出關、入關、出塞、入塞、折楊柳、黃覃子、赤之楊、望行人十曲。橫吹，麾幢皆大將軍所有，超非大將，故言假。

小侯學，顯宗紀永平九年。

爲四姓小侯開立學校，置五經師。

注云：袁宏漢紀曰：爲外戚樊氏、郭氏、陰氏、馬氏諸子弟立學，號四姓小侯，以非列侯，故曰小侯。清宮，楊乘傳四十四，漢前文帝紀附。

王者至尊，警蹕而行，靜室而止。

注云：蹕，止行人也。靜室，謂先使清宮也。

文帝卽位，使太僕嬰、東牟侯與居，先清宮。

應劭曰：舊典天子行幸所至，必遺靜室，今先案行清靜殿中，以虞非常。

三鱣楊震傳四十四

有冠雀銜三鱣魚，飛集楊震講堂前，都講取魚進曰：蛇鱣者，卿大夫服之象也。數三者，法三台也。先生自此升矣。

注云：冠音貫，卽鸛雀也。鱣音善，鱣似蛇。臣賢案：續漢及謝承書，鱣字皆作鱣。然則鱣鱣古字通也。黃地黑文，故云卿大夫服象也。

三互蔡邕傳五十下

初朝議以州郡相黨，人情比周，乃制婚姻之家及兩州人士不得對相監臨。至是復有三互法。三互謂婚姻之家，兩州人不得交互爲官也。

鯨魚杵蒲牢，班固傳三十下，前漢楊雄傳附。

班固東都賦云：發鯨魚鏗華鍾，登玉輅，乘時龍。

注云：鯨魚杵，謂刻杵作鯨魚形也。鏗，謂擊之也。薛綜注西京賦云：海中有大魚名鯨，又有獸名蒲牢，素畏鯨魚。鯨魚擊蒲牢，蒲牢輒大鳴呼。凡鐘欲令其聲大者，故作蒲牢於其上。撞鐘者名爲鯨魚，鐘有篆刻之文，故曰華。



楊雄河東賦鳴洪鐘。

師古曰天子將出則撞黃鐘之鐘左五鐘皆應入則撞蕤賓之鐘右五鐘皆應。

周慮千列班固傳三十上。

注云宿衛之慮周於宮也千列言多也。

鈎陳班固傳。

周以鈎陳之位衛以嚴更之署。

注云周環也鈎陳紫宮外星也宮衛之位亦象之嚴更之署行夜之司也。

尺一詔李雲傳四十七陳藩傳五十六。

李雲書曰尺一拜用不經御省。

注云尺一之版謂詔策也。

陳蕃疏曰尺一選舉宜委尙書三公。

注云尺一謂板長尺一以寫詔書也。

肉刑郎顛傳二十下。

注云漢法肉刑三謂黥也劓也左右趾也文帝除之當黥者髡鉗城旦舂當劓者笞三百當左右趾

者笞五百。

輦車驪駕。

光武北征軍食急乏寇恂守河內以輦車驪駕轉輸前後不絕。

注云驪駕併駕也輦車人挽行也。

風角郎顛傳

郎顛學京氏易善風角星算。

注云京氏京房也作易傳風角謂侯四方四隅之風以占吉凶也星算謂天文算數也。

道家蓬萊山寶章傳十三

學者稱東觀爲老氏藏室道家蓬萊山。

注云老子爲守藏史復爲柱下史四方所記文書皆歸柱下言東觀經籍多也蓬萊海中神山爲仙

府幽經祕錄皆在焉。

中書伏湛傳十六

永和元年詔伏無忌與議郎黃景枝定中書五經諸子百家藝術。

注云中書內中之書也。

名馬式馬援傳十四

馬援善別名馬於交趾得駱越銅鼓乃鑄爲式還上之因表曰臣援常師事楊子阿受相馬骨法今欲

形之於生馬，則骨法難備具。孝武時，善相馬者東門京，東門姓也。京名也。鑄作銅馬法獻之，有詔立馬於魯

班門外，則更名魯班門為金馬門。臣謹依儀氏等數家骨相以為法，有詔置於宣德殿下，以為名馬式。

馬服君，馬援傳。

馬援，其先趙奢為將，號曰馬服君。子孫因為氏。

注云：馬服者，言能服馭馬也。史記曰：趙惠文王以奢有功，賜爵號馬服君。

汗簡，吳祐傳五十四。

吳祐父恢為南海太守，到官，恢欲殺青簡以寫經書，諫止之。

注云：殺青者，以火炙簡，令汗取其青，易書，復不蠹，謂之殺青，亦謂汗簡。

帝者諦也，李雲傳。

孔子曰：帝者諦也。

注云：審諦於物也。

治所，前漢朱博傳。

師古曰：刺史所止理事處。

黃綬，朱博傳。

師古曰：縣丞尉職卑，皆黃綬。

閒步。朱博傳。

朱博去吏閒步至廷尉下，零陳咸事。

師古曰：去吏，自解職也。閒步，謂步行而伺閒隙以去。

束脩之饋。第五倫傳三十一。

大夫無境外之交，束脩之饋。

注云：束脩，束帛也。脩，脯也。饋，遺也。

司馬法。孔融傳。

注云：齊威王使大夫追論古者司馬法，其法論田及兵之法也。

三閭。孔融傳。

注云：卽屈原也。掌王族三姓，曰昭、屈、景，故曰三閭。

鼓行。荀彧傳六十。

鼓行而前。

注云：謂鳴鼓而行，言無所畏也。

人品。郭泰傳五十八。

郭泰獎拔士人，皆如所鑒。

注云謝承書云秦之所名人品乃定先言後驗衆皆服之。

角立傑出徐穉傳四十三。

桓帝徵徐穉姜肱等並不至帝問陳蕃曰徐穉等孰爲先後蕃曰穉爰自江南卑薄之域角立傑出宜當爲先。

注云如角之特立也。

國憂。

奔國憂又曰來弔大憂。

禁民二業劉般傳二十九。

劉般上言曰郡國以官禁二業至有田者不得漁捕。

注云二業謂農者不得商賈也。

琴增二絃仲長統傳三十九。

注云三禮圖曰琴本五絃曰宮商角徵羽文王琴增曰少宮少商絃最清也。

去符傳寶同傳十三。

寶固出玉門擊西域詔耿秉及騎都尉劉張皆去符傳以屬固。

注云專將兵者並有符傳擬台之取信今去符傳皆受固之節度。

清詔第五倫傳三十一

第五倫永壽中以司徒掾清詔使冀州廉察災害舉奏刺史二千石以下

注云風俗通曰汝南周勃辟太尉清詔使荊州又此言以司徒清詔使冀州蓋三公府有清詔員以承詔使也

去就之槩周變傳序四十三

識去就之槩

注云槩節也候時以居不失去就也

前星廣陵思王傳三十二

注云天官書曰心前星太子之位也

征營鍾離意傳三十一

鍾離意上疏曰不勝愚贛征營罪當萬死

注云征營不自安也

當陽侯清河孝王傳四十五

注云當陽今荊州也

北寺獄千乘貞王傳

北寺獄名屬黃門署。前書音義曰：卽若盧獄也。

通儒俗儒。儒林傳十七。

注云：風俗通曰：儒者區也。言其區別古今。居先王之制。立當時之事。此通儒也。若能言而不能行。講誦而已。無能往來。此俗儒也。

伎數。桓譚傳十八。

小才伎數之人。

注云：伎方伎醫方之家也。數謂數術。史卜之官也。

奏記。班固傳三十上。

班固奏記於東平王蒼。

注云：奏進也。記書也。前書待詔鄭朋奏記於蕭望之。奏記自朋始也。

搜牢。董卓傳六十二。

董卓旣行廢立之事。是時洛中金帛家家殷積。卓縱放兵士剽虜資物。謂之搜牢。

注云：言牢固者。皆搜索取之也。

叟兵。董卓傳。

呂布軍有叟兵。內反。引李傕入城。

注云。叟兵則蜀兵也。漢代謂蜀爲叟。

百六有會。董卓傳贊。

百六有會。過剝成災。

注云。前書音義曰。四千五百歲爲一元。一元之中有九度。陽厄五。陰厄四。陽爲旱。陰爲水。初入元。百六歲有陽厄。故曰百六之會。

郿塢。南北塢。董卓傳。獻帝紀。皇甫規傳。

董卓築塢於郿。高厚七丈。號曰萬歲塢。積穀爲三十年儲。自云。事成。雖據天下。不成。守此。足以畢考。旣敗。塢中珍藏。有金二三萬斤。銀八九萬斤。錦綺紈素奇玩。積如邱山。

李傕移獻帝幸北塢。

注云。營居曰塢。一曰庫城。時帝在南塢。傕迎帝幸北塢。字林曰。塢。小障也。一曰小城。字或作隄。

鮮車怒馬。第五倫傳三十一。

第五倫爲蜀郡太守。蜀地肥饒。掾史家貲多至千萬。皆鮮車怒馬。以財貨自達。倫悉寵遣之。更選孤貧志行之人。以處曹任。

注云。怒馬。謂馬之肥壯。其氣憤怒也。



服練紅東海恭王傳三十二

宗室東海孝王臻兄弟並有篤行母卒皆吐血毀瘠至服練紅兄弟追念初喪父幼小哀禮有闕因復重行喪制

注云既祥之後而服練也禮記曰練衣黃裏繚緣繚淺絳也

八月賜羊酒鄭均傳十七

鄭均爲尙書以病乞骸骨拜議郎告歸元和元年詔曰鄭均前在機密以病致仕守善貞固黃髮不怠其賜均穀千斛常以八月長吏存問賜羊酒顯茲異行

注云東觀記曰賜羊一頭酒二斗終其身問遺賢良必以八月諸物老成故順其時氣助養育之也

三關馮衍傳十

上黨之地有四塞之固東帶三關西爲國蔽

注云三關謂上黨關壺口關石陘關也脛音形

天心郎顛傳二十

注云李巡曰北極居天心也居北方正四時謂之北辰也

傳國徐璆傳三十八

徐璆道爲袁術所劫術死軍破璆得其盜國璆還許上之

注云衛宏曰。秦以前以金玉銀爲方寸璽。秦以來天子獨稱璽。又以玉羣下莫得用。其玉出藍田山。題是李斯書。其文曰。受命于天。既壽永昌。號曰傳國璽。漢高祖定三秦。子嬰獻之。高祖卽位。乃佩之。王莽就元后求璽。后乃出以投地上。螭一角缺。及莽敗。李松送上更始。更始上赤眉。建武三年。盆子奉以上光武。孫堅入雒。敗董卓軍於城南。見井中有五色光。堅乃浚井。得璽。袁術拘堅妻求之。得璽。舉以向肘。時珍得而獻之。

紫微宮靈譜傳三十八。

注云。天。紫微宮。是上帝所居也。王者立宮。象而爲之也。

飛書。梁松傳二十四。

梁松怨望。乃縣飛書誹謗。下獄死。

注云。飛書者。無根而至。若飛來也。卽今匿名書也。

伊優抗讎。趙壹傳七十下。

趙壹詩云。伊優北堂上。抗讎倚門邊。

注云。伊優。屈曲佞媚之貌。抗讎。高伉偉直之貌也。佞媚者見親。故舛堂。偉直者見棄。故倚門。

彈碁。梁冀傳二十四。

梁冀能挽滿。彈碁。格五。六博。蹴鞠。意錢之戲。挽滿猶引強也。

注云藝經曰彈碁兩人對局白黑碁子各六枚先列碁相當更先彈也。

格五梁冀傳 吾邱壽王傳三十四附。

注云前書吾邱壽王善格五音義云籩也蘇代反說文曰行碁相塞謂之籩鮑宏籩經曰籩有四采塞四乘五是也至五卽格不得行故謂之格五。

六博梁冀傳。

注云鮑宏博經曰用十二碁六碁白六碁黑所擲頭謂之瓊瓊有五采按莊子云博塞以遊注云行五道而投瓊曰博不投瓊曰塞塞亦博類。

意錢梁冀傳 王符傳三十九。

注云何承天纂文曰詭億一曰射意一曰射數卽攤錢也。

王符潛夫論曰或以遊博持掩爲事。

注云博謂六博掩謂意錢也。

蹴鞠梁冀傳。

注云劉向列傳曰蹴鞠者傳言黃帝所作或曰起戰國之時蹴鞠兵勢也所以講武知有材也。

步驟曹褒傳三十五。

詔曰三五步驟優劣殊軌。

注云。孝經鉤命決曰。三皇步。五帝驟。三王馳。

掾屬。蓋延傳八。

蓋延身長八尺。彎弓三百斤。邊俗尚勇力。延以氣聞。歷郡列掾州從事。

注云。古者三公下至郡縣。皆有掾屬。續漢志曰。建武十八年。立刺史十三人。人主一州。皆有從事史。假佐。每郡皆置諸曹掾。郡中列掾非一。延並爲之。故言歷也。

甲乙科。射策。順帝紀陽嘉元年。

注云。前書音義曰。甲乙科。謂作簡策難問。列置案上。在試者意投射取而答之。謂之射策。上者爲甲。次者爲乙。若錄政化得失。顯而問之。謂之對策。

三獨坐。王常傳五。

注云。漢官儀曰。御史大夫。尚書令。司隸校尉。皆專席。號三獨坐。

景風。和帝永元三年。

和帝詔曰。高祖功臣。蕭曹爲首。曹相國後容城侯無嗣。宜求近親。須景風紹封。以章厥功。

注云。春秋考異郵曰。夏至四十五日。景風至。則封有功。

開氣。郎顛傳二十下。

郎顛曰。處士漢中李固。元精所生。王之佐臣。天之生固。必爲聖漢。

注云。元爲天精。謂之精氣。春秋演孔圖曰。正氣爲帝。閒氣爲臣。宮商爲佐。秀氣爲人也。

三統陳寵傳三十六

冬至之節。陽氣始萌。故十一月有闌射干芸荔之應。天以爲正。周以爲春。十二月。陽氣上通。雉雖雞乳。地以爲正。殷以爲春。十三月。陽氣已至。天地已交。人以爲正。夏以爲春。三微成著。以通三統。周以天元。殷以地元。夏以人元。若以此時行刑。則殷周歲首皆當流血。不合人心。不稽天意。

百戶牛酒肅宗紀元和二年

詔賜河南女子百戶牛酒。

注云。史記封禪書。百戶。牛一頭。酒十石。臣賢謂女戶頭卽今之女戶也。天子稱慶。恩當普洽。所以男戶賜爵。女子賜牛酒。

駭雞扉。西域大秦國傳七十八

注云。抱朴子曰。通天扉。有白理如縵者。以盛米。置羣雞中。雞欲往啄米。至輒驚卻。故南人名爲駭雞。設屏。齊王縡傳四。

人君正屏有所不聽。

注云。白虎通曰。所以設屏何。以自障也。示不極臣下之敬也。天子德大。故外屏。諸侯德小。故內屏。重繭。段熲傳五十五。

段熲與東羌戰，羌大敗，棄兵而走。追之三日三夜，士皆重繭。

注云：繭，足下傷起形如繭也。淮南子曰：申包胥曾繭重貳。

樞機，明德馬皇后傳十。

先帝防慎舅氏，不令在樞機之位。

注云：樞機，近要之官也。

太后臨朝，安思閹皇后傳十下。

注云：蔡邕獨斷曰：少帝即位，太后即代攝政。臨前殿，朝羣臣。太后東面，少帝西面，羣臣奏事上書皆

爲兩通。一詣后，一詣少帝。

關覽，張升傳七十下。

張升少好學，多關覽，而任情不羈。

注云：關涉也。不羈，謂超絕等倫不可羈束也。

柱天，齊王縝傳四。

齊王縝自稱柱天都部。

注云：柱天者，若天之柱也。

匿屏，李固傳五十三。

李固貌狀有奇表。鼎角匿犀。足履龜文。

注云。鼎角。頂有骨如鼎足也。匿犀。伏犀也。謂骨當額上入髮際隱起也。足履龜文者。二千石見相書。

僧牛逢萌傳七十三。

王君公僧牛自隱。

注云。口無二價。時人曰。避世牆東王君公。僧謂平會兩家賈買之價。

角力。魏器傳三。

注云。角力。爭力也。

慰藉。魏器傳。

隗囂上書詣闕。光武素聞其風聲。報以殊禮。言稱字。用敵國之儀。所以慰藉之良厚。

注云。慰。安也。藉。薦也。言安慰而薦藉之良甚也。

囊弓臥鼓。魏器傳。

注云。臥。猶息也。

章鉞。李固傳五十三。

李固誅弟子汝南郭亮。年始成童。遊學洛陽。乃左提章鉞。右秉鉄鑽。詣闕上書。乞收固屍。不許。

注云。章。謂所上章也。鉞。斧也。鉄鑽。鍤也。

懸師。皇甫規傳五十五。

皇甫規上疏乞自効。懸師之費。且百億計。

注云。懸猶停也。

銀艾。張奐傳五十五。

張奐曰。吾前後仕進。十要銀艾。

注云。銀印綠綬也。以艾草染之。故曰艾也。

晏開。耿國傳九。

使塞下無晏開之警。

注云。有警急。則開門晚也。

鐵券。祭遵傳十。

丹書鐵券。傳於無窮。

注云。鐵券。鐵契也。前書。高祖與功臣剖符作誓。丹書鐵契。

中藏。蓋勳傳四十八。

帝曰。吾多出中藏財物以餌士。何如。

注云。中藏。謂內藏也。



元元光武紀。

注云元元謂黎庶也。前書武帝詔勸元元師古曰元元善意。

左官丁鴻傳二十七。

丁鴻上封事曰左官外附之臣依託權門。

注云左官者人道尙右舍天子而事諸侯爲左官外附謂背正法而附私家。

韋帶周磐傳二十九。

周磐解韋帶就孝廉之舉。

注云以韋皮爲帶未仕之服也求仕則服革帶故解之。

殊死光武紀一上。

光武詔罪非犯殊死一切勿案。

注云殊死謂斬刑殊絕也左傳曰斬其木而弗殊一切謂權時非久制也。

史書安帝紀五。

安帝年十歲好學史書。

注云史書者史籀所作凡五十五篇可以教童幼。

生犀肅宗紀元和元年。

南徼外蠻夷獻生犀白雉。

注云。山海經曰。犀似牛而豬頭。黑色。交州記曰。犀有毛如豕。頭如馬。有三角。鼻上角短。額上頭上角長。異物志曰。角中特有光耀。白理如線。自本達末。則爲通犀。

六幽。肅宗紀章和元年。

光照六幽。

注云。六幽。謂六合幽隱之處。

廊廟之計。申居剛傳十九。

注云。廊。殿下屋也。廟。太廟也。國事必先謀於廊廟之所也。

從官。前漢元帝紀附。

永光五年秋。潁川水出。流殺人民。吏從官縣被害者與告。

晉灼曰。從官。卽上侍從之官也。言凡爲吏爲從官。其本縣有被害者。皆與休告。

# 兩漢博聞卷第九

六璽。紫泥。光武紀。建武三年。

赤眉君臣而縛奉光武以高帝璽綬。

注云。蔡邕獨斷曰。皇帝六璽。皆玉螭虎紐。文曰。皇帝行璽。皇帝之璽。皇帝信璽。天子行璽。天子之璽。天子信璽。皆以武都紫泥封之。玉璽譜曰。傳國璽。是秦始皇初定天下所刻。

通中枕。鍾離意傳三十一。

注云。蔡質漢官儀曰。尚書郎直入臺。中官供新青縑白綾被。晝夜更宿。帷帳。晝通中枕。臥旃蓐。冬夏隨時改易。太官供食。五日一美食。下天子一等。

方領。馬援傳十四。

注云。前書音義曰。頸下施衿領。正方。學者之服也。

鹿車。趙憲傳十六。

趙憲避赤眉兵。以泥塗友人韓仲伯婦面。載以鹿車。

注云。風俗通曰。鹿車窄小。載容一鹿。

文降。皇甫規傳五十五。

中外共誣皇甫規貨賂羣羌令其文降。

注云以文簿虛降非真心也。

重問王襲傳四十六。

舊典大臣不有大罪不至重問。

注云大臣獄重故曰重問成帝時丞相薛宣御史大夫翟方進有罪上使五二千石雜問音義曰大

獄重故以秩二千石五人同問之。

榮信竇武傳五十九。

取榮信閉諸禁門。

注云榮有衣戟也漢官儀曰凡居宮中皆施籍於掖門案姓名當入者本官爲封榮傳審印信然後受之。

回穴盧植傳五十四。

植上書曰今之禮記特多回穴。

注云回穴紆曲也。

投閒延篤傳五十四。

延篤書曰百家衆氏投閒而作。

糝。注云言誦經典之餘。投射閒隙。而翫百氏也。

糝。盧植傳。

植書云。周禮諸經。發起糝謬。

注云。糝。粟不成。喻義之乖僻也。

閼闕。章帝紀。

詔曰。每尋前世舉人貢士。或起剛敵。不鑿閼闕。

注云。明其等曰閼。積其功曰闕。言務取賢才。不拘門地。

嬰城。卓茂傳十五。

嬰城者相望。

注云言以城自嬰繞。

油戟。杜詩傳二十一。

杜詩。歲中三遷。爲侍御史。世祖召見。賜以檠戟。

注云。漢雜事曰。漢制假檠戟以代斧鉞。崔豹古今注曰。檠戟。前驅之器也。以木爲之。後代以赤油韜之。亦謂之油戟。王公已下通用之。

紫艾綬。馮魴傳二十三。

獲嘉侯馮石安帝寵之賜紫艾綬。

注云艾即熬綠色也其色似艾。

兼兩 吳祐傳五十四

吳祐諫其父欲殺青簡以寫經書曰此書若成則載之兼兩。

注云車有兩輪故稱兩也。

骨鯁 來歙傳五

注云骨鯁喻正直也說文曰鯁魚骨也食骨留咽中為鯁。

奕世 楊秉傳四十四

楊秉疏曰臣奕世受恩。

注云奕猶重也。

龜鼎 宦者傳六十八

宦者論云魏武因之遂遷龜鼎。

注云龜鼎國之守器以喻帝位也。

竹帛 和熹鄧皇后傳十

注云竹謂簡冊帛謂縑素。

鍛鍊。韋彪傳十六。

鍛鍊之吏。持心近薄。

注云。鍛。椎也。鍛。鍊。成熟也。言深文之吏。入人之罪。猶工冶陶鑄。鍛鍊使之成熟也。

時髦。

注云。髦。俊也。郭璞云。士中之俊。猶毛中之髦。

保阿傅士。順帝紀贊。

注云。保。安也。阿。倚也。言可依倚以取安。傅。姆之類也。傅士。謂阿母山陽君宋娥。更相貨賂。求增邑士也。

五營。順帝紀。

注云。五營。五校也。謂長永。步兵。射聲。胡騎。車騎等五校尉。

仙人山圖。西南夷傳七十六。

荜都夷者。武帝開之。土出長年神藥。仙人山圖所居焉。

注云。劉向列仙傳曰。山圖。隴西人。好乘馬。馬蹋折腳。山中道士教服地黃。當歸。羌活。玄參。服一年不

嗜食。病愈。身輕。道士自云。五岳使人之名山採藥。能隨吾。汝便不死。山圖隨之。莫知所終。

晨門。王襲傳論四十六。

晨門有抱關之夫。

注云。晨主守門。晨夜關閉也。史記侯嬴夷門抱關者。守門必抱關。故兼言之。

環玦。袁譚傳六十四下。

審配上書袁譚曰。願將軍熟詳吉凶。以賜環玦。

注云。絕人以玦。反人以環。

峭覈。第五倫傳論三十一。

第五倫峭覈爲方。

注云。峭覈謂其性峻急。好窮覈事情。

露布。李雲傳四十七。

李雲素剛。憂國將危。乃露布上書。移副三府。

謹案三府二字原本誤提行今更正書內此類不復一一注出

注云。露布。謂不封之也。并以副本上三公府也。

白越。明德馬皇后傳十。

馬太后賜諸貴人白越三千端。

注云。白越。越布也。



跋扈。朱浮傳二十三。

注云。跋扈猶暴橫也。又梁冀傳注。跋扈猶強梁也。

東園梓器。僖皇后傳十下。

屺皇后崩。斂以東園畫梓壽器。

注云。東園署名。屬少府。掌為棺器。梓木為棺。以漆畫之。稱壽器者。欲其久長也。猶如壽宮壽陵之類也。大臣薨亦多賜東園祕器。

采女。鄧皇后傳。

鄧皇后少入掖庭。為采女。絕幸。

注云。采擇也。因采擇而立名。

富於春秋。樂恢傳三十三。

注云。春秋謂年也。言年少春秋尚多。故稱富。

姑息。朱穆傳三十三。

注云。姑且也。息安也。小人之道。苟且取安也。

梗槩。杜篤傳七十。

杜篤曰。臣所欲言。陛下已知。故略其梗槩。

注云梗槩猶粗略也。

髻鬪。邊讓傳七十下。

注云髻剪髮爲髻也。鬪毀齒也。大戴禮曰男八歲而髻女七歲而鬪。

巨萬。鄧皇后傳十下。

賞賜巨萬計。

注云巨大也。大謂萬萬也。

轉張。董皇后傳十下。

汝今轉張。怙汝兄邪。

注云轉張猶彊梁也。

府帑。鄧訓傳六。

注云帑金帛所藏之府。

稽故。鄧訓傳。

擁衛稽故令不得戰。

注云稽故謂稽留事故也。

註誤。光武紀。

注云、誑、亦誤也、音挂。

浮屠、楚王英傳三十二。

注云、袁宏漢記、浮屠、佛也、西域天竺國有佛道焉、佛者、漢言覺也、將以覺悟羣生也、初明帝夢見金人、長大、頂有日光、以問羣臣、或曰、西方有神、其名曰佛、陛下所夢、得無是乎、於是遣使天竺、問其道術、而圖其形像焉。

伊蒲塞、桑門、仁祠、楚王英傳三十二。

顯宗詔、天下死罪皆入縑贖、楚王英奉黃縑白紬三十四贖罪、下詔曰、楚王誦黃老之微言、尚浮屠之仁祠、何嫌何疑、當有悔吝、其還贖以助伊蒲塞桑門之盛饌。

注云、伊蒲塞、卽優婆塞也、中華翻爲近住、言受戒行、堪近僧住也、桑門、卽沙門也、神道、中山簡王傳三十二。

中山簡王薨、詔大爲修冢、開神道。

注云、墓前開道、建石柱以爲標、謂之神道。

刀筆、劉盆子傳。

注云、古者記事於簡冊、謬誤者以刀削而除之、故曰刀筆。

輕車、楊賜傳四十四。

注云續漢書輕車古之戰車也。雕朱輪輿。不巾不蓋。苗矛戟幢麾。苗側事反。謂插也。  
伍伯。曹節傳六十八。

騎營五百。

注云。韋昭辯釋名曰。五百。字本爲伍伯。伍。當也。伯。道也。使之導引。當道陌中以驅除也。案今俗呼行杖人爲五百也。

充庭車。安帝紀。

永初四年正月元日。會徹樂。不陳充庭車。

注云。每大朝會。必陳乘輿法物。車輦於庭。故曰充庭車也。以年飢故不陳。

口賦。光武紀。

注云。漢儀注曰。人年十五至五十六。出賦錢。人百二十爲一算。又七歲至十四。出口錢。人二十。以供天子。至武帝時。又口加三錢。以補車騎馬。

旄頭騎。光武紀。

注云。漢官儀曰。舊選羽林爲旄頭。被髮先驅。魏文帝列異傳曰。秦文公時。梓樹化爲牛。以騎擊之。騎不勝。或墮地。髻解被髮。牛畏之入水。故秦因是置旄頭騎。使先驅。

長檄。安帝紀。

民訛言相驚，窮困道路，若欲歸本郡，在所爲封長檄。

注云：印封之也。長檄猶今長牒。欲歸者皆給以長牒爲驗。

葆車，光武紀。

注云：葆車，謂上建羽葆也。合聚五采羽名爲葆。

烽燧，光武紀。

注云：邊方備警急，作高土臺，臺上作桔臬，桔臬頭有兜零，以薪草置其中，有寇即燃火相告，曰烽。又

多積薪，寇至即燔之，望其烟曰燧。晝則燔燧，夜乃舉烽。兜零，籠也。

同門學，張酺傳三十五。

注云：張酺從祖父充，與光武同門學。光武卽位，求問充，充已死。又前漢孟喜傳注云：同門，同師學者

也。

甄表門閭。

甄表門閭，旌顯厥行。

注云：甄，明也。旌，章也。里門謂之閭。旌表者，若今樹闕而顯之。

苛政，光武紀。

注云：說文曰：苛，小草也。言政令繁細。

羽檄光武紀

注云魏武奏事云若有急即插以雞羽謂之羽檄

三河光武贊

注云河南河北河東也

殿最光武紀

注云殿後也謂課居後也最凡要之首言課居先也

鉗鈇光武紀

建武二十二年詔赦徒皆弛解鉗衣絲絮

注云弛解脫也鈇足鉗也徒計反又大蓋反在徒役者不得衣絲絮今赦許之

輿地圖光武紀

注云廣雅曰輿載也言載在地者皆圖畫之

制詔光武紀

注云漢制度曰帝之下書有四一曰策書二曰制書三曰詔書四曰誡敕

赤草光武紀

中元元年赤草生於水崖

注云赤草朱草也。大戴禮曰朱草日生一葉。至十五日已後日落一葉。周而復始。

幕南。光武紀。

匈奴北徙幕南地空。

野穀旅生。光武紀。

注云旅寄也。不因播種而生。故曰旅。

亭候。光武紀。

注云亭候伺候望敵之所。前書曰秦法十里一亭。亭有長。漢因之不改。

牙門。袁紹傳六十四上。

麴義乘勝到公孫瓚營拔其牙門。

注云真人水鏡經曰凡軍始出立牙竿必令完堅。若有折將軍不利。牙門旗竿軍之精也。卽周禮軍

旅會同置旌門是也。

衿帶。杜篤傳七十。

關梁之險多所衿帶。

注云衿帶衣服之要。故以喻之。

閒關。荀彧傳論六十。

荀君乃越河冀，閒關以從曹氏。

注云：閒關，猶展轉也。又前書：王邑戰敗，馳入宮，閒關至漸臺。注云：閒關，猶言崎嶇展轉也。

投纆，吳祐傳五十四。

投纆而死。

注云：謂以繩為纆，投之而縊也。纆，胡犬反。

庶孽，杜喬傳五十三。

注云：孽，賤也。猶樹之有孽生也。

大較，延篤傳五十四。

注云：較，猶略也。

輜重，光武紀。

注云：釋名曰：輜，厠也。謂軍糧什物雜厠載之，以其累重，故稱輜重。重，直用反。

屠唐鄉，光武紀高帝紀注附。

光武進屠唐子鄉。

注云：多所誅殺曰屠。唐子鄉，地名。

師古曰：屠，謂破取城邑，誅其人如屠六畜然。



中堅。光武紀。

衝其中堅。

注云。凡軍事。中軍將最尊。居中。以堅銳自輔。故曰中堅。

雲車。光武紀。

注云。雲車。即樓車。稱雲。言其高也。升之以望敵。猶公輸般為雲梯之械。

武關山為地門。劉盆子傳。

注云。武關。在今商州上洛縣東。河圖括地象曰。武關山為地門。上為天齊星。下為文宿辰。

樓車。光武紀。

或為地道。衝。衝。撞城。

注云。衝。撞車也。輞。樓車也。

面縛。光武紀。

注云。面。背也。謂反背而縛之。

占書。袁敞傳三十五。

張俊自獄中占獄吏。上書自訟。

注云。占。謂口授也。前書。陳遵憑几口占書吏。是也。

盤孟銘。朱穆傳三十三。

古之明君，必有輔德之臣，規諫之官，下至器物，銘書成敗，以防遺失。

注云：黃帝作巾机之法，孔甲有盤孟之誠，太公陰謀曰：武王衣之銘曰：桑蠶苦，女工難，得新捐故，後必寒。鏡銘曰：以鏡自照者見形容，以人自照者見吉凶。觴銘曰：樂極則悲，沈湎致非，社稷爲危也。

章奏。胡廣傳三十四。

注云：周成雜字曰：牋，表也。漢雜事曰：凡羣臣之書通於天子者四品，一曰章，二曰奏，三曰表，四曰駁。章者，需頭稱稽首上以聞，謝恩陳事，詣闕通者也。奏者，亦需頭，其京師官但言稽首言，下稽首以聞，其中有所請，若罪法効案，公府送御史臺，卿校送謁者臺也。表者，不需頭，上言臣某言，下言誠惶誠恐頓首頓首死罪死罪，左方下附曰：某官臣甲乙上。

嚴棘。寇榮傳六。

尚書背繩墨，案空劾，不復質，确其過，寘於嚴棘之下。

注云：質，正也。确，質也。若角反。嚴棘，謂獄也。易曰：繫用徽墨，寘于叢棘。

珠書祕器。袁安傳三十五。

袁逢卒，賜以珠書，特詔祕器。

注云：前書：董賢死，以沙畫棺。音義云：以朱沙畫之也。珠與朱同。祕器，棺也。董賢傳：沙畫棺，以朱砂塗。

之而又雕畫也。

賜胙。鄧彪傳三十四。

注云。胙。祭廟肉也。禮。凡預祭。異姓則歸之胙。同姓則留之。宴。不預祭而賜胙。重之也。

江沔。荀彧傳六十。

注云。沔。卽漢水也。孔安國曰。漢上爲沔。

酒罏。孔融傳六十。

注云。罏。累土爲之。以居酒瓮。如鍛罏。故名罏。字或作壚。

縣廷。郭太傳五十八。

郭太早孤。母欲使給事縣廷。

注云。蒼頡篇曰。廷。直也。說文。廷。朝中也。風俗通云。廷。正也。言縣廷郡廷朝廷。皆取平均正直也。

梁益。獻帝紀。

建安十八年。復禹貢九州。

注云。兗。豫。青。徐。荆。揚。冀。益。雍也。九數雖同。而禹貢無益州。有梁州。然梁益亦一地也。前漢武帝置十

三部刺史。改雍曰梁。改梁曰益。

喉舌之官。李固傳五十三。

李固曰。陛下之有尚書。猶天之有北斗也。斗爲天喉舌。尚書亦爲陛下喉舌。斗斟酌元氣。運平四時。尚書出納王命。賦政四海。賦布也。

注云。春秋合誠圖曰。天理在斗。中司三公。如人喉在咽。以理舌。語。宋均曰。斗爲天之舌口。主出政教。三公主導宣君命。

# 兩漢博聞卷第十

金馬碧雞西南夷傳九十六 前漢王褒傳

越巂郡青蛉縣禹同山有碧雞金馬光景時時出見

注云禹同山在今襄州揚波縣王褒碧雞頌曰持節使王褒謹拜南崖敬移金精神馬縹碧之雞處南之荒深谿回谷非土之鄉歸來歸來漢德無疆廉平唐虞澤配三皇華陽國志曰碧雞光景人多見之前書音義曰金形似馬碧形似雞也

方士言益州有金馬碧雞之寶可祭祀致也宣帝使褒往祀焉褒於道病死

火毳西南夷傳

注云火毳卽火浣布也神異經曰南方有火山長四十里廣四五里生不燼之木晝夜火燃得烈風不猛暴雨不滅火中有鼠重百斤毛長二尺餘細如絲常居火中時時出外而色白以水逐沃之卽死續其毛織以作布用之若汗以火燒之則清潔也傅子曰長老說漢桓時梁冀作火浣布單衣會賓客行酒公卿朝臣前佯爭酒失杯而汗之冀僞怒解衣燒之布得火燂然而熾如燒凡布垢盡火滅粲然潔白如水澣也

虎魄枕西南夷傳

注云廣雅曰虎魄生地中其上及旁不生草深者八九尺大如斛削去皮成虎魄如斗初時如桃膠凝堅乃成其方人以爲枕出鬪賓及大秦國博物志曰松脂淪入地千年化爲茯苓茯苓千歲化爲虎魄今太山有茯苓而無虎魄永昌有虎魄而無茯苓

猩猩西南夷傳

注云酈元水經注曰猩猩形若狗而人面頭顏端正善與人言音聲妙麗如婦人對語聞之無不酸楚南中志曰猩猩在山谷中行無常路百數爲羣土人以酒若糟設於路又喜羸子土人織草爲屨數十量相連結猩猩在山谷見酒及屨知其設張者卽知張者先祖名字乃呼其名而罵云奴欲張我捨之而去去而又還相呼試共嘗酒初嘗少許又取羸子著之若進兩三升使大醉人出收之羸子相連不得去執還內牢中人欲取者到牢邊語云猩猩汝可自相推肥者出之旣擇肥竟相對而泣卽左思賦云猩猩啼而就禽者也昔有人以猩猩餉封溪令人問餉何物猩猩自於籠中曰但有酒及僕耳無他飲食

鈎黨史弼傳五十四

注云鈎謂相連也又靈帝紀注鈎謂相牽引也

河潼傳贊五十五

注云潼谷名谷有水曰潼水卽潼關

貂獸西南夷傳

注云南中八郡志曰貂大如驢狀頗似熊多力食鐵所觸無不拉廣志曰貂色蒼白其皮温煖

蚌蛛西南夷傳

注云徐衷南方草物狀曰凡採珠常三月用五牲祈禱若祠祭有失則風攪海水或有大魚在蚌左右蚌珠長三寸半凡三品珠也

枕榔麩西南夷傳

牂牁句町縣有枕榔木可以爲麩百姓資之牂牁卽夜郎也楚項襄王遣將莊豪滅夜郎改其名爲牂牁

注云臨海異物志曰枕榔木外皮有毛似枳櫚而散生其木剛作鉄鋤利如鐵中石更利唯中焦根乃致敗耳皮中有似擣稻米片又似麥麩中作餅餌廣志曰枕榔樹大四五圍長五六丈洪直旁無枝條其顛生葉不過數十似櫻葉破其木肌堅難傷入數寸得麩赤黃密緻可食

徽墨西羌論七十七

女婦則徽墨而爲虺

注云徽糾繩也纏索也

都亭王美人傳十下

王美人兄斌遷執金吾封都亭侯。

注云。凡言都亭者。並城內亭也。漢法。大縣侯位視三公。小縣侯位視上卿。鄉亭侯位視中二千石。

長秋宮。明德馬皇后傳上。

永平三年春。有司奏立長秋宮。

注云。皇后所居宮也。長者。久也。秋者。萬物成熟之初也。故以名焉。請立皇后。不敢指言。故以宮稱之。

葱嶺。西域傳論七十八。

注云。葱以山名也。西河舊事云。其山高。大生葱嶺。故名。天竺記云。葱嶺。冬夏有雪。有毒龍。若犯之。則

風雨晦冥。飛砂揚礫。過此者。萬無一全。

雪山。班超傳三十七。明帝永平十七年十六年。

注云。西河舊事曰。白山之中。有好木。又郭義恭廣志曰。西域有白山。通歲有雪。亦名雪山。

注云。冬夏有雪。故曰白山。匈奴謂之天山。過之。皆下馬拜。去蒲類海百里。

寶固破呼衍王於天山。

注云。呼衍。匈奴王號。天山。卽祈連山。一名雪山。今名折羅漢山。在伊州北。祈音時。

龍沙。班超傳。

安定慷慨。專功西遐。坦步葱雪。咫尺龍沙。



注云。白龍堆沙漠也。

前漢匈奴傳注孟康曰。白龍堆形如土龍身。無頭有尾。高大者二三丈。墜者丈餘。皆東北向相似也。在西域中。

聖旣。大秦國傳七十八。

列置郵亭。皆聖旣之。

注云。聖旣也。火旣反。郭璞曰。聖。白土也。音惡。

原羊。鮮卑傳八十。

鮮卑出野馬原羊。

注云。郭璞注爾雅曰。原羊。似吳羊而大角。出西方。

三臺。袁紹傳六十四上。

注云。漢官。尚書爲中臺。御史爲憲臺。謁者爲外臺。

渾儀。顯宗紀永平三年。

登靈臺。見史官正儀度。

注云。儀謂渾儀。以銅爲之。置於靈臺。王者正天文之器也。度謂日月星辰之行度也。史官卽太史。掌天文之官也。

螟蟻顯宗紀

詔曰去其螟蟻以及蝥賊。

注云爾雅曰食苗心曰螟食根曰蝥蟻一名短狐今之水弩含沙射人爲災也。

伏臘顯宗紀永平十二年

注云史記曰秦德公始爲伏祠歷忌曰伏者何也金氣伏藏之日也四氣代謝皆以相生至於立秋

以金代火金畏於火故庚日必伏月令孟冬之月祀先祖說文云臘冬至後祭百神始皇更臘曰嘉

平。

祖臘陳寔傳三十六

陳成父子閉門不出入猶用漢家祖臘。

注云應劭風俗通曰共工之子好遠遊死爲祖神漢家火行盛於午故以午日爲祖也臘者歲終祭

衆神之名臘接也新故交接故大祭以報功也漢火行衰於戌故臘用戌日也。

塤簾顯宗紀永平十年

注云燒土爲之大如雁子鄭衆曰塤有六孔世本曰暴辛公作簾以竹爲之長尺四寸有八孔

冒彤肅宗紀元和二年

注云字書曰彤多須貌音而蒙冒其面或曰西域人多著冒而長故舉以爲言也。

宰士。飛禍。周榮傳三十五。

注云。榮辟司徒袁安府。故稱宰士。飛禍言倉卒而死也。

告諡。顯宗紀二。

太尉趙熹告諡南郊。

注云。風俗通曰。禮。臣子無爵諡君父之義也。故羣臣累其功美。葬日遣太尉於南郊告天而諡之。

復土。顯宗紀。

注云。言下棺訖。復以土爲墳。故言復土。

邸第。甲第。安帝紀五。

注云。邸。屬國之舍也。第。謂甲乙之次第。

機衡。郎凱傳二十下。

尙書職在機衡。

注云。北斗魁星。第三爲機。第五爲衡。於天文爲喉舌。

追北。臧宮傳八。

乘勝追北。

注云。人好陽而惡陰。北方幽陰之地。故軍敗者謂之北。史記樂書曰。北者。敗也。而近代音北爲背。失

其旨矣。

赤地藏宮傳。

旱蝗赤地。

注云赤地言在地之物皆盡說苑曰晉平公時赤地千里。

盤鋌 魏書傳三。

隗囂初起兵設盟祀畢有司穿坎於庭牽馬操刀奉盤錯鋌遂割牲而盟。

注云前書匈奴傳云漢書韓昌等與單于及大臣俱登諾水東山刑白馬單于以徑路刀金留犁撓酒應劭曰徑路匈奴寶刀也留犁飯匕也撓攪也以匕撓血而歃之今亦奉盤錯匙而歃也以此而言鋌卽匙字錯置也七故反其盟云鋌不滯血歃不入口是欺神明也。

秭歸 和帝紀。

永元十二年秭歸山崩。

注云秭歸縣屬南郡古之夔國今歸州也袁崧曰屈原此縣人既被流放忽然暫歸其姊亦來因名其地爲秭歸秭亦姊也。

輜駟 齊王縉傳四。

注云輜駟有擁蔽之車也列女傳曰齊孝公華孟姬謂公曰妾聞妃后踰闕必乘安車輜駟說文曰

輶車衣車也。周禮注云：輶猶屏也。取其白蔽隱。  
鹿門。龐公傳七十三。

龐公攜妻子登鹿門山。因採藥不反。

注云：襄陽記曰：建武中，襄陽侯習郁立神祠於山。刻二石鹿夾神道口。俗因謂之鹿門廟。遂名山也。

果下馬。東夷傳七十五。

濊出果下馬。使來獻之。

注云：高三尺。乘之可於果樹下行。

縞素。順帝紀永建三年。

注云：縞、皓也。縞之精白者曰素。

師子封牛。順帝紀陽嘉二年。

疏勒國獻師子封牛。

注云：疏勒王遣使詣闕。師子似虎。正黃有髯。尾端茸毛大如斗。封牛。其領上肉隆起者若封然。因

以名之。即今之峯牛。

鴻都門學士。靈帝紀。

光和元年。始置鴻都門學士。

注云鴻都門名也於內置學時其中諸生皆勅州郡三公舉召能為尺牘辭賦及工書鳥篆者相課試至千人焉。

賣官靈帝紀

光和元年初開西邸賣官自關內侯虎賁羽林入錢各有差又私令左右賣公卿公千萬卿五百萬。注云山陽公載記曰時賣官二千石二十萬四百石四百萬其以德次應選者半之或三分之一於西園立庫以貯之。

天祿。渴烏。靈帝紀中平三年張讓傳六十八。前漢西域傳六十六上。

靈帝修玉堂殿鑄銅人四黃鍾四及天祿蝦蟆。

注云黃鍾其音中黃鍾子為黃鍾天祿獸也。案今鄧州南陽縣北有宗資碑旁有兩石獸鑄其一曰天祿一曰辟邪據此天祿辟邪並獸名時漢有天祿閣亦因獸而立名。

使掖庭令畢嵐鑄銅人四列於倉龍玄武闕外鍾縣於玉堂及雲臺殿前天祿蝦蟆吐水於平門外橋東轉水入宮又作翻車渴烏施於橋西用灑南北郊路。

注云翻車設機車以引水渴烏為曲筒以氣引水上也。

前漢西域傳烏戈國有桃拔師子犀牛。

孟康曰桃拔一名符拔似鹿長尾一角者或為天鹿兩角者或為辟邪拔步葛反。

紹介符融傳五十八

注云。古人相見必因紹介。介。因也。言因此人以相接見也。

六韜。何進傳五十九

注云。太公六韜篇。第一霸典文論。第二文師武論。第三龍韜主將。第四虎韜偏裨。第五豹韜校尉。第六犬韜司馬。龍韜云。武王曰。吾欲令三軍之衆親其將如父母。聞金聲而怒。聞鼓音而喜。爲之奈何。

蒙衝船。禰衡傳七十下

黃祖在蒙衝船上。大會賓客。

注云。釋名曰。外狹而長曰蒙衝。以衝突敵船。

推步。馮鯤傳二十八

馮鯤善推步之術。

注云。推步。謂究日月五星之度。昏旦節氣之差。

霄。仲長統傳三十九

注云。霄。摩天赤氣也。

沆瀣。仲長統傳

沆瀣當餐。九陽代燭。

兩漢博聞 卷十

注云。沆瀣者。北方夜半氣也。九陽。謂日也。山海經曰。陽谷上有扶木。九日居下枝。一日居上枝也。穀飲。仲長統傳論。

世非胥庭人乖穀飲。

注云。赫胥氏。大庭氏。並古之帝號。莊子曰。夫聖人鶉居而穀飲。言鶉鳥無常居。穀飲不假物。並淳朴時也。

廬落。院落。仇覽傳六十六。

仇覽過邑人陳元之舍。曰。廬落整頓。耕耘以時。此非惡人。教化未至耳。

注云。落。居也。案今之人。謂院爲落也。

熊經。鷓鴣。華陀傳七十二下。

注云。熊經。若熊之攀枝自懸也。鷓鴣。身不動而迴顧也。莊子曰。吐故納新。熊經鳥申。導引養形之人也。

餌胡麻。乘白鹿。方術傳。

注云。漢武內傳曰。魯女生。初餌胡麻及朮。絕穀八十餘年。日少壯。色如桃花。道成。一旦與故人別。云入華山。去後五十年。先相識者逢女生。華山廟前。餌胡麻。從玉女三十人。并令謝其鄉里親故也。

青牛道士。甘始傳。



注云。漢武內傳曰。封君達初服黃連。五十餘年入鳥舉山。服水銀。百餘年還鄉里。如二十者。常乘青牛。故號青牛道士。

風問。高彪傳七十下。

高彪與馬融書曰。承服風問。從來有年。

注云。風問。風獸令問也。

鵠髮。承宮傳贊十七。

注云。鵠髮。白髮也。

明府。張湛傳十七。

張湛爲左馮翊主簿。進曰。明府位尊德重。

注云。郡守所居曰府。明府者。尊高之稱。韓延壽爲東郡太守。門卒謂之明府。亦其義也。

境埆。丁鴻傳二十七。

昔孫叔敖勸其子。受封必求磽确之地。

注云。孫叔敖楚相也。將死。戒其子曰。王封汝。必無居利地也。楚越之間有寢邱者。甚惡。可長有以食

也。境。苦交反。埆。苦角反。

金沙。光珠。西南夷傳七十六。

六丁。梁節王傳四十。  
注云。華陽國志曰。蘭滄水有金沙。洗取融爲金。有光珠穴。博物志曰。金沙。卽江珠也。

梁節王暢數有惡夢。從官卞忌自言能使六丁。善占夢。

注云。六丁。謂六甲中丁神也。若甲子旬中。則丁卯爲神。甲寅旬中。則丁巳爲神之類也。役使之法。先齋戒。然後其神至。可使致遠方物。及知吉凶也。

玉搔頭。李固傳五十三。

注云。西京雜記曰。武帝遇李夫人。就取玉簪搔頭。自此宮人搔頭皆用玉。

牛黃。延篤傳五十四。

注云。吳普本草曰。牛黃。味苦無毒。牛出入呻者有之。夜有光走角中。牛死入膽中。如雞子黃。神農本草曰。療驚癇。除邪逐鬼。

五嶺。吳祐傳。

注云。嶺者。西自衡山之南。東至於海。一山之限耳。別標名。則有五焉。裴氏廣州記云。大庾。始安。臨賀。揭陽。桂陽。是爲五嶺。鄧德明南康記曰。大庾一也。桂陽甲騎二也。九真都龐三也。臨賀萌主四也。始安越城五也。裴氏之說。則爲審矣。

壽藏。趙岐傳。

趙岐先自爲壽藏。

金蠶。

注云壽藏謂塚壙也。稱壽者取其久遠之意也。猶如壽宮壽器之類。

永嘉末發齊桓公墓得水銀池金蠶數十箔。

五溪馬援傳十四

注云酈元注水經云武陵有五溪謂雄溪、楠溪、酉溪、漚溪、辰溪。悉是蠻夷所居。故謂五溪蠻。皆槃瓠

子孫也。土俗雄作熊。楠作朗。漚作武。在今辰州界。

投劾周燮等傳序四十三

太原閔仲叔世稱節士。建武中應司徒侯霸之辟。既至霸不及政事。徒勞苦而已。仲叔恨曰。以仲叔爲不足問邪。不當辟也。辟而不問。是失人也。遂辭出。投劾而去。

注云案罪曰劾。自投其劾狀而去也。投猶下也。今有投辭投牒之言。

精廬姜肱傳四十二

姜肱與弟季江謁郡。夜於道遇盜。欲殺之。肱兄弟更相爭死。遂兩釋焉。但掠奪衣資而已。既至郡中。終不言盜。盜聞而感悔。後乃就精廬來見徵君謝罪。

注云諸公嘗爭加辟命。肱皆不就。故曰徵君。精廬卽精舍也。

水排杜詩傳二十一

杜詩爲南陽太守造作水排鑄爲農器百姓便之。

注云排蒲拜反治鑄者爲排以吹炭今激水以鼓之排當作爨古字通用也。

捲握張堪傳

捲握之物足富十世。

注云捲握猶掌握謂珠玉之類。

鳧藻杜詩傳

士卒鳧藻。

注云言其和睦歡悅如鳧之戲於水藻。

方舟班固傳三十上

方舟並駑。

注云方舟並兩舟也。

雨師風伯班固傳三十下

東都賦雨師汎灑風伯清塵。

注云雨師畢星也風伯箕星也。

龍門李膺傳五十七

注云三秦記曰河津一名龍門水險不通魚鼈之屬莫能上江海大魚薄集龍門下數千不得上上則爲龍也

巫覡之言張衡傳四十九

注云前書曰齊肅聰明者神或降之在男曰覡在女曰巫覡胡歷反

銀臺張衡傳

聘王母於銀臺

注云銀臺仙人所居也

曾城張衡傳

張衡賦云登閭風之曾城兮

注云閭風山名在崑崙山上淮南子曰崑崙山有曾城九重高萬一千里

尺牘蔡邕傳五十二

注云說文曰牘書板也長一尺

獄犴填滿崔駰傳四十二

注云犴音岸前書音義曰鄉亭之獄曰犴

容車祭遵傳十

祭遵薨贈以將軍侯印綬朱輪容車介士軍陳送葬。

注云容車容飾之車象生時也。

交河耿恭傳九

發兵擊車師攻交河城。

注曰前書曰車師前王居交河城河水分流繞城下故號交河去長安八千一百五十里故城在今

西州交河縣也。

翡翠班固傳三十上

注云異物志曰翠鳥形似鸞赤而雄曰翡青而雌曰翠其羽可以爲飾。

丙穴公孫述傳三

蜀有魚鹽之利。

注云丙穴出嘉魚在漢中。

三泉袁紹傳六十四上

無令愚臣結恨三泉。

注云三者數之小終言深也前書曰下錮三泉。

折角巾郭太傳五十八。

郭太身長八尺，褻衣博帶，嘗於陳梁間行。遇雨，巾一角墊，時人乃故折巾一角，以爲林宗巾，其見慕皆如此。

注云：墊，丁念反。巾以葛爲之，形如幘，口沿反。本居士野人所服。魏武造幘，其中乃廢。今國子學生服焉，以白紗爲之。

邊幅，公孫述傳論三，馬援傳。

公孫述不能因隙立功，以會時變，方乃坐飾邊幅，以高深自安。

注云：邊幅，猶有邊緣，以自矜持。

脩飾邊幅。

注云：若布帛脩整其邊幅也。左傳曰：如布帛之有幅焉，爲之度，使無遷。

蔡侯紙，蔡倫傳六十八。

自古書契，多編以竹簡，其用縑帛者，謂之紙。縑貴而簡重，並不便於人，尙方令蔡倫乃造，意用樹膚麻頭及敝布魚網，以爲紙，奏上之。帝善其能，故天下咸稱蔡侯紙。

注云：湘州記曰：來陽縣北有漢黃門蔡倫宅，宅西有石臼，云是倫舂紙臼也。

突騎，光武紀更始二年。

耿況、彭寵各遣其將吳漢、寇恂等將突騎來助擊王郎。

注云突騎言能衝突軍陣。

三輔光武紀更元年。前漢百官表七上。

注云謂京兆、左馮翊、右扶風共在長安中分領諸縣。

前書百官表曰內史周官秦因之掌治京師景帝二年分置左內史右內史武帝太初元年更名京兆

尹左內史更名左馮翊又更名主爵都尉為右扶風治內史右地與左馮翊京兆尹是為三輔

服虔云皆治在長安城中

門下掾公孫述傳三

公孫述補清水長時父仁為河南都尉以述年少遣門下掾隨之官

注云州郡有掾皆自辟除之常居門下故以為號

錚錚劉盆子傳二

樊崇將劉盆子及丞相徐宣已下三十餘人肉袒降光武光武謂徐宣樊崇等曰卿所謂鐵中錚錚傭

中佼佼者也

注云說文曰錚錚金也鐵之錚錚言微有剛利也錚初耕反佼佼古巧反佼佼好貌也佼佼者凡庸之人

稍為勝也



爛頭羊劉元傳一。

更始起兵稱天子其所授官爵者皆羣小賈豎或有膳夫庖人長安爲之語曰竈下養中郎將爛羊胃都騎尉爛羊頭關內侯。

注云公羊傳曰炊烹爲養。

綠林劉元傳。

王莽末南方饑饉人庶羣入野澤掘蛄蝼而食之更相侵奪新市人王卬王鳳爲平理諍訟遂推爲渠帥於是諸亡命馬武王常成丹等往從之藏於綠林中數月間至七八千人後至五萬人州郡不能制於是劉聖公光武皆起兵焉。

注云綠林山在今荊州當陽縣東北。

黃巾皇甫嵩傳六十。

鉅鹿張角自稱大賢良師奉事黃老道畜養弟子符水呪說以療病病者頗愈百姓信向之角因遣弟子八人使於四方教化天下轉相誑惑十餘年間徒衆數十萬置三十六方方猶將軍號也大方萬餘人小方六七千各立渠帥說言蒼天已死黃天當立弟子唐周上書告之靈帝使案驗宮省直衛及百姓有事角道者誅殺千餘人角等知事已露晨夜馳勅諸方一時俱起皆著黃巾爲標幟時人謂之黃巾亦名蛾賊殺人以祠天角稱天公將軍天下響應帝乃發天下精兵以皇甫嵩爲左中郎將朱雋爲

中郎將各統一軍討平之。

注云。蛾、魚綺反。卽蟻字也。諭賊衆多。故以爲名。

赤眉。劉盆子傳一。

琅邪人樊崇起兵於莒。一歲間至萬餘人。時青徐大饑。寇賊蜂起。羣盜以崇勇猛。皆附之。王莽遣廉丹。王卞擊之。崇等欲戰。恐其衆與莽兵亂。乃皆朱其眉以相識別。由是號曰赤眉。赤眉遂大破丹卞軍。更始都洛陽。遣使降崇。崇等聞漢室復興。卽留其兵。自將渠帥二十餘人。隨使者至洛陽。更始皆封爲列侯。復亡歸其營。分兵爲二部。攻拔城邑。衆遂大集。立劉盆子爲帝。其後奉傳國璽降光武。

錢塘。朱傳六十一。

注云。錢塘。今杭州縣也。錢塘記云。昔郡議曹華信義立此塘以防海水。始開。募有能致土石一斛。與錢一千。旬日之間來者雲集。塘未成而譎不復取。皆遂棄土石而去。塘以之成也。

華陽國志。

益州古梁州之域。尚書曰。華陽黑水惟梁州。孔安國注曰。北拒華山之陽。南拒黑水。故常璩敘蜀事。而謂之華陽國志。黑水出張掖雞山。南流至燉煌。過三危山。又南流而入南海。

蟬蛻。仲長統傳三十九。

仲長統詩曰。飛鳥遺跡。蟬蛻亡殼。騰蛇棄鱗。神龍喪角。

注云王充論衡曰。螻蛄化爲復育。復育轉爲蟬。蟬之去復育。龜之解甲。蛇之脫皮。可謂尸解矣。爾雅曰。騰蛇有鱗。廣雅曰。有角曰龍。喪角解角也。

日祀。間祀。肅宗紀三。

肅宗卽位。有司奏言。孝明皇帝自稱不德。無起寢廟。掃地而祭。除日祀之法。省送終之禮。遂藏主於光烈皇后更衣別室。臣愚以爲更衣在中門之外。處所殊別。宜尊廟曰顯宗。其四時禘祫於光武之堂。間祀悉還更衣。

注云春秋外傳曰。日祭月祀時享。祖禘則日祭。高會則月祀。三禘則時享。今此除日祀之法。從時月之祭。續漢書曰。五年再殷祭。三年一祫。五年一禘。父爲昭。南向。子爲穆。北向。禘以夏四月。祫以冬十月。禘之爲言。諦也。諦審昭穆尊卑之義。祫者合也。冬十月五穀成。故骨肉合。飲食於祖廟。謂之殷祭。四時正祭外。有五月嘗麥。三伏立秋嘗黍。盛酎。十月嘗稻等。謂之間祀。卽各於更衣之殿。更衣者非正處也。園中有寢。有便殿。寢者。陵上正殿。便殿。寢側之別殿。卽更衣也。

騎奴。

京師貴戚奢過王制。其嫁娶。騎奴侍童夾轂並引。

矢石。堅鐔傳十二。

注云石。謂發石以投人也。墨子曰。備城者。積石百枚。重十鈞以上者。

金行之氣西羌傳

西羌人性堅剛勇猛得西方金行之氣焉。

注云黃帝素問曰西方者金玉之域其人山居而多風水土剛強。

鈐決之符方術傳序七十二上

注云兵法有玉鈐篇及玄女六韜要決太公對武王曰主將有陰符謂若大勝得敵之符符長一尺破軍擒敵之符符長九寸之類。

胎息氣王真傳七十二下

注云漢武內傳曰王真字叔經上黨人習閉氣而吞之名曰胎息習嗽舌下泉咽之名曰胎食真行之斷穀二百餘年肉色光美力並數人抱朴子曰胎息者能以鼻口噓吸如在胎之中嗽音朔。

鰻魚伏隆傳十六

張步據青徐遣使獻鰻魚。

注云郭璞注三蒼云鰻似蛤偏著石廣志曰鰻無鱗有殼一面附石細孔雜雜或七或九本草云石決明一名鰻魚步角反。

黃鉞馮勒傳十六

注云鉞斧也以黃金飾之所以戮人。

方底囊。隱害。廣陵思王傳三十二。前漢孝成趙皇后傳。

廣陵思王荆。性刻急。隱害。光武崩。大行在前殿。荆哭不哀。而作飛書。封以方底。令蒼頭詐稱東海王疆。舅郭況書。與疆。疆得書。惶怖。卽執其使。封書上之。

注云。隱害。謂陰害於人也。方底囊。所以盛書也。

前書外戚傳。中黃門田客持詔記。盛綠綈方底。

師古曰。綈。厚繒也。綠。其色。方底。盛書囊。若今之算曆耳。

銀璫。朱穆傳三十三。

案漢故事。中常侍參選士人。建武以後。乃悉用宦者。自延平以來。浸溢貴盛。假貂璫之飾。處常伯之任。天朝政事。一更其手。

注云。璫。以金爲之。當冠前。附以金蟬也。漢官儀曰。中常侍。奉官也。漢興。或用士人。銀璫在貂。光武以後。專任宦者。右貂金璫。常伯侍中也。

鯨首繫趾。朱穆傳。

注云。鯨首。謂鑿額涅墨也。繫趾。謂鈇其足也。以鐵著足曰鈇。

五時衣。東平憲王蒼傳三十二。

帝饗衛士於南宮。因從皇太后周行掖庭池閣。乃閱陰太后舊時器服。愴然動容。乃命留五時衣各一。

襲餘悉分布諸王，王及子孫在京師者。

注云：五時衣，謂春青、夏朱、季夏黃、秋白、冬黑也。

黨錮 黨錮傳五十七

桓靈之間，國命委於閹寺，士子羞與爲伍，故匹夫抗憤，處士橫議，遂乃激揚名聲，互相題拂，品覈公卿，裁量執政。初，桓帝受學於甘陵周福，及帝卽位，擢福爲尙書，時同郡河南尹房植，有名當朝，鄉人爲之謠曰：天下規矩房伯武，因師獲印周仲進。二家賓客，互相譏揣，由是甘陵有南北部，黨人之議自此始矣。後汝南太守宗資任功曹范滂，南陽太守成瑨亦委功曹岑暕，二郡又爲謠曰：汝南太守范孟博，南陽宗資主畫諾，南陽太守岑公孝，宏農成瑨但坐嘯。因此流言，轉入太學，諸生三萬餘人，郭林宗、賈傳節爲其冠，並與李膺、陳蕃、王暢更相褒重。學中語曰：天下模楷李元禮，不畏強禦陳仲舉，天下俊秀王茂叔，河內張成善說風角，推占當赦，遂教子殺人。李膺爲河南尹，督促收摘，旣而逢宥，獲免。膺竟按殺之，成弟子牢脩，因上書誅告膺等。養太學遊士，交結諸郡生徒，共爲部黨，誹訕朝廷。於是天子震怒，班下郡國，逮捕黨人，遂收執膺等，其辭所連陳實之徒二百餘人，或有逃遁，皆懸金構募，使者四出，相望於道。明年，竇武等並表請帝意稍解，乃皆赦歸田里，禁錮終身。而黨人之名猶書王府，自是正直廢放，邪枉熾結，海內希風之流，遂共相標榜，指天下名士爲之稱號，有三君、八俊、八顧、八及、八廚之號。張儉、鄉人朱並，承望中常侍侯覽意旨，上書告儉與同鄉二十四人，別相署號，共爲部黨，圖危社稷，而儉爲

之魁大長秋曹節因此諷有司奏部前黨收司空虞放少府李膺太尉掾范滂等百餘人皆死獄中。自此諸爲怨隙因相陷害。又州郡承旨或有未嘗交關亦離禍毒。其死徙者廢禁者六七百人。及黃巾賊起乃大赦黨人皆歸故郡。凡黨事始自甘陵汝南成於李膺張儉海內塗炭二十餘年。諸所蔓延皆天下善士。

注云。標榜猶相稱揚也。榜與榜同。

風爲號令。張奐傳五十五。蔡邕傳五十下又注。

建甯二年大風雨雹霹靂拔樹。詔百寮言災應。張奐曰。風爲號令。動物通氣。順至爲休徵。逆來爲殃咎。

注云。凡風者天之號令。所以譴告人君者也。

明衣。范甯傳七十一。

注云。禮送死者衣曰明衣。器曰明器。鄭元注云。明者神明之也。此言明堂亦神明之堂。謂壙中也。

杠。費長房傳七十二下。

壺公樓下有少酒。長房使十人杠之。猶不舉。

注云。說文曰。兩人對舉爲杠。晉江。

五經博士。一家之學。章帝紀。

建初四年詔建立五經爲置博士。其後學者精進。雖曰承師。亦別名家。宣帝遂立大小夏侯尚書。後立。

京氏易。至建武中。復置顏氏、嚴氏春秋。大小戴禮博士。

注云。言雖承一師之業。其後觸類而長。更爲章句。則別爲一家之學矣。大小夏侯。謂夏侯勝、勝從兄子建也。京氏。京房也。嚴氏。謂嚴彭祖。顏氏。謂顏安樂也。大小戴。戴德、戴聖也。

白虎觀。石渠。肅宗紀建初四年。前漢施讐傳五十八。前漢儒林傳五十八。

肅宗詔下太常。將大夫博士議郎郎官。及諸生諸儒會白虎觀。講議五經同異。使五官中郎將魏應承制問。侍中淳于恭奏。帝親稱制臨決。如孝宣甘露二年。詔諸儒講五經同異。蕭望之等平奏其議。上親稱制臨

決焉。乃立梁邱易、大小夏侯尚書、穀梁春秋博士。

施讐爲博士。甘露中與五經諸儒雜論同異於石渠閣。

師古曰。三輔故事云。石渠閣在未央殿北。以藏祕書也。

前漢儒林傳贊云。自武帝立五經博士。開弟子員。設科射策。勸以官祿。百有餘年。傳業者寔盛。一經說至百餘萬言。大師衆至千餘人。蓋祿利之路。然初書唯有歐陽禮后、易楊春秋、公羊而已。至孝宣元帝時。又廣諸家矣。平帝時又立左氏春秋、毛詩、逸禮、古文尚書。

嘉祭顯宗紀。

永平元年春正月。帝率公卿已下朝於原陵。如元會儀。



注云。漢官儀曰。古不墓祭。秦始皇起寢於墓側。漢因而不改。諸陵寢皆以晦望。二十四氣。三伏。社。臘。及四時上飯。其親陵所宮人。隨鼓漏。理被枕具。盥水陳莊具。天子以正月上原陵。公卿百官及諸侯。王郡國計吏。皆當軒下。占其郡國穀價。四方改易。欲先帝魂魄聞之也。

專門。儒林傳贊六十九下。賈帝紀。

儒林傳云。塗分流別。專門並興。

注云。說經者各自是其一家。

本初元年。令郡國舉明經。各令隨家法。

注云。儒生爲詩者謂之詩家。禮者謂之禮家。故言各隨家法也。

# 兩漢博聞卷第十一

封禪光武紀

中元元年幸魯柴望岱宗登封太山禪梁父。

注云岱宗太山也。梁父太山下小山也。封謂聚土爲壇。壇謂除地而祭。改壇爲禪神之也。續漢志曰。特上御輦升山。卽位於壇南。北面尙書令奉玉牒檢。皇帝以寸三分齶親封之。藏玉牒已。以石覆訖。尙書令以五寸印封石檢畢。皇帝再拜。禪祭地於梁陰。以高后配山川羣神從祀焉。其玉牒文祕刻石。文辭多不載。

使君周恂傳六 郭伋傳二十一

寇恂爲上谷太守。耿況功曹。更始立。遣使者徇郡國。恂從況迎使者。上印綬。使者納之。無還意。恂勒兵入見使者。就請之曰。使君建節銜命。以臨四方。今始至上谷而墮大信。將復何以號令他郡乎。遂授況印綬。

注云君者尊之稱。故曰使君。

郭伋爲并州牧。行部有童兒騎竹馬迎之曰。聞使君到。喜。故來迎。

太史公光武紀中元元年

注云太史史官之長也。前書音義曰太史公武帝置位在丞相之上。

巴蜀光武紀

注云蜀有巴郡故總言之。

使匈奴中郎將擁節光武紀

建武六年匈奴遣使來獻使中郎將報命。

注云漢官儀曰使匈奴中郎將擁節秩比二千石。

匈奴傳論曰馳中郎之使。

都護西域傳七十八

武帝時西域內屬有三十六國漢為置校尉領護之宣帝改曰都護。

注云前書云李廣利征討大宛之後屯田渠犂置使者領營護田以供使外國也宣帝時以鄯吉前

破車師後降日逐遂并令護車師以西北道號曰都護都護之置始於吉也。

修覺字傳林傳序六十九上

注云說文曰覺學也覺與橫同儒林傳云遊庠序聚橫塾者蓋布之於邦域矣。

博士十四家徐防傳三十四

徐防曰漢以孔聖既遠微旨將絕故開置大學立博士十有四家設甲乙之科以勉勸學者。

注云漢官儀曰光武中興恢宏稽古易有施孟梁邱賀京房書有歐陽和伯夏侯勝建詩有申公轅固韓嬰春秋有嚴彭祖顏安樂禮有戴德戴勝凡十四博士太常差遣有聰明威重一人爲祭酒總領綱紀也前書曰歲課甲科四十人爲郎中乙科三十人爲太子舍人丙科二十人補文學掌故

家法徐防傳

徐防曰伏見太學試博士弟子皆以意說不修家法

注云諸經爲業各自名家

石經儒林傳序

靈帝詔書諸儒正定五經刊於石碑爲古文篆隸三體書法以相參檢樹之學門使天下咸取則焉

注云古文謂孔子壁中書篆隸並程邈所作也

膝囊儒林傳序

董卓移都之際典策剖散其縑帛圖書大則連爲帷蓋小則制爲膝囊

注云膝亦膝也徒恆反說文曰膝囊也

樓櫓匈奴傳七十九公孫瓚傳

造戰車可駕數牛上作樓櫓置於塞上以拒匈奴

注云櫓卽樓也釋名曰樓無屋爲櫓

樓櫓千里。

注云櫓卽櫓字。說文釋名曰櫓露也。上無覆屋也。

三家詩。儒林傳六十九下。

前書魯人申公受詩於浮邱伯。爲作詁訓。是爲魯詩。齊人轅固生亦傳詩。是爲齊詩。燕人韓嬰亦傳詩。是爲韓詩。三家皆立博士。趙人毛萇傳詩。是爲毛詩。未得立。平帝時方立毛詩。

西域南山。西域傳七十八。

西域東極玉門陽關。西至葱嶺。其東北與匈奴烏孫相接。南北有大山。中央有河。其南山東出金城。與漢南山屬焉。其河有兩源。

匈奴龍祠。南匈奴傳七十九。

注云前書匈奴法歲二月諸長小會單于庭祠。五月大會龍城。祭其先天地鬼神。八月大會躡林。課校人畜計。躡音帶。

醢酒。臧宮傳八。

臧宮陳兵大會擊牛醢酒。

注云醢所宜反。說文云下酒也。詩注曰以筐曰醢也。

羯胡。吳漢傳論八。

戎羯喪其精膳。

注云羯本匈奴別部分散居其上黨武鄉羯室因號羯胡此總謂戎夷耳不指於羯也。  
幅巾鮑永傳十九趙咨傳二十九韋彪傳十六

注云幅巾謂不著冠但幅巾束首也。

太尉楊賜辟趙咨使飾巾出入請與講議。

注云以幅巾爲首飾不加冠冕又符融傳注云幅巾以一幅爲之。

韋著不應州郡之命靈帝就家拜東海相詔書逼切不得已解巾之郡。

注云巾幅巾也既服冠冕故解幅巾。

馬當匈鮑永傳

鮑永諫太守拔佩刀截馬當匈。

注云當匈以韋爲之也。

含元包一郵渾傳十九

注云前晉志曰太極元氣含三爲一謂三才未分包而爲一。

祕經蘇竟傳二十上

注云謂幽祕之經卽緯書之類也。

踟躕蘇竟傳

皇天所以眷顧踟躕曼漢子孫者也。

注云。踟躕猶徘徊也。

綈裘楊厚傳二十上

楊厚之祖春卿善圖讖學臨終戒其子統曰吾綈裘中有先祖所傳祕記爾其修之。

注云。綈厚繒也音提。

請讞襄楷傳二十下

注云。讞疑也。謂罪有疑者讞於廷尉也。

君子不死之國東夷傳七十五

東夷天性柔順易以道御至有君子不死之國焉。

注云。山海經曰。君子國衣冠帶劍食獸使二文虎在旁去琅邪三萬里。山海經又曰。不死人在交脛

東其爲人黑色壽不死並在東方也。

德星襄楷傳二十下

注云。德星。歲星也。

不三宿桑下佛陀。襄楷傳

襄楷上疏曰。浮屠不三宿桑下。不欲久生恩愛。精之至也。今陛下媼女豔婦。極天下之麗。

注云。浮屠卽佛也。但聲轉耳。並謂佛也。言浮屠之人寄桑下者。不經三宿。便卽移去。示無愛戀之心也。

齊神養和周盤傳二十九。

注云。膏。愛惜也。

季母。西域傳。

注云。季母。叔母也。

青門。逢萌傳七十三。

逢萌解冠。挂東都城門。

注云。漢宮殿名。東都門。今名青門也。前書音義曰。長安東都城北頭第一門。

毳毼。西域傳七十八下。

天竺國出細布好毳毼。

注云。毳。它闔反。毼。音登。埤蒼曰。毛席也。釋名曰。施之承大牀前小榻上。登以上牀也。

奇幻。西域傳。

注云。大秦國俗多奇幻。口中出火。自縛自解。跳十二丸。巧妙非常。



流沙傳論七十八 李恂傳四十一

天竺記云。西度流沙。屢有熱風惡鬼。過之必死。

注云。廣志曰。流沙在玉門關外。東西數百里。有三斷名曰三隴。故曰隴沙。以西使命不得通也。

海大秦國 蘇合香西域傳

大秦國在海西。亦云海西國。其人民皆長大。正類東國。故謂之大秦。其國合會諸香。煎其汁以爲蘇合。

魂歸岱 天孫烏桓傳八十

烏桓國言死者神靈歸赤山。赤山在遼東西北數千里。如中國人死者魂神歸岱山也。

注云。博物志。泰山魂帝歸也。主召人魂。東方萬物始。故知人生命。

貂鼪 鮮卑傳八十

鮮卑有貂鼪鼪子。皮毛柔螻。故天下以爲名裘。

注云。獬狃反。鼪。胡昆反。貂鼪並鼠屬。獬猴屬也。

軼祀 吳祐傳五十四

注云。祖道之禮。封土爲軼壇也。五經要義曰。祖道者行祭。爲道路祈也。周禮。太馭掌王玉路以祀軼。

注云。軼祀者。封土象山於路側。以芻棘柏爲神主。祭之以車轆。軼而去。喻無險難也。

秦海 西域傳

敦煌太守張璠上書以爲北虜呼衍王常展轉蒲類秦海之間專制西域共爲寇鈔。

注云大秦國在西海西故曰秦海也蒲類亦國名。

文犀馬援傳十四

注云犀之有文彩者也。

藁葬馬援傳

馬援既卒有上書譖援前所載南方薏苡一車皆明珠文犀帝益怒援妻孳惶懼不敢以喪還藁葬買城西數畝地藁葬而已。

注云藁草也以不歸藁塋時權葬故稱藁。

幅裂南匈奴傳論七十九

方夏幅裂。

注云諸夏如布帛之裂也。

虹蜺楊賜傳四十四

注云爾雅云雙出色鮮盛者爲雄曰虹闇者爲雌曰蜺。

投蜺楊賜傳

春秋識曰投蜺天下怨海內亂。

注云春秋演孔圖曰。霓者斗之亂精也。失度投霓見。宋均注曰。投霓投應也。

配祔。陳球傳四十六。

曹節欲祔葬竇太后。而以馮貴人配祔。

注云。祔謂新死之主於先死者之廟。婦祔於其夫。

投暮。光傳十一。

注云。投至也。

選儒之恩。清河孝王傳四十五。

注云。選儒仁弱。慈戀不決之意。儒仁竟反。

聚落。

聚落化其德。

注云。小於鄉曰聚。廣雅曰。落居也。

玉門關。班超傳三十七。

注云。玉門關。屬敦煌郡。今沙州也。在敦煌縣西北。

小杜律。郭躬傳三十六。

注云。武帝時廷尉杜周之子延年。亦明習法律。宣帝時爲御史大夫。對父故言小。

管宄。陳忠傳三十六。

如其管宄。妄有機刺。

注云。管宄言小也。史記扁鵲曰。若以管窺天。

宿麥。安帝紀五。

注云。宿舊也。麥必經年而熟。故稱宿。

命夫。安帝紀。

注云。命夫者。其男子之爲大夫也。命婦者。其大夫之妻也。

大行。安帝紀。

注云。前書音義。韋昭云。大行者。不反之辭也。天子崩未有諡。故稱大行也。穀梁傳曰。大行受大名。

青部。臧洪傳四十八。

袁紹以臧洪爲青州刺史。時羣盜麤起。而青部殷實。

拘儒。左雄等傳論五十二。

處士鄙生。忘其拘儒。拂巾衽褐。以企放車之招矣。

注云。拘儒。猶褊狹也。

置之度外。公孫述傳三。

漢帝釋關隴之憂。

注云。隗囂居西。無東之意。故置之度外而不爲憂。

解構。隗囂傳三。

帝與隗囂書曰。自今已後。手書相聞。勿用人解構之言。

注云。解構。猶問構也。

抵掌。隗囂傳。

注云。說文。抵。側擊也。戰國策曰。蘇秦與李允抵掌而談。

糗糒。隗囂傳。

注云。周禮曰。糗。熬大豆與米也。說文云。糒。乾飯也。

坏冶。崔駰傳四十一。

坏冶一陶。

注云。坏。土器之未燒者。

刻玉版。崔駰傳。

策合道從。克亂弭衝。乃將鏤元珪。册顯功。

注云。珪。玉也。詩。含神霧曰。刻之玉版。藏之金匱。

銘功鼎。崔駰傳。

注云。墨子曰。昔夏后開冶。使飛廉析金於山。以鑄鼎於昆吾。蔡邕銘論曰。呂尙作周太師。其功銘於昆吾之鼎也。

勒景襄之鍾。崔駰傳。

注云。國語曰。晉魏顆以其身退秦師於輔氏。其勳銘於景鍾。此兼言襄也。

欽頤。周雙傳四十三。

周雙生而欽頤折頰。醜狀駭人。其母欲棄之。其父不聽。曰。吾聞聖賢多有異貌。

注云。頤。頤也。欽頤。曲頤也。說文曰。頰。鼻莖也。折亦曲也。欽。良冉反。欽或作斂。音同。

髻髻。周雙傳。

周雙始在髻髻。而知廉讓。

注云。髻髮也。禮記曰。子生三月之末。擇日翦髮爲髻。男角女羈。否則男左女右。髻。徒果反。

恭館。班固傳三十下。

啓恭館之金滕。

注云。恭肅之館。謂廟中也。金滕以金緘匱。藏符瑞之書於其中也。

遂古。班固傳。

注云。遂古猶遠古。

茹薇。申屠蟠傳四十三。

昔人之隱。巢棲茹薇。

注云。巢棲猶巢父也。薇似藿也。

診脈。郭玉傳七十二下。

有老父不知何出。常漁釣於涪水。因號涪翁。見有疾者。時下針石。輒應時而效。乃著針經診脈法。傳於世。

注云。診候也。

賈胡。李恂傳四十一。

注云。賈胡。胡之商賈也。

鼓下戮人。岑彭傳七。

光武收韓歆。置鼓下。將斬之。

注云。中將軍最尊。自執旗鼓。若置營則立旗。以爲軍門。并設鼓。戮人必於其下。

攘袂。

攘袂而正讓。

注云。袂。衣袖也。攘袂。猶今之言捋臂也。

錄尚書事。肅宗紀三。

肅宗以侯熹爲太傅。牢融爲太尉。並錄尚書事。

注云。武帝初以張子孺領尚書事。錄尚書事由此始。

放手。顯宗紀。

權門請託。殘吏放手。

注云。放手。謂貪縱爲非也。

贖刑。顯宗紀。

詔曰。方春戒節。人以耕桑。其敕有司。務順時氣。使無煩擾。天下亡命殊死已下。聽得贖論。死罪入縶二

十四。右趾至髡鉗城旦。舂十四。完城旦。舂至司寇作三匹。

注云。前書音義曰。右趾。謂刖其右足。次刖左足。次劓。次髡鉗爲城旦。舂。城旦者。晝日伺寇虜。夜

暮築長城。舂者。婦人犯罪不任軍役之事。但令舂以食徒者。完者。謂不加髡鉗而築城也。次鬼薪白

粲。次隸臣妾。次作司寇。

投傳。陳蕃傳五十六。

豫州刺史周景辟陳蕃爲別駕從事。蕃以諫爭不合。投傳而去。



注云、投棄也。傳謂符也。丁戀反。

度遼將軍。五原。顯宗紀。

永平五年。北匈奴寇五原。八年初。置度遼將軍。屯五原曼柏。

注云。武帝拜范朋友為度遼將軍。至此復置焉。以中郎將吳常行度遼將軍。曼柏縣。在今勝州銀城縣。

部將。寇恂傳六。

注云。部將。謂軍部之下小將也。

天人致誅。班固傳三十下。

往者王莽作逆。漢祚中缺。天人致誅。六合相滅。

注云。天人。謂天意。人事共相誅也。

封事。副封。顯宗紀。永平八年。

詔羣司勉修職事。極言無諱。於是在位者皆上封事。各言得失。

注云。宣帝始令羣臣得奏封事。以知下情。封有正。有副。領尚書者先發副封。所言不善。屏而不奏。後

魏相奏去副封。以防擁蔽。

昆侖塞。顯宗紀。

永平十七年，竇固耿秉、劉張出敦煌，昆侖塞擊破白山虜於蒲類海上。

注云：昆侖山名，因以爲塞。在今肅州酒泉縣西南。山有昆侖之體，故名之。周穆王見西王母於此山，有石室王母臺。

郎官上應列宿顯宗紀

郎官上應列宿，出宰百里。

注云：史記曰：太微宮後二十五星，郎位也。

懷檄陳寔傳五十二

中常侍侯覽託穎川太守高倫用吏，倫教署爲文學掾，功曹陳寔知非其人，懷檄請見。

注云：檄，板書，謂以高倫之教書之於檄，而懷之者，懼洩事也。

尤無狀者顯宗紀建初元年 前漢東方朔傳注。

詔刺史明加督察，尤無狀者。

注云：無狀，謂其罪惡尤大，其狀無可寄言，故云無狀。它皆類此。前書：館陶公主徒跣頓首謝曰：妾無狀。

師古曰：狀，形貌也。無狀，猶言無顏面以見人也。一曰：自言所行醜惡，無善狀也。

斗食小吏顯宗紀

兩漢博覽 卷十一

注云前書曰百石以下有斗食佐吏之秩言小吏也。

方目紗肅宗紀

詔齊相省冰紈方空縠吹綸絮。

注云紈素也冰言色鮮潔如冰釋名曰縠紗也方空者紗薄如空也或云孔也即今之方目紗也前書齊有三服官故詔齊相罷之。

鈗鑽肅宗紀

元和元年詔曰自往者大獄已來掠考多酷鈗鑽之屬慘苦無極。

注云大獄謂楚王英等事也鈗其廉反說文曰鈗鉞也國語曰中刑用鑽鑿皆謂酷慘其肌膚也。

汴渠顯宗紀

永平十二年遣將作謁者王吳修汴渠自滎陽至於千乘海口。

注云汴渠即葭蕩渠也汴自滎陽首受河所謂石門在滎陽山北一里過汴已東積石爲隄亦號金隄成帝陽嘉中所作也。

大酺顯宗紀永平十五年

令天下大酺五日。

注云前書音義曰漢律三人已上無故羣飲罰金四兩今恩詔橫賜得令聚會飲食五日酺布也言

天子布恩於天下。

三老。顯宗紀。

詔賜天下男子爵。人一級。三老、孝弟、力田人三級。

注云。前書音義曰。男子者。謂戶內之長也。人賜爵者。有罪得贖。貧者得賣與人。三老、孝弟、力田三者。皆鄉官之名。三老高帝置。孝弟、力田、高后置。所以勸導鄉里。助成風化也。文帝詔曰。孝弟、天下之大順也。力田、爲生之本也。三老、衆人之師也。其以戶口率置員。

白馬羌。光武紀。

建武十三年。廣漢徼外白馬羌豪率種人內屬。

注云。廣漢。今益州雒縣也。羌有百五十四種。在廣漢西北者爲白馬羌也。

三韓。東夷傳七十五。

東夷有三韓。一曰馬韓。二曰辰韓。三曰弁韓。馬韓在西。有五十四國。其北與樂浪、南與倭接。辰韓在東。十有二國。其北與濊貊接。弁韓在辰韓之南。亦十有二國。凡七十八國。百濟是其一國焉。大者萬餘戶。小者數千家。各在山海間。地方四千餘里。

太白。杜篤傳七十。

注云。太白。天之將軍。

初作壽陵。光武紀。

建武二十六年。初作壽陵。

注云。初作陵未有名。故號壽陵。蓋取久長之義也。漢自文帝以後。皆預作陵。今循舊制也。

徙函谷關。光武紀。

注云。函谷谷名。因谷以名關。舊在宏農湖城縣西。前書楊僕爲樓船將軍。有功。恥居關外。武帝乃徙

於新安。故關在今洛州新安縣之東。

褒斜。順帝紀。

注云。褒斜。漢中谷名。南谷名褒。北谷名斜。首尾七百里。

軍假吏。山阻用材官。光武紀。

建武七年詔曰。今國有衆軍。並多精勇。宜且罷輕車騎士。材官。樓船士。及軍假吏。

注云。漢官儀曰。高祖命天下郡國。選能引關。蹶張材力武猛者。以爲輕車騎士。材官。樓船。常以秋後

講肄課試。各有員數。平地用車騎。山阻用材官。水泉用樓船。軍假吏。謂軍中權置吏也。今悉罷之。

幘。光武紀。

注云。漢官儀曰。幘者。古之卑賤不冠者之所服也。方言曰。覆髻謂之幘。或謂之承露。

豪傑英俊。光武紀。崔駰傳。

注云淮南子曰智過百人謂之豪白虎通云賢過萬人曰傑

注云文子曰智過萬人謂之英千人謂之俊

司隸光武紀

注云前書曰司隸校尉本周官武帝初置持節從中都官徒千二百人督大姦猾後罷其兵察三輔三河宏農秩比二千石音義云以掌徒隸而巡察故曰司隸

穀皮綃頭周黨傳七十三 向栩傳七十

周黨被徵不得已乃著短布單衣穀皮綃頭待見尙書

注云以穀樹皮爲綃頭也服此尙書以待見也

向栩性卓詭不倫恆讀老子狀如學道又似狂生好被髮著絳綃頭

注云說文綃生絲也從糸肖聲音消案此字當作幪此消反其字從巾古詩云少年見羅敷脫巾著幪頭鄭元注儀禮云如今著幪頭白項中而前交額上卻繞髻也

內學方術傳序七十二

自王莽矯用符命及光武尤信讖言自是習爲內學尙奇文貴異數不乏於時矣

注云內學謂圖讖之書也其事祕密故稱內

謁太山請命許曼傳七十二下

許峻少嘗篤病三年不愈。乃謁太山請命。

注云太山主人生死。故謂請命也。

思遲直士。肅宗紀建初五年。

詔朕思遲直士。側席異聞。

注云遲猶希望也。持二反。側席謂不正坐。所以待其賢良也。

三屬。肅宗紀元和元年。

詔曰。往者妖言大獄。所及廣遠。一人犯罪。禁至三屬。

注云三屬。卽三族也。謂父族、母族、妻族。

葶甲。肅宗紀。

方春生養。萬物葶甲。

注云葶。葉裏白皮也。易曰。百果甲拆。

# 兩漢博聞卷第十二

物色。錯愕。寒朗傳三十一。

注云。物色。謂形狀也。錯愕。猶倉卒也。錯。七故反。愕。五故反。

貫行。東平憲王蒼傳三十二。前漢谷永傳附。

光武營建陵地。詔曰。無爲山陵陂池。裁令流水而已。孝明皇帝。大孝無違。奉承貫行。

注云。貫行。謂一皆遵奉也。谷永曰。一以貫行。固執無違。

谷永傳云。以次貫行。固執無違。

師古曰。貫。聯續也。謂永所陳衆條諸事宜。次第相續。行之不當。更違異也。

太白經天。廣陵恩王荆傳三十二。

太白前出西方。至午。兵當起。

注云。洪範五行傳云。太白。少陰之星。以巳未爲界。不得經天而行。經天爲不臣。今至午。是爲經天也。

款段馬。馬援傳十四。

注云。款。猶緩也。言形段遲緩也。

試守。



朱勃未二十，右扶風請試守涇城宰。

注云：試守者，試守一歲，乃為真，食其全俸。

麤糲，侯湛傳十六。

注云：麤糲，米也。九章算術曰：粟五斗，糲率三斗，一斛粟得六斗米，為糲也。

眩瞽，韋彪傳十六。

注云：眩，風疾也。瞽，亂也。謂視不明之貌也。眩音縣，瞽七遘反。

髻髮，伏湛傳十六。

髻髮，厲志，白首不衰。

注云：埤蒼曰：髻，髦也。髻髮，謂童子垂髮。

正印文，馬援傳十四。

注云：東觀記曰：馬援上書，臣所假伏波將軍印，書伏字，犬外嚮。城皋令印，皋字為白，下羊丞印，四下

羊尉印，白下人，人下羊，卽一縣。長吏印文不同，恐天下不正者多。符印所以為信也，所宜齊同，薦曉

古文字者，事下大司空，正郡國印章，奏可。

頭山，馬援傳。

注云：頭山，山名也。在今辰州流陵東。武陵記曰：此山頭與東海方壺山相似，神仙多所游集，因名壺

頭山也。山邊有石窟。卽馬援所穿室以避炎氣也。室內有蛇。如百斛船大。云是援之餘靈也。

蒼布。馬援傳。

公孫述爲馬援制都布單衣。

注云。東觀記曰。都作蒼。前書音義曰。蒼布。白疊布也。

椒風。班固傳三十一。前漢董賢傳附。

注云。桓譚新論曰。董賢女弟爲昭儀居舍號曰椒風。

召賢女弟爲昭儀。位次皇后。更名其舍爲椒風。以配椒房。

師古曰。皇后殿稱椒房。欲配其名。故云椒風。

昭陽殿。班固傳。

注云。昭陽殿。成帝趙昭儀所居也。

秦紫。班固傳。

西都賦云。放秦紫之圓方。

注云。放。象也。秦紫。謂秦徵紫宮也。劉向七略曰。明堂之制。內有太室象紫宮。南出。明堂象太徵。春秋

合誠圖曰。太徵其星十二。四方。史記天官書曰。環之扞衛十二星。藩臣皆曰紫宮。是太徵方面紫宮

圓也。

避第。皇甫規傳五十五。

皇甫規自以連在大位，欲退身避第。

注云：言欲歸第，避仕宦之塗也。

帷幄。

注云：在旁曰帷，在上曰幄。

檢柙。仲長統傳三十九。

中世之選三公也，務於清慤謹慎，循常習故者，是婦女之檢柙，鄉曲之常人耳。惡足以居斯位邪。

注云：檢柙猶規矩。

狙詐。黨錮傳序五十七。

霸德既衰，狙詐萌起。

注云：霸德衰，謂六國時也。狙，七余反。廣雅曰：狙，彌猴也。以其多詐，故比之也。

叔末。黨錮傳序。

叔末澆訛，王道陵缺。

注云：叔末猶季世也。

權。崔寔傳四十二。

聖人執權。遭時定制。步驟之差。各有云設。

注云。權謂變也。遭遇其時。而定法制。不循於舊也。

兼金。張衡傳四十九。

注云。兼金。價倍於惡者。故曰兼金。

邪揄。王霸傳十。

王郎起。光武在薊。郎移檄購光武。光武令王霸至市中募人。將以擊郎。市人皆大笑。舉手邪揄之。

注云。說文曰。厭。厭手相笑。厭。戈支反。厭音踰。或音由。此云邪揄。語輕重不同。

強項。楊震傳四十四。

注云。強項。言不低屈也。

悽悽。楊賜傳四十四。

不盡其悽悽之心。

注云。悽悽。猶勤勤也。悽。力侯反。

壽家。侯覽傳六十八。

注云。生而自爲家爲壽家。

抵罪。南匈奴傳六十八。

中郎將張修與單于不相能，修擅斬之，更立右賢王羌渠爲單于，修以不先請。

調穀，蓋勳傳四十八。

蓋勳爲漢陽太守，調穀以廩飢人。

注云：調猶發也。

嗇夫，城陽恭王傳四，百官志二十八。

光武十八年，立考侯康侯廟，比園陵，置嗇夫。

注云：嗇夫本鄉官，主知賦役多少，平其差品，園陵置之，知祭祀徵求諸事。注云：風俗通曰：嗇者，省也。夫，賦也，言消息百姓均其役賦。

平署，李膺傳五十七。

李膺等遭黨事，當考實案經三府，太尉陳蕃卻之曰：今所考案皆海內人譽，憂國忠公之臣，此等猶將十世宥也，豈有罪名不章而致收掠者乎？不肯平署。

注云：平署猶連署。

比門，夏馥傳五十七。

夏馥行質直，同縣高氏蔡氏並皆富植，郡人畏而事之，唯馥比門不與交通。

注云：比門猶並門也。

版蕩董卓傳論六十二

版蕩之篇於焉而極

注云詩曰上帝版版下民卒瘁注云版反也瘁病也言厲王為政反先王之道民盡病也又蕩之什曰蕩蕩上帝下民之辟注云蕩蕩法度廢壞之貌也

九市班固傳三十一

注云長安九市其六在道西三在道東

山西鄭興傳二十六

注云山西謂陝山已西也

門士郭太傳五十八

庾乘少給事縣庭為門士

注云門士即門卒也

太駟郭太傳

段干木晉國之太駟

注云說文曰駟儻也謂合兩家之賣買如今之度市也駟子朗反

題曰許劭傳五十八

許劭少峻名節，好人倫，多所賞識。曹操微時，嘗卑辭厚禮求爲己目，邵鄙其人而不對。操乃伺隙脅劭，劭不得已曰：「君清平之姦賊，亂世之英雄。」操大悅而去。

注云：己目者，令品藻爲題目。

琴操 曹襄傳二十五。

注云：操猶曲也。劉向別錄曰：君子因雅琴之適，故從容以致思焉。其道閉塞悲愁而作者，名其曲曰操。言遇災害不失其操也。紂爲象筮，箕子諫不聽，乃佯狂爲奴隲，而鼓琴以自悲，故傳之曰箕子操。

園邑 梁竦傳二十四。

注云：文帝卽位，追尊薄太后父爲靈文侯，會稽郡置園邑三百家。

綺疎 梁冀傳二十四。

窗牖皆綺疎青瑣。

注云：牖，小窗也。綺疎，謂鏤爲綺文。青瑣，謂刻爲瑣文，而以青飾之也。

飛梁 梁冀傳。

注云：架虛爲橋，若飛也。

洞戶 梁冀傳。

連房洞戶。

注云洞通也。謂相當也。

偃伯靈臺。馬融傳五十上。

注云司馬法曰古者武軍三年不興則凱樂凱歌。偃伯靈臺。答人之勞。告不興也。偃。休也。伯。師節也。靈臺。望氣之臺也。

亡命。王常傳五。

王常。舞陽人也。王莽末爲弟執仇。亡命江夏。

注云命者名也。言背其名籍而逃亡也。

刊章。孔融傳六十七。

山陽張儉爲中常侍。侯覽所怨。覽爲刊章下州郡。以名捕儉。

注云刊。削也。謂削去告人姓名。

郵置。郭太傳五十八。

注云說文曰。郵。境上傳書舍也。廣雅曰。郵。驛也。置。亦驛也。風俗通曰。漢改郵爲置。置者度其遠近之間置之也。

隸名。孔融傳。

孔融爲將作大匠。遷少府。每朝會訪對。融輒引正定議。公卿大夫皆隸名而已。



注云說文云隸附著

隱几孔融傳

注云隱憑也

直指孔融傳

孔融曰馬日磾以上公之尊乘髦節之使銜命直指甯輯東夏

注云直指無屈撓也前書有繡衣直指輯和也

臘賜何敞傳三十三

何敞曰臘賜自郎官以上公卿王侯以下至於空竭帑藏損耗國資

注云臘賜大將軍三公錢各二十萬牛肉二百斤粳米二百斛特進侯十五萬卿十萬校尉五萬尙書三萬侍中將大夫各二萬千石六百石各七千虎賁羽林郎二人共三千以爲祀門戶直

五湖馮衍傳十八下

注云越絕書曰太湖周三萬六千頃虞翻云太湖有五道故謂之五湖隔湖洮湖射湖貴湖及太湖爲五湖並太湖之小支俱連太湖故太湖兼得五湖之名在今湖州東也

浩聲馬援傳十四

注云浩聲音告門縣名屬金城郡浩水名也聲者水流夾山間兩岸深若門也詩曰鳧鷖在聲亦其

義也。今俗呼此水爲閣門河。蓋疾言之耳。

駱驛不絕。郭伋傳二十一。

注云。駱驛。連續也。

優復。杜詩傳二十一。

杜詩上疏曰。今若使公卿郡守出於軍壘。則將帥自厲。士卒之復。比於宿衛。則戎士自百。

注云。復。謂優寬也。音福。續漢志曰。羽林郎秩比三百石。掌侍從宿衛。言士卒得比於郎。則人百其勇。

麟藉。廉范傳二十一。

虜自相麟藉。死者千餘人。

注云。麟。轆也。藉。相蹈藉也。

典負。樊儵傳二十二。

河南縣亡失官錢。典負者坐死。

注云。典。謂主典。負。謂欠負。

二祖四宗。肅宗紀元和二年。

詔祠二祖四宗。

注云。二祖。謂高祖。世祖。四宗。謂文帝爲太宗。武帝爲世宗。宣帝爲中宗。明帝爲顯宗。

釜鬻和帝紀永元五年

注云鬻音尋方言曰飮自關而東謂之鬻

平民廢帝紀

貪苛慘毒延及平民

注云平民謂善人也書曰延于平人

伏閉和帝紀

永元六年六月己酉初令伏閉盡日

注云漢官舊儀曰伏日萬鬼行故盡日閉不干他事

澄道班固傳三十上

西都賦云彌明光而緝長樂陵澄道而超西墉

注云澄道陸級也

楓棧班固傳

西都賦云上楓棧而棲金雀

注云楓棧殿堂上最高處也楓音孤棧力登反其上棲金雀

靈篇班固傳

注云。靈篇。河洛之書也。

苛細。宣秉傳十七。

宣秉務舉大綱。簡畧苛細。

注云。說文曰。苛。細草也。以喻煩雜也。

仞積。張譏傳六十八。宣者傳論。

靈帝寵任宦官。又於西園造萬金堂。引司農金錢繒帛。仞積其中。

注云。仞。滿也。

宦者論曰。南金和寶。冰紈霧縠之積。盈仞珍藏。

廢典。顯宗紀。

注云。廢典。謂明堂辟雍之禮。歷漢不行也。

犀舟勁楫。張衡傳四十九。

注云。前書曰。羌戎弓矛之兵器。不犀利。音義曰。今俗謂刀兵利爲犀。犀。堅也。

鎧馬。蔡邕傳五十下。

幽冀舊壤。鎧馬所出。

注云。鎧甲也。周禮考工記曰。燕無函。函亦甲也。言幽燕之地。家家皆能爲函。故無函匠也。左傳云。冀。

之北十馬之所生。

表左。蔡邕傳

蔡邕曰：謹條宜所施行七事表左。

注云：表左謂陳之於表左，猶今云如左右者。

列將。

西北列將得無解體。

注云：列將謂諸將也。

宰府。

注云：宰府謂三公府也。

右職。蔡邕傳

注云：右用事之便，謂樞要之官。

卓囊。蔡邕傳

注云：漢官儀曰：凡章表皆啓封，其言密事得卓囊也。

魁頭露紛。東夷傳七十五

馮韓人大率皆魁頭露紛。

注云。魁頭。猶科頭也。謂以髮縈繞成科結也。紉音計。

關達。馬武傳十二。

馬武爲人嗜酒。關達敢言。

注云。關達。大度也。敢言。果敢於事無所隱也。

回容。馬武傳。

光武雖制銜功臣。而每能回容。宥其小失。

注云。回。曲也。曲法以容也。

風星。任文公傳七十二。

任文孫明曉天官風星祕要。

乙夜。雞鳴歌。百官志二十六。

注云。凡中宮漏。夜盡鼓鳴則起。晝盡鍾鳴則息。衛士甲乙檄相傳。甲夜畢。傳乙夜。相傳盡五更。衛士傳言五更未明三刻後雞鳴。衛士踵丞郎趨殿上臺。不畜宮中雞。汝南出雞鳴。衛士候朱爵門外。專傳雞鳴於宮中。應劭曰。楚歌。今雞鳴歌也。晉太康地道記曰。後漢固始。銅陽。公安。細陽。四縣衛士習此曲。於闕下歌之。今雞鳴是也。

賀冬至。禮儀志五。

注云冬至陽氣起君道長故賀夏至陰氣起君道衰故不賀鼓以動衆鍾以止衆故夜漏盡鼓鳴則起晝漏盡鍾鳴則息

杜宇張衡傳四十九文選左思賦四前漢楊雄傳五十七上

張衡思玄賦云鼈令殫而尸亡兮取蜀禪而引世

注云鼈令蜀王名也令音靈殫死也禪傳位也引長也楊雄蜀王本紀曰荆人鼈令死其尸流亡隨

江水上至成都見蜀王杜宇杜宇立以爲相杜宇號望帝自以德不如鼈令以其國禪之號開明帝

下至五代有開明尙始去帝號復稱王也

左思蜀都賦云碧化萋宏之血鳥生杜宇之魄

注云萋宏死於蜀藏其血三年化爲碧杜宇王蜀號曰望帝宇死化爲子規鳥

楊雄反騷云徒恐鸚鵡之將鳴兮顧先百草爲不芳

師古曰離騷云鸚鵡之先鳴兮使夫百草爲不芳雄言終以自沈何惜芳草而憂鸚鵡也鵲字也

鸚鵡鳥一名買鏡一名子規一名杜鵑常以立夏鳴鳴則衆芳皆歇鸚大系反鵲音桂鸚字或作鸚

亦音題鵲音決鏡音詭

九宮張衡傳四十九

張衡以圖緯虛妄非聖人之法乃上疏曰臣聞聖人明審律歷以定吉凶重之以卜筮雜之以九宮

注云。易乾鑿度曰。太一取其數以行九宮。鄭玄注云。太一者。北辰神名也。下行八卦之宮。每四乃還於中央。中央者。地神之所居。故謂之九宮。天數大分。以陽出。以陰入。陽起於子。陰起於午。是以太一下九宮。從坎宮始。自此而從於坤宮。又自此而從於震宮。又自此而從於巽宮。所以從半也。還息於中央之宮。既又自此而從於乾宮。又自此而從於兌宮。又自此而從於艮宮。又自此而從於離宮。行則周矣。上遊息於太一之星。而反紫宮。行起從坎宮始。終於離宮也。

陽月。馬馳傳五十。

注云。爾雅曰。十月爲陽。孫炎注云。純陰用事。嫌於無陽。故以名云。

三家言天。張衡傳。

張衡遷太史令。遂乃研覈陰陽。妙盡璇璣之政。作渾天儀。著靈憲算罔論。言甚詳明。

注云。漢名臣奏曰。蔡邕曰。言天體者有三家。一曰周髀。二曰宣夜。三曰渾天。宣夜之學絕。無師法。周髀術數具存。考驗天狀。多所違失。故史官不用。唯渾天者。近得其情。今史官所用候臺鋼儀。則其法也。靈憲序曰。昔在先王。將步天路。用定靈軌。尋緒本元。先準之於渾儀體。是爲正儀。故靈憲作與衡集。無算罔論。蓋網絡天地而算之。因名焉。

八行。竇章傳十五。

注云。馬融與竇章書曰。孟陵奴來賜書。見手迹。歡喜可量。書雖兩紙。紙八行。行七字。



象鑣輿服志三十九

注云爾雅注曰鑣馬勒旁鐵也皆用象牙乘輿有之

五星蘇竟傳二十上

注云五星謂東方歲星南方熒惑西方太白北方辰星中央鎮星

懷宮耿純傳十一

注云懷宮河內縣名有離宮焉

雲罕輿服志上二十九

法駕前驅有九旂雲罕

注云徐廣曰旂車有九乘前史不記形也武王克紂百夫荷罕旗以先驅東京賦曰雲罕九旂薛綜

曰旂旗名

皮軒輿服志上

注云胡廣曰皮軒以虎皮爲軒郭璞曰皮軒革車或曰卽曲禮前有士師則載虎皮

豹尾輿服志上

大駕法駕最後一車懸豹尾以前比省中

注云薛綜曰豹尾侍御史載之小學漢官篇曰豹尾過後罷屯解圍胡廣曰施於道路豹尾之內爲

省中故須過後屯圍乃得解。皆所以戒不虞也。淮南子曰：軍正執豹皮，所以制正其衆。禮記前載虎皮，亦此之類。

一時之功。吳漢傳八。

吳漢說彭寵曰：漁陽上谷突騎，天下所聞也。君何不合二郡精銳，附劉公擊邯鄲？此一時之功也。

注云：一時言不可再遇也。

尼首。高獲傳七十二。

高獲爲人，尼首方面。

注云：尼首，首象尼邱，山中下四方高也。

右姓。郭伋傳二十一。

強宗右姓。

注云：右姓，猶高姓也。

白水爲河。張衡傳四十九。

注云：河圖曰：崑山出五色流水，其白水東南流，入中國，名爲河也。

天潢。張衡傳。

思元賦云：乘天潢之汎汎兮，浮雲漢之湯湯。

注云。史記曰。王良旁有八星。絕漢曰天潢。雲漢曰天河也。

小斬。崔寔傳四十二。

靈帝時。開鴻都門。榜賣官爵。是時段熲等有功勤名譽。然皆先輸貨財。而後登公位。崔烈時。因傅母入錢五百萬。得爲司徒。及拜日。天子臨軒。百僚畢會。帝顧謂親倖曰。悔不小斬。可至千萬。

注云。斬。固惜之也。斬或作僞。說文曰。僞。引爲價也。一建反。

區種。劉殷傳二十九。

顯宗時。以郡國牛疫。通使區種增耕。

注云。汜勝之書曰。上農區田法。方深各六寸。間相去七寸。一畝三千七百區。丁男女種十畝。至秋收。區三升粟。畝得百斛。中農區田法。方七寸。深六寸。間相去二尺。一畝千二十七區。丁男女種十畝。秋收粟。畝得五十一石。下農區田法。方九寸。深六寸。間相去三尺。秋收。畝得二十八石。旱卽以水沃之。

行春。崔駰傳四十二。

強起班春。

注云。郡國常以春行縣。勸人農桑。振救乏絕。班布春令也。

桑榆。孟嘗傳六十六。

年歲有訖。桑榆行盡。

注云。謂日將夕。在桑榆間。言晚暮也。

三署郎。

漢官。左右中郎將。皆秦官也。比二千石。三署郎皆屬焉。三署。謂五官署。左右署也。

端門。襄楷傳二十下。前漢李尋傳。

襄楷曰。去歲五月。熒惑入太微。犯帝坐。出端門。不軌常道。今年歲星久守太微。逆行西至掖門。還切執法。

注云。天官書曰。太微南四星。中爲端門。軌猶依也。又曰。端門左右星爲掖門。太微南四星爲執法。謂迫近也。

前漢書注云。端門。太微正南門。

貪叨。

注云。方言曰。叨。殘也。

苞苴。第五種傳三十一。楊賜傳四十四。

在鄉曲無苞苴之嫌。步朝堂無擇言之闕。

注云。苞苴。饋遺也。

楊賜上封事曰。夫女謁。行則讒夫昌。讒夫昌則苞苴通。

黃腸梁商傳二十四

大將軍梁商薨，帝賜以東園朱壽之器，銀鏤黃腸玉匣什物二十八種。

注云：壽器，棺也。以朱飾之，以銀鏤之。前書音義曰：以柏木黃心爲槨，曰黃腸也。

鄭公鄉鄭玄傳二十五

孔融告高密縣爲鄭元特立一鄉，曰昔齊置士鄉，越有君子軍，皆異賢之意。鄭君好學，實懷明德。昔太史公廷尉吳公，謁者僕射鄧公，皆漢之名臣。又南山四皓，有東園公、夏黃公、潛光、隱耀，世嘉其高，皆悉稱公。然則公者，仁德之正號，不必三事大夫也。今鄭君鄉，宜曰鄭公鄉。

注云：管仲相桓公，制國爲二十一鄉，工商鄉六，士鄉十五，以居工商士也。吳越相攻，越王句踐乃中分其師爲左右軍，以其私卒君子六千人爲中軍。注云：君子，王所親近有志行者。事並見國語。

公羊墨守鄭玄傳

任城何休好公羊學，遂著公羊墨守、左氏膏肓、穀梁廢疾。鄭元乃發墨守、鍼膏肓、起廢疾。休見而嘆曰：康成入吾室，操吾矛，以伐我乎。

注云：言公羊義理深遠，不可駁難，如墨翟之守城也。說文云：肓，隔也。心下爲膏，喻左氏之疾不可爲也。康成元字也。

顯氣班固傳三十下

西都賦云抗仙掌與承露擢雙立之金莖軼埃壙之混濁鮮顯氣之清英。

注云說文云顛白貌音皓。

棹卒岑彭傳七。

棹卒六萬餘人。

注云棹卒持棹行船也。

露橈岑彭傳。

露橈數千艘。

注云爾雅曰檝謂之橈露橈謂露檝在外人在船中。

巫蠱和帝陰皇后傳十。

挾巫蠱道。

注云巫師爲蠱故曰巫蠱左傳注云蠱惑也。

讎校和帝陰皇后傳十。

東觀讎校傳記。

注云讎對也。

偃子和帝陰皇后傳。

太后以陰陽不和，軍旅數興，詔饗會勿設戲作樂，減逐疫，偃子之半。

注云：偃子，逐疫之人也。音振。薛綜注西京賦云：偃之爲言善也。善童幼子也。續漢書曰：大儺，選中黃門子弟年十歲以上，十二以下，百二十人爲偃子，皆赤幘，皂製，執大鞮。

中華民國二十六年四月初版

(81342.2)

本國叢書  
基  
兩  
漢博聞  
一册

每册實價國幣叁角  
外埠酌加運費匯費

編者 楊侃

發行人 王雲五  
上海河南路

印刷所 商務印書館  
上海河南路

發行所 商務印書館  
上海及各埠

(本書校對者 李家超 金雲峯 錢兆駭  
林東塘 郭浩如 張叔介)

E一六三九平

祥



060



D 223  
612